



दाऊदमी परमप्रभु आ सन्दोस यरूसलेममी पिशशो

२ सामुएल

ब्रेक्ब मुर: डोंइती १सामुएल नु २सामुएल किताब कान बाक्ताक्स। १इतिहास २६:२६ पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोव्र पाइब सामुएल, नाथान नु गाद आन ब्रेक्शो किताबम ब्रेक्शो बाक्मा बाक्त।

गेना ब्रेक्शो: ६७५ बि. सी. क्येडा नोले परमप्रभु यावे आ लोव्र पाइब रे ब्रेक्शा एको किताब थुम्शो बाक्त।

मार ब्रेक्शो: परमप्रभुम इस्राएली आन कली दाक्चा मप्रोंइब आ सांकछी बाक्ब।

दाऊदम सावल बेक्शो लोव्र नेंशो

१ सावल बेक्म नोले दाऊदम अमालेकी आन कली खेदा पशा, लेशशा नाक्त निकशी सिकलाग सहरम बाक्शो बाक्माक्त। १सामुएल ३०:२६ २मिनु आ नित्थ नाक्ती, आ वा खाक्शो नु पियाम खप फुइसीशो मुर का सावल आ बाक्तीक रे जाक्माक्त। मिनु मेको दाऊद आ बाक्तीक जाक्शा, मेको आ डोंइती खुम्की पा बाम्माक्त। ३दाऊदम मेको कली “गे ते रे जाक्डे?” दे हिल्लो

पवा बाक्त। मिनु मेकोमी “गो इस्राएल डा लडाइ पाइब आन बाक्तीके रे प्रोक्शा जाक्ती” देंमाक्त। ४मिनु दाऊदमी मेको कली “मार दुम्मे? आं कली देंनो” देंमाक्त। मिनु मेकोमी “लडाइ पाइबपुकी लडाइ रे प्रोक्तेक्म। शुश मुर साइक्चा पुंइसाक्म। मिनु सावल नु आ तौ योनाथन यो साइक्चा पुंइसाक्स” देंमाक्त। ५मिनु दाऊदम मेको लोव्र चाक्ब ठिटा कली “सावल नु आ तौ योनाथन साइक्चा पुंइसाक्स, दे दोपा तुइक्ती?” देंमाक्त। ६मिनु मेको ठिटांमी “गो गिल्लोआ

डांडाम बाक्शो नड। मेकेर सावल कली आ तूतीक तिक्शा राप्शा बाक्शो ताता। बग्गी डोइक्ब नु शारा डोइक्बपुकीम मेको कली थित्वा चिक्ताक्म। *१सामुएल ३१:१-३*

७मिनु मेकोमी नोले लेशशा कोव्रडानु, आं कली तती। मिनु ब्रेत्ताक्यी। मिनु गो 'मार देनी' देंती। ८मिनु मेकोमी 'गे सु नवे' दे हिल्लो पती। मिनु 'गो अमालेकी का नड' देंती। ९मिनु मेकोमी 'आं नेक्था जाक्को। आं कली साइय्यी। मारदे हना गो बेक्चा चिक्शो बाक्ती। आं सोक्त ला बाक्ब' देंत। १०मोपतीके गो आ नेक्था लशा, मेको कली साइक्ता। मारदे हना मेको मब्रोंडब, दे गो तुइक्ताक्ड। मिनु गो मेको आ पिया रे सिरपेच नु आ गुइ डा पांडतीके, आं प्रभु, इन बाक्तीकेम चाक्ता" देंमाक्त। ११मेको लोव्र नेंशा, दाऊदम आ वा खाक्गा बाक्त। मेको नु बाक्ब मुर नेल्लेमी यो मो पामे बाक्त। *१सामुएल ४:१२*

१२मेकोपुकी नां मरिक्म सम्म सावल नु आ तौ योनाथन आस पर्बम डाक्शा रोंका पा माइजा बाक्मा बाक्त। मारदे हना परमप्रभु यावे आ लडाइ पाइबपुकी नु इस्राएल आ खिं डा मुरपुकी तरवारम साइक्चा पुंडसमा बाक्त। *१सामुएल ३१:१३*

१३मिनु दाऊदम मेको लोव्र चाक्ब ठिटा कली "गे ते रे जाक्शो नवे?" दे हिल्लो पवा बाक्त। मिनु मेकोमी "गो अर्को रागी डा अमालेकी का आ तौ नड" देंमाक्त। १४मिनु दाऊदमी "परमप्रभु यावे आ तेल लुक्शो मुर कली साइक्चा महिने?" देंमाक्त। *१सामुएल २४:७; १सामुएल २६:६*

१५मिनु दाऊदमी आ ठिटा मुर का कली ब्रेशशा "मेको कली सतो" दे अरेवा बाक्त। मिनु मेकोमी मेको कली तुप्शा सदा बाक्त। *२सामुएल ४:१०-१२*

१६दाऊदमी मेको कली "इ हुश इ पिया तार मोइसेक्ल। मारदे हना गे 'गो परमप्रभु यावे आ तेल लुक्शो कली साइक्ता' देंते। इ शोव्रमीन आंम इ कली दोसी सेल्साक्वे" देंमाक्त।

दाऊदम रोंका पतीक कुम्सो सेल्शो

१७मिनु दाऊदमी सावल नु आ तौ योनाथन आस पर्बम रोंका पतीक कुम्सो पवा बाक्त। १८मिनु मेको रोंका पतीक कुम्सो यहूदा डा मुर आन कली शेंचा माल्ब, दे हुकुम पवा बाक्त। मेको कुम्सो याशार आ किताबम ब्रेक्शो बाक्ब।

२सामुएल १:२२; यहोसु १०:१३

१९"इस्राएल, इ छेडछेड डांडाम साइक्चा पुंडसाक्म। सक्ति पाइश्शो मुरपुकी दोपा बेक्मा? २०गाथम एको लोव्र मपने। अशक्लोन डा लांम एको लोव्र मपने। मो पाइतीनी हना, पलिस्ती आन तमी ग्येरसीनीम। खोइक्तीक चिनु मखोइश्शो आन तमी ग्येरसीनीम।

२१गिल्बोआ नें पाइश्शो डांडा, इ तार सीत नु रेड मयिल। अन्न ग्रेल्ब रू मबाक्ल। मारदे हना सक्ति पाइश्शो आ तेक्तीक ग्रॉग्रा दिशो सेल्तेक्म। सावल आ तेक्तीक कली मुल रे तेल मखेक्नीम।

२२योनाथन आ लिब्रा साइक्चा पुंडसीशो जोरी सत्रु आन हुश नु बोल्यो मुर आन बोंसो मलुम्सीथु, गेनायो मले। सावल आ तरवार यो मोशा मले।

२३सावल नु योनाथन दाक्मुबाक्ताक्स। अरुम यो दाक्चा पुंडसाक्स। ब्रोंडसा नु बेक्सा नु यो काथा दुम्ताक्स। मेको निक्शी ककाकुली क्येडा यो रीब पा पाइब बाक्ताक्स। गुप्स क्येडा यो बोल्यो बाक्ताक्स।

२४ इस्राएल डा तमीपुकी सावल आ पर्वम डाक्कीन। मेकोमी इन कली लल दारदारशो शुश क्येट लाइब वा फेक्पाइशो बाक्त। मेकोमी इन कली सुन के गहना पांइपाइशो बाक्त।

२५ सक्ति पाइशो दोपा बेक्मा! मेको लडाइम बेक्तेक्म। योनाथन साइक्चा पुंइसीशा, डांडाम गोल्लो बाक्ब। २६ आं लोकब योनाथन, गो इ पर्वम रोंका पाइनुड। गो इ कली थाम्पा दाक्ताक्न। इ आं कली दाक्शो ठेयब बाक्त। मीश मुर आन कली दाक्तीक क्येडा यो लाक्शो बाक्त। २७ सक्ति पाइशो दोपा बेक्मा! मेको लडाइम आन या खतम दुम्तेक्म” दे कुम्सो पशो बाक्त।

दाऊद यहूदा डा पिप दुम्शो

२ मेको नोले दाऊदमी परमप्रभु यावे कली “मार गो यहूदा डा सहर काम लडा?” दे हिल्लो पवा बाक्त। मिनु परमप्रभु यावेमी “लावो” देंमाक्त। मिनु दाऊदमी “तेको सहरम लड” दे हिल्लो पवा बाक्त। मिनु “हेब्रोन सहरम लावो” देंमाक्त। १ सामुएल २३:६,६; १ सामुएल ३०:७-८ ३ मोपतीके दाऊद आ मीश निक्शी येजेल डा अहीनोआम नु कारमेल डा बेक्शो नाबाल आ मीश अबीगेल नु मेकेर लमाक्त। १ सामुएल २५:४२-४३ ३ मिनु दाऊदमी आ नु गाक्ब मुर आन खिं डा मुर नेल्ल यो लाइक्मी बाक्त। मिनु मेकोपुकी हेब्रोन सहरमी बाक्मा बाक्त। ४ मिनु यहूदा डा मुरपुकी जाक्शा, दाऊद कली तेल लुक्शा, आन पिप सेल्मे बाक्त। मिनु मुरपुकीमी दाऊद कली “यावेश-गिलाद डा मुरपुकीम सावल कली थिम्तेक्म” दे नेंपदमे बाक्त। २ सामुएल ५:३; १ सामुएल १६:१३; १ सामुएल ३१:१-१३

५ मिनु दाऊदम यावेश-गिलाद डा मुर आन कली लोत्र कुरब मुर सोइशशा “परमप्रभु यावेम इन कली आसीक गेवल। मारदे हना गे इन प्रभु सावल कली रिम्शो पा थिम्तीनी। ६ मिनु परमप्रभु यावेमी इन कली गेना हना यो दाक्शा मप्रोनल। मिनु गो यो इन पशो गेय आ पर्वम इन कली इनाम गेनुड। ७ मोपतीके बोल्यो नु महिंब दुमीन। मारदे हना इन प्रभु सावल बेक्शा लत। मिनु यहूदा डा मुरपुकीम आं कली आन पिप सेल्तीमी” दे लोत्र कुरब मुर सोइक्ता बाक्त।

इश-बोशेथ पिप दुम्शो

८ मेना सावल आ लडाइ पाइब मुर आन ठेयब मुर नेर आ तौ आब्नेरमी सावल आ तौ इश-बोशेथ कली यर्दन ओंथ हांबु महा-नाइमम चाक्गा बाक्त। १ सामुएल १४:५०; उत्पत्ती ३२:२-३ ६ मिनु गिलाद, अशशुर, येजेल, एफ्राइम, बेन्यामीन आ थर डा मुर नु इस्राएली नेल्ल आन पिप सेला बाक्त। १० सावल आ तौ इश-बोशेथ इस्राएल डा पिप दुम्मेनु ४० बर्स दुम्शो बाक्माक्त। मेकोमी बर्स निक्शी सम्म सासन पवा बाक्त। तन्न यहूदा डा मुर दाऊद आ नोले खोदमे बाक्त। ११ दाऊदमी हेब्रोन सहरम यहूदा डा मुर आन कली ७ बर्स ६ महिना सम्म सासन पवा बाक्त।

आसाहेल बेक्शो

१२ नेर आ तौ आब्नेर, सावल आ तौ इश-बोशेथ नु आ गेय पाइबपुकी महा-नाइम रे गिबोन लमा बाक्त। १३ सेरूयाह आ तौ योआबमी दाऊद आ गेय पाइब आन कली लाइशशा गिबोन डा दोम्लीम

लडाइ पवा बाक्त। मेको निक्शी गिबोन डा दोम्लीम गुम्सा बाक्त। मिनु काम दोम्ली आ आइक्की हांबुम, काम दोम्ली आ ओंथ हांबुम आस लडाइ पाइब आन कली राप्पदसे बाक्त। *१ सामुएल २६:६; यहोसु ६:३, १७* १४ मिनु आब्नेरम योआब कली “इ लडाइ पाइब मुर नु आं लडाइ पाइब का का पा गुम्शा इस डोंइती लडाइ पामेक्ल” देंमाक्त। मिनु योआबमी “दुम्ब, मो पामेक्ल” देंमाक्त। १५ मोपतीके मेकोपुकी गूशा लशा, बेन्यामीन नु सावल आ तौ इश-बोशेथ आन मुर १२ जना नु दाऊद आ मुर १२ जना का का पा राम्मा बाक्त। १६ मिनु मेको नेल्लेमी आंम आंम जोरी सत्रु आन पियाम ग्याइशशा कोखाम तरवारम आप्मे बाक्त। मोपा नेल्ल कालेम बेक्मा बाक्त। मोपतीके गिबोन आ नेक्था डा रू कली हेल्काथ-हच्चुरीम देंनीम। मेको नें आ अर्थ तरवार आ क्योरतीक देंसीब। १७ मेको नाक्त थम ठेयब लडाइ दुम्माक्त। मिनु आब्नेर नु इस्राएल डा मुर दाऊद आ मुर आन क्येडा बुमा बाक्त।

१८ सेरूयाह आ तौ सांफा योआब, अबीशै नु आसाहेल मेकेर बाक्शो बाक्मा बाक्त। आसाहेल ब्वाकी डा दोरब किशशा खोदेशो रीब पा गेय पाइब बाक्माक्त। *१ इतिहास २:१६* १६ मेकोम ग्युरा पेरा एर ओंथ मारेइ मकोव्रथु दोरशा आब्नेर कली खेदा पवा बाक्त। २० मिनु आब्नेरम नोले लेशशा कोव्रशा “मार गे आसाहेल नवे?” दे हिल्लो पवा बाक्त। मिनु आसाहेलमी “गो नड” देंमाक्त। २१ मिनु आब्नेरमी “ग्युरा गे कि पेरा गे लशा, लडाइ पाइब का कली आ मार मार रोइक्तो” देंमाक्त। तन्न आसाहेलमी मेको कली खेदा पचा

मप्रोना बाक्त। २२ मिनु आब्नेरमी लेंशा “आं कली खेदा पचा प्रोंइयी। गो इ कली मारदे साइक्नुडा? इ लोकब योआब आ डोंइती दोपा आं कुल कोंइनुडा?” देंमाक्त। २३ तन्न आसाहेल एर ओंथ लने मबिस्से बाक्त। मिनु आब्नेरमी आ तूतीक नोले गे आप्शा मेको आ कोव्रज खिदा बाक्त। मिनु मेकेर गोल्ला बेक्माक्त। मिनु आसाहेल बेक्शो बाक्तीके जाक्शा मुर नेल्ल दिक्मा बाक्त। *२ सामुएल ३:२७* २४ मिनु योआब नु अबीशैमी आब्नेर कली खेदा पस डा पस पाम्से बाक्त। मिनु नां मलाक्थु, मेकोपुकी अम्माह डांडा जाक्मा बाक्त। अम्माह डांडा गिअह आ डोंइती, गिबोन रे गोरशो रागी डा लाम बाक्ब।

२५ बेन्यामीन आ थर डा मुर आब्नेर गे बुक्मा बाक्त। मिनु हुल का दुम्शा, अम्माह डांडा तार लडाइ पचा कली ठीक दुम्मा बाक्त। २६ मिनु आब्नेरमी ठेयब संदा पा योआब कली “मार, गेना हना यो क्योरमुस डा मुस, साइक्मुस डा साइक्मुस बाक्चा? मेको नोले मरिम्शो दुम्ब, दे गे मतुइक्नेवे? आंम लोकब आन कली खेदा पचा प्रोंइचा, दे इ मुर आन कली ममाइक्नेवे?” देंमाक्त। २७ मिनु योआबमी “परमप्रभु ब्रोंइशा बाक्शो खोदेशो पा, गे मो मदेशो नवे हना, मुरपुकीम दीसा सुनी सम्म यो आन लोकब आन कली खेदा पचा मप्रोनेम वा” देंमाक्त। २८ मिनु योआबम तुराही तबा बाक्त। मिनु मुर नेल्लेमी इस्राएली आन कली खेदा पचा प्रोन्मे बाक्त। मिनु लडाइ नांइसे बाक्त। २९ आब्नेर नु आ मुरपुकी नाक्दो रे अराबाह रे गाक्शा यर्दन खोला शोक्समा बाक्त। मिनु सुनी रे गाक्शा महा-नाइमम जाक्दीम्मा बाक्त।

३० मिनु योआबमी आब्नेर कली खेदा पचा प्रॉइशा, लडाइ पाइब आन कली पुक्मी बाक्त। मिनु आसाहेल प्रॉइशा, दाऊद आ मुर १६ जना मबाक्मा बाक्त। ३१ तन्न दाऊद आ लडाइ पाइबपुकीमी बेन्यामीन आ थर डा मुर नु आब्नेर आ नोले खोइक्ब ३ सहे ६० जना आन कली सदमे बाक्त। ३२ मेकोपुकीम आसाहेल कली कुरशा लाइशशा, आ आफ आ तुरस बेथलेहेम सहरम थिम्मे बाक्त। मेको नोले योआब नु आ मुरपुकी नाक्दो रे गाक्शा नां सोव्र सोव्र हेब्रोन सहरमी जाक्दीम्मा बाक्त।

दाऊद आ खिं डा मुर

३ सावल नु दाऊद आस खिं डा मुर शुश नाक्त सम्म लडाइ पस डा पस बाक्मा बाक्त। मिनु दाऊद बोल्यो दुम्ना दुम्न लमाक्त। सावल आ खिं डा मुर चहिं मचापब दुम्ना दुम्न लमा बाक्त।

२ सामुएल ५:१०

२ हेब्रोनमी दाऊद आ तौपुकी जरमेसीमा बाक्त। मेको आ डोंइती जरमेशो तौ अम्नोन बाक्माक्त। मेको आ ममा येज्जेल डा अहीनोआम बाक्माक्त। १ इतिहास ३:१-४; २ सामुएल १३:१ ३ मेको आ माइला तौ किलेआब बाक्माक्त। मेको आ ममा कारमेल डा बेक्शो नाबाल आ मीश अबीगेल बाक्माक्त। मेको आ साइला तौ अब्सालोम बाक्माक्त। मेको आ ममा गेशुर डा पिप तल्मै आ तमी माकाह बाक्माक्त। २ सामुएल १५:१ ४ काइला अदोनीयाह बाक्माक्त। मेको आ ममा हग्गीथ बाक्माक्त। ठाइला शेफत्याह बाक्माक्त। मेको आ ममा अबीतल बाक्माक्त। १ राजा १:५ ५ आ

कान्छा इश्रेआम बाक्माक्त। मेको आ ममा दाऊद आ मीश एग्लाह बाक्माक्त। मेको नेल्ल हेब्रोनम जरमेशो दाऊद आ तौ बाक्मा बाक्त।

आब्नेरमी दाऊद नु कसम जशो

६ सावल नु दाऊद आस खिं डा मुर आन दातेमी लडाइ दुम्ना दुम्न लमेनु, आब्नेर सावल आ खिंमी बोल्यो दुम्ना दुम्न लमाक्त। ७ मिनु सावल आ कान्छी मीश का बाक्माक्त। मेको आइयाह आ तमी बाक्माक्त। मेको आ नें रिस्पाह बाक्माक्त। मिनु इश-बोशेथम आब्नेर कली “गे आं आफ आ कान्छी मीश नु मारदे इमे?” दे मदा बाक्त। ८ आब्नेरमी इश-बोशेथ आ लोव्र नेंशा गाइशशा “मार, गो यहूदा आ गेय पाइब कुचुम नडा? मुल सम्म गो इ आफ सावल आ खिं डा मुर, आ लोक्ब नु आ वारच आन कली मानेब मुर बाक्ती। गो इन कली दाऊद आ गुडम मगेड। मो हना यो गे एको मीश मुर आ पर्बम आं कली दोस गेनीनी। ९ गो परमप्रभुमी दाऊद कली देंशो मपाता हना, आं कली सजाइ गेयील। परमप्रभु यावेमी दाऊद कली दोदेंशो कसम जवा, गो मोदेंशो पाइनुड। १० ‘सावल आ खिं डा मुर आन राज्य रोइक्चा नु दाऊद कली इस्राएल यहूदा नु दान रे बेयर-शेबा सम्म सासन पपाइक्नुड’ दे परमप्रभु यावेमी देंशो बाक्ब” दे आब्नेरम इश-बोशेथ कली देंमाक्त। ११ मिनु इश-बोशेथ आब्नेर क्येडा हिंतीके मारेइ लोव्र मलेत्ता बाक्त।

१२ मेको नोले आब्नेरम हेब्रोनम बाक्ब दाऊद कली “एको रागी सु के बाक्बा? गे गो नु कबल का पने। मिनु गो इस्राएल

नेल्ल इन के सेल्चा कली वारच पाइनुड” दे लोव्र कुरब मुर सोइक्ता बाक्त। १३मिनु दाऊदमी मेको आन कली “दुम्ब। गो गे नु कबल पाइनुड। तन्न गो इ कली लोव्र का पाइनुड। गे सावल आ तमी मिकाल कली मचाक्तीवी हना, आं डोंइती मजाक्को, दे मतीन” दे माइक्मी बाक्त। १४मिनु दाऊदमी सावल आ तौ इश-बोशेथ कली यो “आं मीश मिकाल गेयी। गो मेको आ पर्वम सहे का जना पलिस्ती आन खोइक्तीक चिनु खोइशशो कुशुल थाप्ताक्ड” देपाइक्थ मुर सोइक्ता बाक्त। १सामुएल १८:२५-२७ १५मोपतीके इश-बोशेथम मुर सोइशशा मिकाल आ वोंइश लाइश आ तौ, पाल्तीएल आ बाक्तीक रे चाक्पदा बाक्त। १सामुएल २५:४४ १६मेको डाक्ना डाक्न बाहुरीम सहर सम्म मिकल आ नोले खोइशशा पिमाक्त। मिनु आब्नेरमी “लेशशा खिं लावो” दे मदा नोले लेम्माक्त।

१७मिनु नोले आब्नेरम इस्राएल डा खाल्पा आन कली “शुश डोंइती रे गेपुकीम दाऊद कली पिप सेल्चा माल्शो ननी। १८मुल मेको पची जाक्त। मारदे हना परमप्रभु यावेमी दाऊद कली ‘गो आं गेय पाइब दाऊद आ गुइ रे आं मुर इस्राएली आन कली पलिस्ती नु आन जोरी सत्रु नेल्ल आन गुइ रे प्रोंइनुड’ दे लोव्र थोक्शो बाक्ब” देंमाक्त। १९आब्नेरमी बेन्यामीन आ थर डा मुर नु यो लोव्र पवा बाक्त। नोले आब्नेर दाऊद आ बाक्तीक हेब्रोन लमाक्त। मिनु इस्राएली नु बेन्यामीन आ थर डा मुर आन पचा देशो लोव्र नेल्ल देंमाक्त।

२०मिनु आब्नेर २० जना मुर नु दाऊद आ बाक्तीक हेब्रोन जाक्दीम्माक्त।

दाऊदम आब्नेर नु मेको नेल्ल आन कली भोज गेमी बाक्त। २१मिनु आब्नेरमी दाऊद कली “मुल आं कली इस्राएली नेल्ल आन कली आं प्रभु, पिप इन डोंइती चाक्चा गेयीनी। मिनु मेकोपुकीम गे नु कबल का पाइनीम। गे इन दाक्शो राज्य कामी रागी नेल्ल डा पिप दुम्नीनी” देंमाक्त। नोले दाऊदमी आब्नेर नु गारशा सोइक्ता बाक्त।

योआबम आब्नेर कली साइशशो

२२मेना योआब दाऊद आ मुरपुकी नु गारशा, लडाइ पा मार मार रोइशशा जाक्मा बाक्त। आब्नेर चहिं गाक्ने थुम्तीके दाऊद नु हेब्रोन सहरम मबाक्माक्त। मारदे हना दाऊदम मेको नु गारशा, सोइक्ने थुम्शो बाक्माक्त। २३मिनु योआब नु लडाइ पाइब हुल जाक्मानु, मुरुमी “नेर आ तौ आब्नेर दाऊद आ बाक्तीक जाक्मेनु, दाऊदमी मेको नु गारशा सोइक्ताक्व” दे नेंपदमे बाक्त। २४मिनु योआबम पिप आ बाक्तीक लशा “गे एको मार पनी? आब्नेर इन बाक्तीक जाक्माक्त। गे मारदे मेको कली मो लेशशा सोइक्तीनी? २५गे नेर आ तौ आब्नेर कली तुइक्नीनी। मेकोम इन कली जोल पा इन पर्वम रुप्चा कली नु गे मार पा बाक्नी, मेको तुइक्चा कली जाक्शो बाक्ब” देंमाक्त। २६मिनु योआब दाऊद आ बाक्तीक रे गूशा, लोव्र कुरब मुर कली आब्नेर आ नोले सोइक्ता बाक्त। मिनु मेकोम आब्नेर कली सिराह डा कुवा रे लेशशा चाक्दीत्मे बाक्त। तन्न दाऊदम मेको नेल्ल मतुइक्ता बाक्त। २७मोपा आब्नेर हेब्रोनम लेशशा जाक्मेनु, योआबमी लोव्र

पचा, दे सुइ मबाक्तीकेम लदा बाक्त। मिनु आ कोव्रजम थोकगा बाक्त। मोपा मेको आसाहेल साइशो आ पबर्म बेक्माक्त। १राजा २:५; २सामुएल २:२३ २८मिनु नोले दाऊदम मेको लोव्र नेशा “गो नु आं राज्य परमप्रभु यावे आ डोंइती गेनायो नेर आ तौ आब्नेर साइशो आ पबर्म दोस मताइब दुम्नीकी। २९मेको दोस योआब नु आ आफ आ खिं डा मुर आन पियाम दुम्ल। योआब आ खिंम ग्रांग्रा यितीके रोइ पाइब कि कोव्र मुशो रोइ पाइब कि कोक्के तिवशा गाक्ब कि तरवारम साइक्चा पुंडसीब कि जचा मताइब मुर का गेना हना यो बाक्ल” देंमाक्त। ३०मोपा योआब नु आ लोकब अबीशैमी आब्नेर कली सदसे बाक्त। मारदे हना आब्नेरमी मेको आस लोकब आसाहेल कली गिबोन डा लडाइम साइशो बाक्माक्त। न्यायाधीस ८:१८-२१; २राजा १४:५

३१मिनु दाऊदमी योआब नु आ नु बाक्ब नेल्ल आन कली “इन वा खाक्कीन। मिनु भाडग्रा फेक्सीन। मिनु आब्नेर आ पबर्म रोंका पने” देंमाक्त। मिनु पिप दाऊद बेक्शो आब्नेर कुरब आन नोले गाक्माक्त। ३२मिनु आब्नेर कली हेब्रोनम थिम्मे बाक्त। मिनु पिप आब्नेर आ तुरसुम ठेयब सेंदा पा डाक्माक्त। मिनु मुर नेल्ल यो डाक्मा बाक्त। ३३मिनु पिपमी आब्नेर आ पबर्म रोंका पशो कुम्सो सेला बाक्त। मेकोमी “मार, आब्नेर परमप्रभु यावे आ अरेशो मटीब खोदेशो दुम्शा, बेक्चा माल्दा? ३४इ गुइ मफ्रेंशो बाक्त। इ खोइलीम साङ्लो मपाइशो बाक्त। गो परमप्रभु यावे आ अरेशो मटीब आन डोंइती मेकोपुकी खोदेशो पा गोल्टे” देंमाक्त। मिनु मुर नेल्ल मेको आ पबर्म

लेंशा डाक्मा बाक्त। ३५मिनु मुरपुकीमी दाऊद कली “नां लाक्चा डोंइती जने” देंमाक्त। तन्न दाऊदमी कसम जशा “नां मलाक्गा सम्म गो मारेइ जचा थोव्रक मथीनुड। थीता हना, परमप्रभुमी सजाइ गेयील” देंमाक्त। ३६मुर नेल्लेम मेको लोव्र रुप्शा बिस्समा बाक्त। मिनु ग्येरसमा बाक्त। पिप आ पशो नेल्ल दाक्तमे बाक्त। ३७मेको नाक्ती इस्राएल डा मुर नेल्लेमी नेर आ तौ आब्नेर साइशोमी पिप आ दोस मबा, दे तुइक्तमे बाक्त। ३८मिनु पिपमी आ गेय पाइब आन कली “मुलाक्ती इस्राएलमी लडाइ पाइब नु ठेयब मुर का बेक्त, दे तुइक्चा माल्नीनी। १सामुएल २६:१५ ३९गो तेल लुक्शो पिप दुम्ती हना यो, मुलाक्ती सक्ति मपाइशो दुम्शो बाक्नुड। एको हुश खाक्श पोक्ब सेरूयाह आ तौ गो नु मगारनीम। परमप्रभु यावेमी मरिम्शो पाइब आन कली आन पशो क्येक्क लेप्ब” देंमाक्त। २सामुएल २:१८

इश-बोशेथ साइक्चा पुंडसीशो

४ सावल आ तौ इश-बोशेथम हेब्रोनम आब्नेर साइशो लोव्र नेशा आ थुं लुक्च लमाक्त। मिनु इस्राएली नेल्ल हिंशा ग्येत्थ लुक्च दुम्मा बाक्त। २सामुएल ३:२७ २सावल आ तौ के मार मार रोइक्ब आन हुल डा कप्तान निक्शी बाक्सा बाक्त। मेको का आ नें बानाह नु अर्को आ नें रेकाब बाक्माक्त। मेको बेयरोथ सहर डा बेन्यामीन आ थर डा रिम्मोन आ तौ बाक्सा बाक्त। मारदे हना बेयरोथ यो बेन्यामीन आ रागीम बाक्माक्त। यहोसु ६:१७ ३मिनु बेयरोथ सहर डा मुर गित्ताइम सहर प्रोक्शा लशो बाक्मा

बाक्त। मिनु मेना रे मेकेर अर्को रागी डा मुर दुम्शा बाक्मा बाक्त। *नेहेम्याह ११:१३*

४ मिनु सावल आ तौ योनाथन के यो तौ का बाक्माक्त। मेको खोइल निम्फा मदुकब बाक्माक्त। मेको ५ बर्स दुम्मेनु, सावल नु योनाथन बेक्ताक्स देशो लोत्र येजेल रे नैसे बाक्त। मेको लोत्र नेशा आ खाल पाइब मीश मुरुमी मेको कली कुरशा प्रोकमेनु, थिश्शा मेको आल आ खोइल मदुकब दुम्शो बाक्माक्त। मेको आ नें मेफी-बोशेथ बाक्माक्त। *मेफी-बोशेथ आ नें मेरीब-बाल नु इश-बोशेथ देनीम। २सामुएल ६:३; १इतिहास ८:३४; १इतिहास ६:४०*

५ बेयरोथ सहर डा मुर रिम्मोन आ तौ निक्शी रेकाब नु बानाह नाक्ती उइक्थ दुम्मेनु, इश-बोशेथ आ खिंम जाक्सा बाक्त। मेना इश-बोशेथ इप्शो बाक्माक्त। *२सामुएल २:८* ६ मेको निक्शी चेरब लाइक्चशो खोदेशो पखु पा, खिं ओव्रसा बाक्त। मिनु मेको कली कोव्रजम तूशा सदसे बाक्त। मिनु रेकाब नु आ लोक्ब बानाह सुइम मतुइक्थु प्रोक्सा बाक्त। ७ मेको निक्शीमी इश-बोशेथ कली दोपा सदसे बाक्त देशा हना, इश-बोशेथ इप्शा बाक्शो कोठा ओव्रशा, मेको कली तूशा साइश्शा आ पिया खोइश्शा लदसे बाक्त। मिनु नाक्दो रे अराबाह रे गाक्शा, हेब्रोन जाक्सा बाक्त। ८ मिनु मेको निक्शीमी मेको पिया दाऊद आ बाक्तीक हेब्रोनमी चाक्गसे बाक्त। मिनु पिप कली “सावल आ तौ इश-बोशेथ आ पिया एको बाक्ब। इन कली साइक्चा माल्ब इन सत्रु बाक्त। मुलाक्ती परमप्रभु यावेमी सावल नु आ चच युइ आन कली क्येक्क लेत्ताक्व” देसा बाक्त।

९ मिनु दाऊदमी बेयरोथ सहर डा रिम्मोन आ तौ रेकाब नु बानाह आस कली “परमप्रभु यावे ब्रोंइशा बाक्शो खोदेशो पा, मेकोमी आं कली आं श्येत नेल्ल रे प्रोंइती। १० “सावल बेक्शो रिम्शो लोत्र बाक्ब’ दे मिम्शा आं कली देंब मुर कली गो ग्याइश्शा सिकलागमी साइक्ता। मेको आ लोत्र आ इनाम बाक्त। *२सामुएल १:१५* ११ मिनु परमप्रभु यावे आ अरेशो मटीब मुरुमी ठीक पाइब मुर कली आ आंम खिंम बाक्शा, इप्तीकेम इप्शो मुर कली साइक्ब आस कली मेको क्येडा यो क्येक्क लेत्चा ममाल्नुडा डा? मार, मुल गो मेको आ हुश आ क्येक्क लेशशा इस कली साइश्शा, रागी रे मक्याम्नुडा?” देमाक्त। *२सामुएल ३:३२* १२ मिनु दाऊदम ठिटा मुर आन कली “मेको आस कली सतीन” दे अरेवा बाक्त। मिनु मेको आस कली सदमे बाक्त। आस गुइ खोइल खोइश्शा, हेब्रोन डा दोम्ली आ नेक्था क्युकगमे बाक्त। मिनु मुरपुकीमी इश-बोशेथ आ पिया लाइश्शा, आब्नेर आ तुरस हेब्रोनमी थिम्मे बाक्त। *ब्यवस्था २१:२२-२३*

दाऊद पिप दुम्शो

१इतिहास ११:१-३

५ मिनु नोले इस्राएल आ थर डा मुर नेल्ल दाऊद आ बाक्तीक हेब्रोनम जाक्शा, मेको कली “गो इन हुश नकी। २ डोंइती सावल आंइ पिप बाक्मेनु, गे लडाइ पाइब आन कली लाइक्तीक नु चाक्तीक पशो ननी। परमप्रभु यावेमी इन कली “गे आं मुर इस्राएली आन गोठला दुम्चा माल्नेवे। गे इस्राएली आन पिप दुम्नेवे’ देशो बाक्ब” देमा

बाक्त। १सामुएल १८:१३,१६; १सामुएल १३:१४; १सामुएल २५:३० ३मिनु इस्राएल डा खाल्पा नेल्ल पिप आ बाक्तीक हेब्रोनम जाक्मा बाक्त। मेकेर पिप दाऊदमी मेकोपुकी नु परमप्रभु यावे आ डोंइती कबल का पवा बाक्त। मिनु मेकोपुकीम दाऊद कली तेल लुकशा, इस्राएल डा पिप सेल्मे बाक्त। २सामुएल २:४; १सामुएल १६:१३ ४दाऊद ३० बर्स दुम्मेनु, पिप दुम्माक्त। मिनु मेकोमी ४० बर्स सासन पवा बाक्त। १राजा २:११; १इतिहास ३:४; १इतिहास २६:२७ ५मेकोम हेब्रोनम बाक्शा, यहूदा कली ७ बर्स ६ महिना सासन पवा बाक्त। मिनु यरूसलेम सहरमी बाक्शा ३३ बर्स इस्राएल नेल्ल नु यहूदा कली सासन पवा बाक्त।

दाऊदमी यरूसलेम प्राशो

१इतिहास ११:४-६; १इतिहास १४:१-७

६नोले पिप दाऊद नु आ मुरपुकी, यरूसलेम सहरम बाक्ब यबुसी नु लडाइ पचा कली यरूसलेम लमा बाक्त। मिनु यबुसीपुकीम दाऊद कली “गे एक जाक्ने मचाप्नीनी। मिक्च मताइब नु खोइल मदुकबम यो इन कली प्रोकपाइक्नीम” देंमा बाक्त। मोपा दाऊद जाक्ने मचाप्ब, दे मिम्तमे बाक्त। यहोसु १५:६३; न्यायाधीस १:२१; न्यायाधीस १६:१०-१२ ७मो हना यो दाऊदमी गारो हिरशो सियोन ग्रामाक्त। मिनु मेको दाऊद आ सहर दुम्माक्त। ८मेको नाक्त दाऊदमी “सुम यबुसी आन कली साइक्बा, मेकोम ब्वाक्कु यितीक रे जाक्शा, दाऊद कली प्रांग्रा दीब मिक्च मताइब नु खोइल मदुकब आन कली सदमेकल” देंमाक्त। मोपतीके “मिक्च मताइब नु खोइल मदुकब पिप आ खिं ओव्रचा मताइनीम” देंशो बाक्मा बाक्त।

९मिनु दाऊद मेको गारो हिरशो सहरम बाक्शा, मेको आ नें दाऊद आ सहर वोदा बाक्त। मिनु दाऊदमी मिल्लो रे पा आगा एर ओंथ नेल्ल सहर सेला बाक्त। १०मिनु दाऊद शुश ठेयब दुम्ना दुम्न लमाक्त। मारदे हना परमप्रभु यावे मुर नेल्ल आन परमप्रभु मेको नु बाक्माक्त। २सामुएल ३:३

११टायर डा पिप हीराममी आ लोव्र कुरब आन कली दाऊद आ बाक्तीके सोइक्ता बाक्त। हीरामम लेबानोन डा लाइशो रवा आ शी नु शी सेल्ब नु गारो प्रोव्रब यो सोइक्ता बाक्त। मिनु मेकोपुकीम दाऊद कली खिं का सेल्मे बाक्त। १२मिनु दाऊदमी “परमप्रभु यावेम आं कली इस्राएल डा सक्ति पाइशो पिप सेल्यी बाक्त। मिनु आ मुर इस्राएली आन पर्वम मेको आन राज्य ठेयब सेला बाक्त” दे तुइक्ता बाक्त।

१३दाऊद हेब्रोन रे यरूसलेम याक्से नोले मेकोमी मेकेर शुश मीश चाक्गा बाक्त। मेको के अर्को तमी तौ यो जरमेसमा बाक्त। २सामुएल ३:२-५; १इतिहास ३:५-६ १४यरूसलेम सहरम जरमेशो दाऊद आ तौपुकी शम्मुआ, शोबाब, नाथान, सोलोमन, लूका ३:३१; मती १:६ १५इभार, एली-शुआ, नेफेग, याफीया १६एली-शामा, एली-आदा नु एली-फेलेत बाक्मा बाक्त।

दाऊदम पलिस्ती आन कली फ्रुशो

१इतिहास १४:८-१७

१७पलिस्तीपुकीम दाऊद इस्राएल डा पिप दुम्त देंशो लोव्र नेन्मे बाक्त। मिनु पलिस्ती नेल्ल लडाइ पाइब लाइशो, दाऊद कली माल्थ लमा बाक्त। तन्न दाऊदम मेको लोव्र नेंशा उइ डा बोल्यो

दरवार लशा बाक्माक्त। *१सामुएल २२:१; २सामुएल २३:१४* **१८**मिनु पलिस्तीपुकी जाक्शा, रेफाइम डा बेंसीम ब्रशा बाक्मा बाक्त। *यहोसु १५:८; यहोसु १८:१६* **१९**मिनु दाऊदमी परमप्रभु यावे कली “गो पलिस्ती आन कली लडाइ तोतामी हना, गे मेको आन कली आं गुइमी गेनीनी?” दे हिल्लो पवा बाक्त। मिनु परमप्रभु यावेमी “लावो, गो थमा पा मेको आन कली इ गुइम गेनुड” देंमाक्त। *१सामुएल ३०:८* **२०**मिनु दाऊद लशा, बाल-पेराजीमम लडाइ तोमी बाक्त। मिनु मेको आन कली ग्रामाक्त। मिनु दाऊदमी “बारशो ब्वाक्कुम आ एर ओंथ प्रेशशो खोदेशो पा, परमप्रभु यावेम आं जोरी सत्रु आन कली फ्रुप्तु” देंमाक्त। मोपतीके मेकेर बाल-पेराजीम नें लीमाक्त। *यसैया २१:२८* **२१**पलिस्तीपुकीम आन मूर्तिं मेक उइ प्रोन्मे बाक्त। मिनु दाऊद नु आ मुरपुकीमी मेको लदमे बाक्त।

२२मिनु लेंशा पलिस्तीपुकी जाक्शा रेफाइम डा बेंसीम ब्रशा बाक्मा बाक्त। **२३**मिनु दाऊदम लेंशा परमप्रभु यावे कली हिल्लो पवा बाक्त। मिनु परमप्रभु यावेमी “मुल सोजो लडाइ मपावो। हिरशा, ठेयब रवा आ आइक्ची हांबु नोले रे लडाइ पावो। **२४**रवा आन डरम लडाइ पाइब आन दोरशो नेंनी चोटी होस पावो। मारदे हना परमप्रभु यावे पलिस्ती आन कली फ्रुचा कली इ डोंइती गाक्ब” देंमाक्त। **२५**मिनु दाऊदमी परमप्रभु यावेम आ कली देशो खोदेशो पा पवा बाक्त। मिनु पलिस्ती आन कली गेबा रे गेजेर सहर डा लां सम्म शोल्मो पा सदमे बाक्त। *न्यायाधीस १:२६*

परमप्रभु आ सन्दोस चाक्शो

१इतिहास १३:३; १इतिहास १५:१६

६मिनु दाऊदमी इस्राएल डा ३० हजार योव्रशो मुर आन कली खुप्तीमी बाक्त। **२**मिनु दाऊद नु मेको मुर नेल्ल परमप्रभु आ सन्दोस चाक्चा कली यहूदा डा बाले सहर रे लमा बाक्त। मेको सन्दोस तार आ नें बाक्त। मुर नेल्ल आन परमप्रभु यावे आ नें मेकेर बाक्ब। मेको करूब आस दातेम बाक्ब। *बाले सहर आ अर्को नें किरयथ-यारीम बाक्त। यहोसु १५:६ प्रस्थान २५:२२* **३**मेकोपुकीम परमप्रभु आ सन्दोस डांडाम बाक्शो अबीनादाब आ खिं रे गुंइशा, नक बग्गी काम वोदमे बाक्त। अबीनादाब आ तौ निक्शी उज्जाह नु अहीयोमी मेको नक बग्गी खुल्ना खुल्न लदसे बाक्त। *१सामुएल ७:१* **४**मेकोपुकीम परमप्रभु आ सन्दोस डांडाम बाक्शो अबीनादाब आ खिं रे लदमे बाक्त। अहीयो चहिं मेको बग्गी आ डोंइती गाक्माक्त। **५**मिनु दाऊद नु इस्राएली नेल्ल आन जोंब बोक्शा परमप्रभु यावे आ डोंइती कुम्सो पना पन बीना, तार पाइशो ठेयब ताप्तीक, खैजडी, मार मार ताप्तीक नु बुप्केल ताप्शा सिल पना पन गाक्मा बाक्त। **६**मेकोपुकी नाकोन आ खलाम जाक्मानु, ब्यफ दाइल पांडससा बाक्त। मिनु उज्जाहम आ गुइ दिंशा, परमप्रभु आ सन्दोस तिकगा बाक्त। **७**मिनु परमप्रभु यावे उज्जाह कली तशा, गाइक्ता बाक्त। मिनु परमप्रभुमी मेको आ गुइ दिंशा, सन्दोस थिशो तशा, आ सन्दोस आ नेक्था उइ सदा बाक्त। *१सामुएल ६:१६; गन्ती ४:१५* **८**मिनु दाऊद गाइक्ता बाक्त।

मारदे हना परमप्रभु यावेम उज्जाह आ पर्बम गाइशशा, मेको कली सदा बाक्त। मोपतीके मेकेर पेरेस-उज्जा नें वोदा बाक्त। मेको आ नें मुल सम्म मेकोन बाक्ब। ६मेको नाक्ती दाऊद परमप्रभु यावे क्येडा हिंमाक्त। मिनु “मुल गो परमप्रभु यावे आ सन्दोस दोपा लाइक्नुडा?” देंमाक्त। १०मिनु दाऊदमी परमप्रभु यावे आ सन्दोस आ बाक्तीके, दाऊद आ सहर, लाइक्ने मचबा बाक्त। मिनु आ खिं डा मुर, ओबेद-एदोम आ खिंमी चाक्दीदा बाक्त। ११मोपा परमप्रभु यावे आ सन्दोस ओबेद-एदोम आ खिंमी महिना सां सम्म बाक्माक्त। मिनु परमप्रभु यावेमी गित्त आ खिं डा ओबेद-एदोम नु आ खिं डा मुर नेल्ल आन कली आसीक गेमी बाक्त।

सन्दोस यरूसलेमम चाक्शो

१२मिनु मुरपुकीमी दाऊद कली “परमप्रभु यावेमी, परमप्रभु आ सन्दोस वोइशशो आ पर्बम ओबेद-एदोम आ खिं डा मुर नु आ मारेइ मारेइ आन कली आसीक गेप्तु” दे मदमे बाक्त। मिनु दाऊद लशा, ओबेद-एदोम आ खिं रे थाम्पा ग्येरसीशा, मेको परमप्रभु आ सन्दोस आ सहरमी चाक्गा बाक्त। १३परमप्रभु यावे आ सन्दोस कुरब मुर ६ पैला गाक्शा नोले, मेकोपुकीम ब्यफ का नु दोम्शो बाछा का क्योरशा चढेमे बाक्त। १४दाऊदम सुती के ऊरीम नु थुम्मीम कुरतीके पांइशा, परमप्रभु यावे आ डोंइती आ जोंब बोक्शा सिल पवा बाक्त। प्रस्थान २८:६; १सामुएल २:१८; १सामुएल २२:१८ १५मिनु दाऊद नु इस्राएल

आ खिं डा मुर नेल्ल रेयके पना पन तुराही ताम्ना ताम्न परमप्रभु यावे आ सन्दोस चाक्गमे बाक्त।

१६मिनु परमप्रभु यावे आ सन्दोस दाऊद आ सहरमी चाक्गमेनु, सावल आ तमी मिकालमी भेल रे कोवडा बाक्त। मिनु पिप दाऊद कली परमप्रभु यावे आ डोंइती प्रेक्ना प्रेक्न, सिल पशो तशा, आ थुंमी ग्रांगा दिमाक्त। १७मिनु मेकोपुकीम परमप्रभु यावे आ सन्दोस वोइक्चा कली दाऊदम कीशो ताम्बुम ओंइदमे बाक्त। मिनु दाऊदमी परमप्रभु यावे आ डोंइती चोशा चढेतीक नु दुशा बाक्चा आ पर्बम चढेतीक चढेवा बाक्त। १८दाऊदमी मेको चोशा चढेतीक नु दुशा बाक्चा आ पर्बम चढेतीके चढेने थुम्शा, मुर नेल्ल आन परमप्रभु यावे आ नेमी आ मुर नेल्ल आन कली आसीक गेमी बाक्त। १९राजा ८:५५ १६मिनु दाऊदमी इस्राएली नेल्ल आन कली नु मेकेर देल्शो मीश मुर, वोंइश मुर नेल्ल आन कली शोब्ले का का, चोकटा का का श्ये, सोव्रशो अडगुर शोब्ले गेमी बाक्त। मिनु मुर नेल्ल आन खिं खिं लेम्मा बाक्त।

२०मिनु दाऊद आ खिं डा मुर आन कली आसीक गेथ लेम्मेनु, सावल आ तमी मिकाल मेको कली गुम्थ लाङगा गूशा पिमाक्त। मिनु मेकोम “मुलाक्ती इस्राएल डा पिप थम ठेयब मिम्सीशो बाक्त। मेको मुलाक्त आ गेय पाइब वाइलीम आन डोंइती शिशा दुम्शा, मुने मपाइशशो आइक्च मुर खोदेशो दुम्त” देंमाक्त। २१मिनु दाऊदम मिकाल कली “इ आफ नु आ खिं डा मुर आन पा डा आं कली इस्राएल डा आ मुर आन पिप सेल्ब परमप्रभु यावे आ डोंइती मो पाता।

गो परमप्रभु यावे आ डोंइती ग्येरशा सिल पाइनुड। *२सामुएल ५:२* **२२**गो थमा पा मुल यो मेको क्येडा यो आइकच दुम्नुड। तन्न मेको आं वाइलीम आन पर्बम गे मार देने, मेकोपुकीमी आं कली मो पशो आ पर्बम मान पाइनीम” देंमाक्त। **२३**मोपतीके मेको सावल आ तमी मिकाल के आ बेकची नाक्त सम्म तमी तौ मदुम्मा बाक्त।

परमप्रभुमी दाऊद नु लोत्र पशो

१इतिहास १७:-

७ मिनू पिप आंम खिम बाक्म नोले, परमप्रभु यावेम मेको कली आ एर ओंथ डा जोरी सत्रु नेल्ल आन रे नाइकचा गेवा बाक्त। **२**मिनू पिपमी परमप्रभु यावे आ लोत्र पाइब नाथान कली “कोत्रडीन। गो लेबानोन डा लाइशो रवा आ शी के सेल्शो खिम बाक्शो बाक्नुड। तन्न परमप्रभु आ सन्दोस चहिं ताम्बुम बाक्ब” देंमाक्त। *भजन संग्रह १३२:३-५* **३**मिनू नाथानमी पिप कली “दुम्ब, इन थुंम मार बाक्मे, मेको पने। मारदे हना परमप्रभु यावे गे नु बाक्ब” देंमाक्त।

४तन्न मेको नाक्दोन परमप्रभु यावेम नाथान कली लोत्र पवा बाक्त। **५**मार लोत्र पवा बाक्त देशा हना “गे लशा, आं गेय पाइब दाऊद कली ‘गे आं कली बाक्चा कली खिं सेल्नेवे डा? *१इतिहास २२:८; १राजा ५:१७* **६**गो इस्राएली आन कली इजीप्त रे चाक्गुमी रे मुल सम्म गेनायो खिम मबाक्ड। ताम्बु नु अरु बाक्तीकेम बाक्ती। *१राजा ८:१६, २७; यसेया ६६:१* **७**गो इस्राएल डा आं मुरपुकी नु ते ते गाक्डा, मेक मेक मार आं मुर इस्राएली आन कली कोत्रब, आन थर डा ठेयब मुर आन कली आं कली

लेबानोन डा लाइशो रवा आ शी के खिं मारदे मसेल्नी’ देंडा डा? **८**मोपतीके गे आं गेय पाइब दाऊद कली मुर नेल्ल आन परमप्रभु यावेमी मार देंत देंशा हना “इ कली, आं मुर इस्राएली आन कली कोत्रब दुम्पाइक्चा कली भेडा योत्रतीक रे चाक्तन। *१सामुएल १६:११-१३; २सामुएल ५:२* **९**गे ते ते गाक्डे, मेक मेक गो गे नु बाक्ती। गो इ जोरी सत्रु नेल्ल आन कली इ डोंइती रे खेरतामी। गो इ नें रागी डा ठेयब मुर आन नें खोदेशो पा ठेयब सेल्नुड। **१०**गो आं मुर इस्राएली आन कली बाक्तीक का योत्रनुड। मिनू मेकोपुकी आंम आंम रागीम बाक्नीम। मुल रे मेको आन कली सुइम श्येत मगेनीम। डोंइती डा खोदेशो पा मुल रे मेको आन कली सुइम मरिम्शो मपाइनीम, श्येत मगेनीम। **११**आं मुर इस्राएली आन कली निसाफ पाइब योत्रशो रे गो इ कली इ जोरी सत्रु नेल्ल रे नाइक्पाइक्नन। मिनू परमप्रभु यावेमी इ कली चच युइ गेब’ दे मतो” देंमाक्त।

दाऊदम आसीक तशो

१२परमप्रभु यावेम दाऊद कली “इ नाक्त नुप्त हना नु इ किकी पिपी नु बाक्थ लचा नोले गो इ खिं डा मुर आन दाते रे का कली इ पा डा पिप सेल्नुड। मिनू मेको आ राज्य बोल्यो सेल्नुड। *१राजा ८:२०* **१३**मिनू मेकोमी आं नेंमी खिं का सेल्ब। गो मेको आ राज्य गेना हना यो बाक्ब सेल्नुड। *१राजा ५:१६; १राजा ६:१२; भजन संग्रह ८६:४-५; यसेया ६:६* **१४**गो मेको आ आफ दुम्नुड। मिनू मेको आं तौ दुम्ब। मेकोम मरिम्शो पाप्तु हना, गो मेको कली मुर खोदेशो पा कोक्केम तुप्नुड।

भजन संग्रह २:७; भजन संग्रह ८६:२७; लूका १:३२; हिब्रू १:५ १५ तन्न गो गेना हना यो आं दाक्तीकेम मप्रोंडनुड। मेको इ डोंइती सावल कली प्रोंइशो खोदेशो पा मेको कली मप्रोंडनुड। १ सामुएल १५:२३-२६ १६ इ खिं नु इ राज्य गेना हना यो आं डोंइती लीब। इ सासन पतीक गेना हना यो लीब” देंमाक्त। भजन संग्रह ७२:३; यसैया ५५:३ १७ मिनु नाथानम मेको देंशो लोव्र नु कोंइशो नेल्ल दाऊद कली देंमाक्त।

दाऊदम परमप्रभु कली ठेयब सेल्शो

१८ मिनु पिप दाऊद परमप्रभु यावे आ बाक्तीक ओव्रशा, मेको कली “परमप्रभु यावे, गो सु नडा? आं खिं डा मुर सु बाक्नीमी? मिनु गे आं कली एक सम्म चाक्नीनी? १६ आं कली पशो इन डोंइती आइक्च बाक्ब। गे इन गेय पाइब आ खिं आ पबर्म नोले दुम्ब लोव्र यो पाइतीनी। परमप्रभु यावे, मेको इन मुर आन कली अरेशो लोव्र बाक्ब। २० परमप्रभु यावे, मुल गो एको क्येडा शुश मार देंने चाप्नुडा डा? मारदे हना गे इन गेय पाइब कली रिम्शो पा तुइक्नीनी। २१ गे इन थुंम मिम्शा, थोक्शा पशो लोव्र इन गेय पाइब, आं कली तुइक्पाइक्चा कली मोदेशो ठेयब गेय पाइतीनी। २२ मोपतीके परमप्रभु यावे, परमप्रभु गे ठेयब बाक्नीनी। इन खोदेशो अरु सुइ मबाक्नीम। अर्को परमप्रभु यो मबाक्नीम। २३ इन मुर खोदेशो अर्को सु बाक्नीमी? इस्राएली खोदेशो सु बाक्नीमी? रागी नेल्लेमी परमप्रभुम प्रोंइशो इस्राएली खोदेशो अर्को जात यो बाक्मा कों? गे इन नें ठेयब सेल्चा कली गे इन मुर आन कली ठेयब नु छक लाक्चा डा गेय पाइतीनी। गे इन मुर आन

डोंइती रे रागी रागी डा मुर नु आन देवी देवता आन कली खेरतीनी। ब्यवस्था ४:७ २४ गे इन मुर इस्राएली आन कली गेना हना यो इन मुर दुम्पाइक्चा कली बोल्यो सेल्तीनी। मिनु परमप्रभु यावे, गे मेको आन परमप्रभु दुम्तीनी। २५ परमप्रभु यावे, मुल परमप्रभु, इन गेय पाइब नु मेको आ खिं डा मुर आन पबर्म देंशो गेना हना यो खपीन। इन थोक्शा पशो लोव्र खोदेशो पा पने। २६ मुर नेल्ल आन परमप्रभु यावे इस्राएली आन परमप्रभु बाक्ब। मिनु इन गेय पाइब दाऊद आ खिं गेना हना यो इन डोंइती लीब, दे इन नें गेना हना यो ठेयब सेल्नीम। २७ मारदे हना गे, मुर नेल्ल आन परमप्रभु यावे, इस्राएल आ परमप्रभु, इन गेय पाइब कली ‘गो इ खिं सेल्नुड’ देंतीनी। गो महिंथु, एको लोव्र पाता। यसैया ५०:५ २८ परमप्रभु यावे, गे परमप्रभु बाक्नीनी। इन लोव्र थमा बाक्ब। गे इन गेय पाइब कली रिम्शो थोक्शा पशो लोव्र पाइतीनी। १ राजा ८:२६ २६ मोपतीके मुल इन गेय पाइब आ खिं कली आसीक गेने। मिनु मेको इन डोंइती गेना हना यो लील। परमप्रभु यावे मेको गे पाइतीनी। मिनु इन आसीकमी इन गेय पाइब आ खिं गेना हना यो आसीक राइब” दे परमप्रभु कली पुना बाक्त।

दाऊद आ पशो नु ग्राशो लडाइ

१ इतिहास १८:१-१३

मिनु इक्का नोले दाऊदमी पलिस्ती आन कली लडाइ तोशा ग्रामाक्त। दाऊदमी मेथेग-आम्माह सहर आंम के सेला बाक्त। २ दाऊदम मोआबी आन कली यो फुवा बाक्त। मिनु मेको आन कली खपीम इप्पाइक्मी बाक्त। मिनु

डोरी कामी थाप्शा भाग सां सेल्मी बाक्त। भाग निक्शी डा मुर आन कली साइक्मी बाक्त। मिनु भाग का डा मुर आन कली प्रॉइमी बाक्त। मिनु मोआबीपुकी मेको आ वाइल दुम्मा बाक्त। मिनु मेकोपुकीम दाऊद कली तिरो थाप्चा माल्मा बाक्त।

१ सामुएल २२:३

३ मिनु दाऊद युफ्रेटीस खोला आ नेक्थाम आ अधिकार वोइक्चा कली लमेनु, सोबाह सहर डा रेहोब आ तौ पिप हादादेजेर कली यो लडाइ पा ग्रामाक्त।

४ दाऊदम मेको रे हजार का ७ सहे शारा डोइक्बपुकी नु २० हजार जना खोइलीम गाक्ब लडाइ पाइब आन कली ग्याइक्तीमी बाक्त। मिनु दाऊदम बग्गी कीब शारा आन नारी खोदा बाक्त। मिनु आंम कली सहे का शारा बग्गी कीचा कली वोदा बाक्त। यहोसु ११:६

५ मेना दमस्कस डा अराम डा मुर सोबाह सहर डा पिप हादादेजेर कली वारच पाइक्चा कली जाक्मा बाक्त। मिनु दाऊदम मेको आन दाते डा २२ हजार अरामी आन कली साइक्मी बाक्त। ६ मिनु दाऊदम मेको अराम डा मुर आन रागी दमस्कसम कोव्रब मुर वोइक्मी बाक्त। मिनु मेकोपुकी दाऊद आ वाइल दुम्शा, तिरो थाप्चा माल्मा बाक्त। मोपा परमप्रभु यावेम दाऊद ते ते गाक्मे, मेक मेक ग्रापदा बाक्त। ७ हादादेजेर आ गेय पाइब आन कुरशो सुन के तेक्तीके दाऊदम आइक्के सेला बाक्त। मिनु मेको यरूसलेम सहरम चाक्गा बाक्त। ८ मेकोमी हादादेजेर आ सहर, बेताह नु बेरोथाइ सहर रे शुश कांसा चाक्गा बाक्त।

९ मिनु हमथ डा पिप तोइमी “दाऊदम हादादेजेर आ लडाइ पाइब नेल्ल आन

कली फ्रुप्तु” देशो नेना बाक्त। १० मिनु पिप तोइमी आ तौ योराम कली दाऊद कली ग्रुम्थ सोइक्ता बाक्त। मिनु मेकोमी दाऊद कली “गे लडाइम हादादेजेर कली फ्रुशा रिम्शो पाइतीनी” देख नु मान पा ठेयब सेल्तीक लोत्र पथ सोइक्ता बाक्त। मारदे हना हादादेजेर नु तोइ आस दातेमी लडाइ दुम्ना दुम्न बाक्शो बाक्माक्त। योराममी सुन चांदी नु कांसा के ग्योंब यो चाक्गा बाक्त। ११ पिप दाऊदमी मेको यो परमप्रभु यावे कली गेवा बाक्त। आ फ्रुशो रागी नेल्ल डा सुन चांदी मोपा गेबाक्माक्त। १२ एदोम, मोआब, अम्मोन पलिस्ती नु अमालेक रे चाक्शो सुन चांदी, सोबाह सहर डा रेहोब आ तौ पिप हादादेजेर रे रोइश्शो मारेइ मारेइ परमप्रभु यावे कली गेवा बाक्त।

१३ दाऊद लडाइ ग्राशा, आ नें चेम्शा लेम्मेनु, हिक्सी बाक्शो बेंसीम १८ हजार एदोम डा मुर आन कली साइक्मी बाक्त। भजन संग्रह ६०:२ १४ मेकोमी एदोम रागी नेल्लेम कोव्रब मुर वोइक्मी बाक्त। मिनु एदोम डा मुर नेल्ल दाऊद आ वाइल दुम्मा बाक्त। मोपा परमप्रभु यावेम दाऊद ते ते लमे, मेक मेक ग्रापदा बाक्त।

उत्पत्ती २७:४०; गन्ती २४:१८

दाऊद आ गेय पाइबपुकी

१ इतिहास १८:१४-१७

१५ मिनु दाऊदमी इस्राएल रागी नेल्लेम सासन पवा बाक्त। मिनु आ मुर नेल्ल आन कली ठीक निसाफ पवा बाक्त। १६ सेरूयाह आ तौ योआब लडाइ पाइब आन ठेयब मुर बाक्माक्त। अहीलुद आ तौ येहो-शाफात मेको आ ब्रेक्ब बाक्माक्त। २ सामुएल २:२३-२६ १७ अहीलुद

आ तौ सादोक नु अबीयाथार आ तौ अहीमेलोक चढ़ेब बाक्सा बाक्त। सेरायाह ब्रेक्ब बाक्माक्त। १८येहो-यादा आ तौ बेनायाह, केरेथी नु पेलेथी, पिप कली कोत्रब आन ठेयब मुर बाक्माक्त। दाऊद आ तौपुकी चहिं चढ़ेब बाक्मा बाक्त। २सामुएल १५:१८

दाऊदमी शिशी पशो

६ मिनु दाऊदमी “मार, सावल आ खिं डा मुर सुइ ब्रोंडशो बाक्नीमी? मेको आन कली गो योनाथन आ पर्बम शिशी पाइक्ने चाप्नुडा?” दे हिल्लो पवा बाक्त। २सावल आ खिं डा सीबा नें पाइशो गेय पाइब मुर का बाक्माक्त। दाऊदम मेको कली ब्रेथ सोइक्ता बाक्त। मिनु पिपमी मेको कली “मार, गे सीबा नवे” देंमाक्त। मिनु मेकोम “ओं, गो इन गेय पाइब सीबा नड” देंमाक्त। २सामुएल १६:१ ३मिनु पिपमी “सावल आ खिं डा सुइ ब्रोंडशा लीशो बाक्नीमी? गो मेको कली परमप्रभु आ दाक्तीक कोइचा दाक्नुड?” देंमाक्त। मिनु सीबाम पिप कली “योनाथन आ तौ का ब्रोंडशा लीशो बाक्ब। मेको आ खोइल निम्फा मदुक्ब बाक्ब” देंमाक्त। ४मिनु पिपमी मेको कली “मेको ते बाक्म?” दे हिल्लो पवा बाक्त। मिनु सीबामी “मेको लो-देबार सहर डा अम्मीएल आ तौ माकीर आ खिंम बाक्ब” देंमाक्त। २सामुएल १७:२७

५मिनु पिप दाऊदमी लो-देबार डा अम्मीएल आ तौ माकीर आ खिंम मुर सोइशो मेको कली चाक्पदा बाक्त। ६मिनु योनाथन आ तौ सावल आ चच मेफी-बोशेथ दाऊद आ बाक्तीके जाक्माक्त। मिनु मेकोमी खुम्की पा बाप्शा

पिप कली सेउ पवा बाक्त। मिनु दाऊदम मेको कली “मेफी-बोशेथ” देंमाक्त। मिनु मेफी-बोशेथमी “गो इन गेय पाइब एक बाक्ती” देंमाक्त। ७मिनु दाऊदम मेको कली “महिंनो, गो इ कली इ आफ योनाथन आ पर्बम शिशी पाइक्नुड। गो इ कली इ बाजे सावल आ रू नेल्ल लेशशा गेनन। मिनु गे गेना हना यो गो नु बाक्शा जाइनेवे” देंमाक्त। ८मिनु मेफी-बोशेथम खुम्की पा बाप्शा “गो सु नडा डा? पिपमी गो बेक्शो कुचुम खोदेशो मुर, आं कली शिशी पाइय्यीनी?” देंमाक्त। ९मिनु दाऊदमी सावल आ गेय पाइब सीबा कली ब्रेशशा “सावल नु आं खिं डा शोंप नेल्ल गो इ होत्रप आ चच कली गेता। २सामुएल १६:२६-३० १०गे, इ तौपुकी नु इ गेय पाइब नेल्लेमी मेको आ रूम गेय पचा माल्नीनी। मिनु गे इ होत्रप आ चच आ खिं डा मुर आन कली गेचा माल्नेवे। तन्न इ होत्रप आ चच मेफी-बोशेथ गेना हना यो गो नु काथ बाक्शा जाइब” दे मदा बाक्त। सीबा के १५ जना तौ नु २० जना गेय पाइब बाक्मा बाक्त। ११मिनु सीबाम पिप कली “आं प्रभु पिप, गो इन गेय पाइबमी इन देशो खोदेशो पा नेल्ल पाइक्नुड” देंमाक्त। मेफी-बोशेथ पिप आ तौ का खोदेशो पा पिप दाऊद आ खिंम बाक्शा, जवा बाक्त। १२मेफी-बोशेथ आ तौ का बाक्माक्त। मेको आ नें मीका बाक्माक्त। मिनु सीबा आ खिं डा मुर नेल्ल मेफी-बोशेथ आ गेय पाइब दुम्मा बाक्त। १३तन्न मेफी-बोशेथ यरूसलेमम बाक्माक्त। मारदे हना मेकोमी गेना हना यो पिप नु जवा बाक्त। मेको आ खोइल निम्फा मदुक्ब बाक्माक्त। २सामुएल ६:३

दाऊदमी लडाइ पशो

१इतिहास १६:१-२०

१० मिनु नोले अम्मोनी आन पिप बेकमाक्त। मिनु मेको आ पा डा आ तौ हानुन पिप दुम्माक्त। **२**दाऊदम “नाहाशमी आं कली रिम्शो पशो खोदेशो पा गो नाहाश आं तौ हानुन कली रिम्शो पाइनुड” दे मिम्ता बाक्त। मिनु मेकोमी आ आफ बेकशो आ पर्वम लेम्शो लोत्र नेंपाइकथ लोत्र कुरब मुर आन कली सोइकता बाक्त। मिनु दाऊद आ मुरपुकी अम्मोनी आन रागीम ओव्रमानु, **१**सामुएल ११:१ **३**अम्मोनी आन कली सासन पाइबम आन प्रभु हानुन कली “दाऊदमी इन आफ कली ठेयब सेल्चा आ पर्वम इन कली लेम्शो लोत्र नेंपाइकथ सोइश्शो बाक्ब, दे थमा सुइकनीनी? एको मुरपुकी क्यारी पाइब नम। दाऊदमी एको आन कली इन सहर दोपा ओव्रचा, दे क्यारी पथ सोइश्शो बाक्ब” देंमा बाक्त। **४**मोपतीके हानुनमी दाऊद आ सोइश्शो मुर आन कली ग्याइश्शा, आन गल शोक्रे उइकथ उइकथ खोइश्शा नु आन फेकशो वा क्रातो सम्म खोइश्शा सोइकतीमी बाक्त। **५**मेको आन कली मो पशो दाऊदम नेना बाक्त। मिनु दाऊदमी मेको आन कली गुम्थ मुर सोइकता बाक्त। मारदे हना मेकोपुकी थम मुने तोक्चा पुंडसमा बाक्त। मिनु दाऊदमी “मेको आन गल शोक्रे डोंइती डा खोदेशो मदुम सम्म यरीको सहरमी बाक्मल” देंमाक्त।

६मिनु अम्मोन डा मुरपुकीमी दाऊद कली गाइकपाइश्शो तुइकतमे बाक्त। मिनु अम्मोन डा मुरपुकीम बेथ-रेहोब, सोबाह डा २० हजार मुर नु अराम डा

खोइलीम गाक्ब लडाइ पाइब आन कली गाल्च थाप्शा चाक्गमे बाक्त। मेकोपुकीम माकाह डा पिप नु हजार का मुर नु तोब रागी रे **१२** हजार मुरपुकी गाल्च थाप्शा चाक्गमे बाक्त। **७**दाऊदम मेको लोत्र नेंशा, योआब नु लडाइ पाइब नेल्ल आन कली सोइकतीमी बाक्त। **८**अम्मोन डा मुर जाक्शा सहर ओव्रतीक ठेयब लाप्चोमी ठीक दुम्मा बाक्त। तन्न सोबाह, रेहोब सहर डा, अराम डा मुरपुकी नु तोब नु माकाह रागी डा मुरपुकी चहिं दिंमम लडाइ पचा कली ठीक दुम्मा बाक्त।

९योआबम आ डोंइती नु नोले निम्फा पटटी रे लडाइ तोचशो तवा बाक्त। मिनु मेकोमी इस्राएल डा योव्रशो मुर आन कली अरामी आन डोंइती वोइक्मी बाक्त। **१०**लीशो मुर चहिं आ लोकब अबीशै आ हुकुममी गेमी बाक्त। मेकोपुकी अम्मोनी आन डोंइती लडाइ तोचा कली ठीक दुम्मा बाक्त। **११**योआबम “अराम डा मुरपुकीम आंइ कली ग्राना ग्रान पिम्तेक्म हना, आंइ कली वारच पने। अम्मोन डा मुरपुकीम इन कली ग्राना ग्रान पिम्तेक्म हना, गो इन कली वारच पाइनीकी। **१२**सक्ति पाइश्शो बोल्यो दुमीन। गो आंम मुरपुकी नु आंम परमप्रभु आ सहर आ पर्वम महिंथु, लडाइ पय। मिनु परमप्रभु यावेमी आ दाक्शो पवल” देंमाक्त। **१३**मिनु योआब नु आ मुरपुकी अरामी नु लडाइ पामे बाक्त। मिनु अरामी मेको आन डोंइती रे प्रोक्मा बाक्त। **१४**मिनु अम्मोनीपुकीम अराम डा मुर आन कली प्रोक्शो तशा, आं यो अबीशै आ डोंइती रे प्रोक्शा, आन सहर ओव्रमा बाक्त। मिनु योआब

अम्मोनी नु लडाइ पचा प्रोंइशा, लेशशा यरूसलेम जाक्मावक्त।

१५ तन्न अरामी इस्राएली नु ब्रुशो तशा, लेंशा बुक्मा बावक्त। १६ हादादेजेरमी युफ्रेटीस खोला आ आइक्ची हांबु रे अरामी आन कली ब्रेथ सोइक्तीमी बावक्त। मिनु मेकोपुकी हादादेजेर आ लडाइ पाइब आन ठेयब मुर शोबाक आ हुकुममी हेलाम सहरम जाक्मा बावक्त। १७ मिनु दाऊदमी मेकोपुकी लडाइ पथ पिशो लोव्र नेना बावक्त। मिनु मेकोम रीब पा इस्राएल डा लडाइ पाइब नेल्ल आन कली खुप्शा यर्दन आइक्ची हांबु शोक्से बावक्त। मिनु हेलाम सहरम जाक्मा बावक्त। मेकेर अरामीपुकी दाऊद नु लडाइ पचा कली ठीक दुम्मा बावक्त। मिनु लडाइ पामे बावक्त। १८ तन्न इस्राएलीपुकीम मेको आन कली प्रोक्पदमे बावक्त। मेकेर दाऊदमी ७ सहे बग्गी डोइक्ब नु ४० हजार शारा डोइक्ब अरामी आन कली सदा बावक्त। लडाइ पाइब आन ठेयब मुर शोबाक कली बेक्चा डा पा गार सेला बावक्त। मिनु मेको लडाइ पतीकेमीन बेक्मावक्त। १९ मिनु हादादेजेर कली वारच पाइब पिप नेल्लेमी इस्राएली नु ब्रुशो, दे तुइशशा, इस्राएली नु गारचा गोव्रमे बावक्त। मिनु इस्राएली आन हुकुममी बाक्ने बिस्समा बावक्त। मेना रे अराम डा मुरपुकीम अम्मोनी आन कली लेंशा गेनायो वारच मपदमे बावक्त।

दाऊदमी पाप पशो

११ नक बर्स जाक्मेनु, पिपपुकी लडाइ पथ ग्रूमा बावक्त। दाऊदमी योआब, लडाइ पाइब आन ठेयब मुर नु इस्राएल डा लडाइ पाइब

नेल्ल आन कली सोइक्तीमी बावक्त। मिनु मेकोपुकीम अम्मोन खतम पोक्गमे बावक्त। रब्बाह सहर कली पुन्दमे बावक्त। तन्न दाऊद चहिं यरूसलेम सहरमी बाक्मावक्त। १ इतिहास २०:१ २ काबु नाक्ती नाक्नाक्दो दाऊद आ इप्तीक रे बोक्शा, खिं तार हिरसेनु, मेकोमी मीश मुर का चिक्शो तवा बावक्त। मेको थम दारशो बाक्मावक्त। मती ५:२८-२९ ३ मेको सु बाक्म, दे हिल्लो पथ, मुर का सोइक्ता बावक्त। मिनु मेकोमी “मेको एलीआम आ तमी, हिल्ली उरीयाह आ मीश बाथ्शेबा बावक्त” देंमावक्त। २ सामुएल २३:३६ ४ मिनु दाऊदम मेको कली ब्रथ सोइक्ता बावक्त। मिनु मेको जाक्मावक्त। मिनु दाऊद मेको नु इम्मावक्त। मेको मीश मुर मेना आ रां ब्रोल्शा चिक्शो बाक्मावक्त। मिनु नोले बाथ्शेबा आ खिं लेम्मावक्त। प्रस्थान २०:१४; लेवी २०:१०; ब्यवस्था २२:२२; लेवी १५:१६ ५ मिनु मेकोमी कोव्रज कुरा बावक्त “गो कोव्रज कुरशो दुम्ती” दे दाऊद कली लोव्र सोइक्ता बावक्त।

६ मिनु दाऊदमी योआब कली “मेको आ वोंइशा हिल्ली उरीयाह कली आं बाक्तीक सोइक्तो” दे लोव्र कुरब सोइक्ता बावक्त। मिनु योआबमी मेको कली दाऊद आ बाक्तीक सोइक्ता बावक्त। ७ मिनु उरीयाह जाक्मेनु, दाऊदमी “लडाइ दोदेशो दुम्मे, योआब नु अरु लडाइ पाइबपुकी मार पामे?” दे हिल्लो पवा बावक्त। ८ मेको नोले दाऊदमी हिल्ली उरीयाह कली “उइ इ खिं लशा नांइसो, इ खोइल चिक्सो” दे मदा बावक्त। मिनु मेको पिप आ खिं रे ग्रूशा गाक्मेनु, पिपमी मेको आ नोले कोसेली सोइक्ता बावक्त। ९ तन्न उरीयाह उइ आ खिं मलथु, पिप आ ओव्रतीक

लाप्यो आ नेक्था इम्माक्त। मेकेर आ प्रभु आ गेय पाइबपुकी यो इप्शो बाक्मा बाक्त। १०मिनु दाऊदम उरीयाह उइ आ खिं मला देशो लोव्र नेना बाक्त। मिनु मेको कली “गे लाइशो लां गाक्शा जाक्शो बाक्नेवे। मारदे गे उइ इ खिं मलवे?” दे मदा बाक्त। ११मिनु उरीयाहमी “परमप्रभु आ सन्दोस, इस्राएल नु यहूदा डा मुर नेल्ल, आं प्रभु योआब नु इन गेय पाइब नेल्ल दिंम डा बाक्तीकेम बाक्शो बाक्नीम। मिनु गो दोपा जचा तूचा नु आं मीश नु इप्चा कली खिं लाइक्नुडा? गे इन ब्रोंइशा बाक्शो खोदेशो पा, गो मो पने मचाप्नुड” देंमाक्त। १२मिनु दाऊदमी उरीयाह कली “मो हना मुलाक्त का एक बाक्को। मिनु दीसा लेशशा सोइक्नन” देंमाक्त। मोपतीके उरीयाह मेको नाक्ती यरूसलेम उइ बाक्माक्त। १३मिनु आ दीसा दाऊदमी मेको कली आ बाक्तीकेम जथ ब्रेत्ता बाक्त। मिनु मेको कली दुक्पदा बाक्त। तन्न नाक्दो मेको लाडगा गूशा आ प्रभु आ गेय पाइबपुकी नु आ ब्राख्येम इम्माक्त। तन्न मेको उइ आ खिं मलमाक्त।

१४आ दीसा दाऊदमी योआब कली चिठी का ब्रेक्शा, उरीयाह आ गुइमी सोइक्ता बाक्त। १५मेको चिठीम “तेकेर ठेयब लडाइ दुम्मे मेकेर उरीयाह कली सोइशशा, गेपुकी चहिं नोले शोंइसीन। मिनु मेको बेक्ल” दे ब्रेक्ता बाक्त। प्रस्थान २०:१३ १६योआब नु लडाइ पाइबपुकीमी सहर कली पुम्दमे बाक्त। मिनु मेकोमी उरीयाह कली थम ठेयब लडाइ दुम्तीकेम सोइक्ता बाक्त। १७मिनु सहर डा मुरपुकी फो फु गूशा योआब नु लडाइ पामे बाक्त। दाऊद आ मुरपुकी

का निक्शी बेक्मा बाक्त। हित्ती उरीयाह यो साइक्चा पुंइसे बाक्त। १८मिनु योआबमी लडाइ डा लोव्र नेल्ल देंशा, मुर का दाऊद आ बाक्तीकेम सोइक्ता बाक्त। १९योआबमी लोव्र कुरब मुर कली “गे लडाइम मार मार दुम्मे, मेको लोव्र नेल्ल पिप कली शेने थुमी नोले, २०पिप गाइशशा ‘लडाइ पनीनु सहर आ नेक्था मारदे लनी? गारो तार रे आप्नीम, दे मतुइक्नीनी? २१येरूब-बाल आ तौ अबीमेलेक कली सुम सदा? मीश मुर कामी थेबेस डा गारो रे यात तोक्शा साइशशा बाक्ब। मारदे गे गारो आ नेक्था लनी?’ देंत हना, गे मेको कली ‘इन गेय पाइब हित्ती उरीयाह यो बेक्त’ मतो” दे मदा बाक्त। न्यायाधीस ६:५३-५४

२२मिनु मेको लोव्र कुरब मुर दाऊद आ बाक्तीक जाक्माक्त। मिनु योआब आ देशो खोदेशो पा लोव्र नेल्ल शोव्रडा बाक्त। २३मिनु मेको लोव्र चाक्ब मुरुमी दाऊद कली “मुरपुकी आंइ कली लडाइ तोचा कली बुक्तेक्म। मिनु फो फु गूशा दिंमम आंइ कली लडाइ तोम्तेक्म। गोपुकीम मेको आन कली सहर आ लाप्यो सम्म खेदा पा लाइतक। २४मिनु ब्रा आप्बपुकीम इन गेय पाइब आंइ कली गारो तार रे ब्रा आप्तेक्म। मिनु इन मुर का निक्शी बेक्तेक्म। इन वाइल हित्ती उरीयाह यो बेक्त” देंमाक्त। २५मिनु दाऊदम मेको कली “गे योआब कली ‘गे मेको साइशशा मुर आन पर्वम सुर्ता मपावो। मारदे हना तरवारम गेना हना यो मुर साइक्ब। गे सहर कली लडाइ तोस डा तोस बाक्शा, ग्रानीनी’ दे आ थुं बारपतीन” देंमाक्त।

२६मिनु उरीयाह आ मीशेम आ वोंइशा बेक्शो लोव्र नेंशा, मेको आ पर्वम रोंका

पवा बाक्त। २७मिनु रोंका पतीक नाक्त नुम नोले दाऊदम मुर सोइश्शा आ खिं चाक्का बाक्त। मिनु मेको दाऊद आ मीश दुम्शा, तौ का थिमाक्त। तन्न दाऊद आ पशो परमप्रभु यावे आ डोंइती थम मरिम्शो बाक्माक्त।

नाथान आ कथा

१२ परमप्रभु यावेमी आ लोव्र पाइब नाथान कली दाऊद आ बाक्तीक सोइक्ता बाक्त। मिनु मेको दाऊद आ बाक्तीक जाक्शा, मेको कली “सहर कामी मुर निक्शी बाक्सा बाक्त। मुर का शोंप पाइश्शो नु का पुडग बाक्माक्त। प्रस्थान २०:१७ २शोंप पाइश्शो मुर के शुश क्यारश भेडा नु बी ब्यफ बाक्मा बाक्त। ३मेको पुडग मुर के पाठी का ला बाक्माक्त। मेको कली ग्याप्शो बाक्माक्त। मेको पाठी कली थुल्शा, आ आलपुकी नु कोल्पदा बाक्त। मिनु मेकोमी मेको आ भाग जशा तूशा बाक्बाक्माक्त। मेको आ थुकुमीन इप्बाक्माक्त। मिनु मेको मुरुमी मेको पाठी कली आ तमी खोदेशोन पाइक्बाक्माक्त। ४काबु नाक्ती मेको शोंप पाइश्शो मुर आ खिंम पौना का जाक्माक्त। मेको शोंप पाइश्शो मुरुम आ पौना कली थुल्चा कली आ क्यारश भेडा रे मारेइ गेचा थुं मपवा बाक्त। तन्न मेको पुडग मुर आ पाठी चाक्शा आ पौना कली जचा व्वचा थोव्रक सेला बाक्त” दे मदा बाक्त। ५मिनु दाऊदम मेको लोव्र नेंशा, मो पाइब मुर आ पर्वम थाम्पा गाइक्ता बाक्त। मिनु मेकोमी नाथान कली “परमप्रभु यावे ब्रोंइशा बाक्शो खोदेशो पा मेको मुर साइक्चा पुंडसीब। ६मेकोम मोपा शिशी मकोंइतीके मेको

पाठी का के ४ ओटा पाठी गेचा माल्ब” देंमाक्त। प्रस्थान २१:३७

७मिनु नाथानम दाऊद कली “मेको मुर गेन ननी। इस्राएली आन परमप्रभु यावेमी मार देंत देशा हना ‘गो इ कली तेल लुकशा, इस्राएल डा पिप सेलतन। सावल आ गुइ रे प्रोंइतन। १राजा २०:४० ८गो इ कली इ होव्रप आ खिं नु आ मीशपुकी गेतन। गो इस्राएल नु यहूदा डा मुर इ कली गेतन। मोशोम मगाप्ते हना यो, गो अरु शुश गेन वा। ९गे मारदे आं लोव्र मटिवी? मारदे आं डोंइती मरिम्शो पवी? गे हित्ती उरीयाह कली तरवारम क्योरतीवी। मिनु मेको आ मीश लाइश्शा, आ वोंइश कली अम्मोनी आन गुइम साइक्पाइक्तीवी। २सामुएल ११:२; १राजा १५:५ १०मोपतीके इ खिं गेना हना यो तरवार रे नाइक्चा मताइब। मारदे हना गे आं लोव्र मटिथु, हित्ती उरीयाह आ मीश चाक्तीवी’ देंत। २सामुएल १३:२८-२९; २सामुएल १८:१४; १राजा २:२४-२५; २राजा २५:७ ११परमप्रभु यावेमी ‘गो इ कली इ खिं रे श्येत दुम्पाइक्नुड। गो इ मीश आन कली इ डोंइती इ नेक्था डा मुर कली गेनुड। मिनु मेकोमी नाक्तीन मुर नेल्लेम तचा डा पा मेकोपुकी नु इप्ब। २सामुएल १६:२२; अय्युब ३१:९-१० १२मारदे हना गे मेको खुइश्शा पाप्तीवी। तन्न गो इस्राएली नेल्ल आन तचा डा पा नाक्तीन पाइनुड’ देशो बाक्ब” दे नाथानमी देंमाक्त। १३मिनु दाऊदमी नाथान कली “गो परमप्रभु यावे आ डोंइती पाप पाता” देंमाक्त। मिनु नाथानम मेको कली “परमप्रभु यावेमी इ पाप क्याम्ताक्व। गे मबेक्नेवे। २सामुएल २४:१०; भजन संग्रह ५१:३; इजीकीएल १८:२१-२३ १४तन्न गे एको पाप पा परमप्रभु यावे कली गाइक्पाइक्तीवी।

मोपतीके इ थिशो आल चहिं बेक्ब”
देमाक्त। २सामुएल ११:२७

१५मिनु नाथान आ खिं लमाक्त।
परमप्रभु यावेम उरीयाह आ मीश रे पा
जरमेशो दाऊद आ आल कली रोइ पपदा
बाक्त। १६मोपतीके दाऊदम मेको आल
आ पर्बम परमप्रभु कली पुना बाक्त।
मेको मारेइ मजथु खिंडगा लशा खपीम
गोलशा नां सोइदा बाक्त। १७खिं डा
खाल्पापुकीमी मेको कली “गे बोक्कीन”
देमा बाक्त। तन्न मेको मबिस्से बाक्त।
मिनु मेकोपुकी नु जने यो मबिस्से बाक्त।
१८मिनु ७ नाक्त नोले आल बेक्माक्त।
मिनु दाऊद आ गेय पाइबपुकीम “आल
बेक्त” दे दाऊद कली देंचा हिंमा बाक्त।
मारदे हना मेकोपुकीमी “आल सेस
बाक्मेनु ला यो इं लोव्र मनंन। मुल मेको
कली ‘आल बेक्त’ दे दोपा देंचा? मेकोमी
आंम आ कली मारेइ मरिम्शो पाइक्बा
कों?” देमा बाक्त। १९तन्न दाऊदम आ
गेय पाइबपुकीम शिप शिप पा देशो लोव्र
नेंशा, आल बेक्माक्त, दे तुइक्ता बाक्त।
मिनु दाऊदमी आ गेय पाइब आन कली
“आल बेक्मे” दे हिल्लो पामी बाक्त।
मिनु मेकोपुकीम “बेक्त” देमा बाक्त।

२०मिनु दाऊद खप रे बोक्शा,
चिक्सीशा, तेल खेक्सीशा, अर्को वा
फेक्से बाक्त। मिनु परमप्रभु यावे आ
बाक्तीक लशा, परमप्रभु यावे कली ठेयब
सेला बाक्त। मिनु नोले खिं जाक्शा, जचा
थोव्रक पुंइशा, जवा बाक्त। २१मिनु मेको
आ गेय पाइबपुकीम मेको कली “गे मार
पनी? आल सेस बाक्म सम्म गे मेको
आ पर्बम मारेइ मजथु डाक्शा बाक्तीनी।
तन्न आल बेक्म नोले बोक्शा जाइतीनी”
देमा बाक्त। २२मिनु दाऊदमी “आल

सेस बाक्म सम्म गो मारेइ मजथु डाक्शा
बाक्ती। परमप्रभु यावेमी आं कली शिशी
पा, आल ब्रोंइबा, कों? दे मिम्ताक्ड।
२३तन्न मुल मेको बेक्त। मारदे गो मारेइ
मजथु बाक्नुडा? मार गो मेको कली
लेशशा चाक्ने चाप्नुडा डा? गो मेको
आ बाक्तीक लाइनुड। तन्न मेको आं
बाक्तीक लेशशा मजाक्ब” देमाक्त।

२४मिनु दाऊदमी आ मीश बाथ्शेबा
कली लेम्दा बाक्त। मिनु मेको नु
इम्माक्त। मिनु अर्को तौ का थिमाक्त।
मेको आ नें सोलोमन वोदमे बाक्त।
मिनु परमप्रभु यावेमी मेको कली दाक्ता
बाक्त। २५मिनु मेको आ नें येदीदीयाह
वोइक्चा माल्ब, दे आ लोव्र पाइब नाथान
रे पा दाऊद कली लोव्र सोइक्ता बाक्त।
*येदीदीयाह आ अर्थ चहिं “परमप्रभु यावे आ दाक्शो मुर”
बाक्ब।*

दाऊदम रब्बाह सहर ग्राशो

१इतिहास २०:१-३

२६मेको नोले योआबमी लडाइ पा
अम्मोनी आन पिप आ रब्बाह सहर,
ग्रामाक्त। २७मेकोमी “गो रब्बाहम लडाइ
पा मेको शुश ब्वाक्कु बाक्शो सहर ग्राती।
२८गेमी लीशो मुर आन कली खुप्शा,
मेको सहर कली लडाइ तोशा ग्राडीन।
मो मपाइतीनी हना, गो आं के सेल्लुड।
मिनु मेको सहर आं के दुम्ब” दे दाऊद
कली लोव्र सोइक्ता बाक्त। २९मोपतीके
दाऊदम मुर नेल्ल आन कली खुप्तीमी
बाक्त। मिनु रब्बाह सहर लमाक्त।
मिनु लडाइ तोशा मेको आइक्के सेला
बाक्त। ३०मेकोमी मिल्लोम आ पिया
रे सिरपेच प्रुदा बाक्त। मेको टलेन्ट का
सुन के बाक्माक्त। मेको तारी हीरा का

यो क्येप्यो बाक्माक्त। मेको दाऊद कली गुक्त्मे बाक्त। मेकोम सहर रे शुश मार मार यो रोइश्शा चाक्गा बाक्त। *टलेन्ट का ३४ किलो खोइ बाक्ब।* ३१ मेकोमी मेकेर डा मुर आन कली लाइश्शा आरा, खन्ती नु खामी गेय पपदा बाक्त। मिनु इंटा सेल्टीकेम गेय पपदा बाक्त। मेको अम्मोनी आन सहर नेल्लेम मोदेशो पवा बाक्त। मिनु नोले दाऊद नु आ मुर नेल्ल यरूसलेम लेम्मा बाक्त।

अम्मोनमी मरिम्शो पशो

१३ मेको मो दुम्शो इच्का बर्स दुम्माक्त। मिनु दाऊद आ तौ अब्सालोम के थम दारशो समी का बाक्माक्त। मेको आ नें तामार बाक्माक्त। दाऊद आ अर्को तौ अम्मोनम मेको कली दाक्ता बाक्त। *२सामुएल ३:२-३* २ अम्मोन आ सान्मा आ तमी तामार नु दाक्मुतीके, आ थुंम थम मरिम्शो दुम्माक्त। मिनु मेकोमी दाक्तीके मेको रोइ पवा बाक्त। मारदे हना मेको कन्ने मीश आल बाक्तीके, मेकोम मारेइ मरिम्शो पने मचबा बाक्त। ३ तन्न अम्मोन आ वारच का बाक्माक्त। मेको आ नें योनादाब बाक्माक्त। मेको दाऊद आ लोकब शिमेआह आ तौ बाक्माक्त। मेको मिक्च सिल्व मुर का बाक्माक्त। *१सामुएल १७:१३* ४ मेकोम अम्मोन कली “ए पिप आ तौ, मारदे गे नाक्त किंत किंत मरिम्शो दुम्ना दुम्न लवे? मार दुमे आं कली देनो” दे मदा बाक्त। मिनु अम्मोनमी “गो आं लोकब अब्सालोम आ समी तामार कली दाक्नुड” देंमाक्त। ५ मिनु योनादाबमी “रोइ पाता, देंखु पा इप्शा बाक्को। मिनु इ आफ इ कली कोव्रथ जाक्त हना, गे

मेको कली ‘आं समी तामारम आं कली जचा थोव्रक सेल्शा गेयील। मेकोम जचा थोव्रक आं डोंइती सेलल। मिनु गो मेको आ सेल्शो कोव्रनुड। मिनु मेको आ गुइ रे जाइनुड’ देंनो” देंमाक्त। ६ मोपतीके अम्मोन “रोइ पाता” देंखु पा इप्शा बाक्माक्त। मिनु पिप मेको कली कोव्रथ जाक्माक्त। मिनु अम्मोनमी पिप कली “आं समी तामारम आं डोंइती शोब्ले निक्शी चोशा गेयील। मिनु गो मेको आ गुइ रे जाइनुड” देंमाक्त।

७ मिनु दाऊदमी खिम लोव्र कुरब मुर का तामार आ बाक्तीक सोइक्ता बाक्त। मेकोमी “इ लोकब अम्मोन आ बाक्तीक लशा, मेको कली जचा थोव्रक सेल्शा गेवो” दे लोव्र पथ सोइक्ता बाक्त। ८ मिनु तामार आ लोकब अम्मोन आ खिं लमाक्त। मिनु मेको कली इप्शा बाक्शो थिदा बाक्त। मिनु तामारमी फस निशा, आ डोंइती शोब्ले चोशा गेवा बाक्त। ९ मिनु मेकोम तांइ शेशा अम्मोन आ बाक्तीक लशा, शोब्ले कुर पवा बाक्त। तन्न अम्मोन जने मबिस्से बाक्त। मिनु अम्मोनमी “नेल्ल आन कली लाडगा सोइक्तो” देंमाक्त। मिनु मुर नेल्ल लमा बाक्त। १० मिनु अम्मोनमी तामार कली “मेको जचा थोव्रक आं कोठाम पितो। मिनु गो इ गुइ रे जाइनुड” दे मदा बाक्त। मिनु तामारमी आ चोशो शोब्ले आ लोकब अम्मोन आ कोठाम लदा बाक्त। ११ मिनु मेकोम शोब्ले गेवानु, अम्मोनम मेको कली ग्याइश्शा “आं समी पिवो। गो नु इपो” देंमाक्त। *लेवी १८:६* १२ तन्न तामारमी “ममाइ, आं लोकब, आं कली ओदेशो मपने। इस्राएलम ओदेशो गेय पचा मदुम्ब। ओदेशो मरिम्शो गेय मपने।

१३ गो आं मुनेम आं कुल ग्रुंइने मचाप्नुड।
गे यो इस्राएलम काइ मरिम्शो मुर
दुम्नीनी। आं पर्बम पिप नु लोव्र पने। गो
नु ग्युंवे पचा कली पिप बिप्ब” देंमाक्त।
१४ तन्न मेकोम तामार आ लोव्र का यो
मनेना बाक्त। मिनु मेको कली बोल पा
ग्याइश्शा, मेको नु इम्माक्त।

१५ मिनु नोले अम्नोनम मेको कली
मदाक्ता बाक्त। अम्नोन आ डोंइती डा
दाक्शो क्येडा नोले डा ग्रांग्रा दिशो शुश
बाक्माक्त। मिनु अम्नोनम मेको कली
“बोक्शा लावो” दे मदा बाक्त। १६ मिनु
तामारमी “ममाइ, आं लोकब, इ पशो गेय
क्येडा यो आं कली ग्रुंइशा सोइक्चा थम
मरिम्शो बाक्ब” देंमाक्त। तन्न अम्नोनम
मेको आ लोव्र मनेना बाक्त। १७ मिनु
अम्नोनम आ गेय पाइब वोंइश आल
कली ब्रेशशा “एको मीश मुर कली आं
डोंइती रे ग्रुंइदो। एको कली ग्रुंइशा आग्लो
पतो” देंमाक्त। १८ तामारमी कन्ने मीश
आल पिप आ तमीमी फेक्तीक लाइश्शो
वा फेक्शो बाक्माक्त। मिनु अम्नोन आ
गेय पाइब वोंइश आलम तामार कली
ग्रुंइशा, आ नोले लाप्चोम आग्लो पदा
बाक्त। १९ मिनु तामारमी आ पियाम
पुलु फुंइसीशा, आ लाइश्शो वा स्वाक्गा
बाक्त। मिनु आ पियाम गुइ वोइश्शा
ठेयब सेंदा पा डाक्ना डाक्न लमाक्त।

२० मेको आ लोकब अब्सालोमम “मार,
इ लोकब अम्नोन गे नु इम्मे? मुल आं
समी सिक्सी पा बाक्को। मेको इ लोकब
बाक्ब। सुर्ता मपावो” देंमाक्त। मोपतीके
तामार आ लोकब अब्सालोम आ खिंमी
प्रोंइचा पुंइसीशो मीश मुर खोदेशो पा
बाक्माक्त। २१ मिनु पिप दाऊदम मेको
लोव्र नेंशा थाम्पा गाइक्ता बाक्त। तन्न

अम्नोन कली सजाइ मगेवा बाक्त। मारदे
हना आ दाक्शो डोंइती डा तौ बाक्माक्त।
२२ अब्सालोमम अम्नोन कली रिम्शो
मरिम्शो मारेइ लोव्र मपवा बाक्त। आ
समी तामार कली बिथोलो सेल्टीके
अब्सालोमम अम्नोन कली काइ मदाक्ता
बाक्त।

अब्सालोममी क्येक्क लेशो

२३ बर्स निकशी नोले अब्सालोमम आ
भेडा आन ऊन प्रेक्चा कली मुर आन
कली ब्रेत्ता बाक्त। मेको एफ्राइम आ
नेक्था बाल-हजोरम बाक्माक्त। मिनु
मेको भोजमी पिप आ तौ नेल्ल आन कली
ब्रेत्तीमी बाक्त। २४ अब्सालोमम पिप आ
बाक्तीक जाक्शा “गो, इन गेय पाइबम,
ऊन प्रेक्तीक चाड मानेशो बाक्नुड। पिप
नु इन गेय पाइबपुकी यो गो नु गाक्कीन”
देमाक्त। २५ तन्न पिपमी “ममाइ, आं तौ,
गो नेल्ल जाक्शा इ कली श्येत मगेनीकी”
देमाक्त। अब्सालोमम “जाक्कीन कि
जाक्कीन” देंमाक्त। मिनु पिप मबिस्से
बाक्त। तन्न आसीक गेशा सोइक्ता
बाक्त। २६ मिनु अब्सालोमम “गे जाक्ने
मचाप्नीनी हना यो, आं लोकब अम्नोन
कली गो नु लचा गेनीनी कों?” देंमाक्त।
मिनु पिपमी “मारदे मेको गे नु लाइबा?”
दे हिल्लो पवा बाक्त। २७ तन्न दाऊदम
अम्नोन नु अरु आ तौ मसोइक्ता सम्म
अब्सालोमम देंस डा देंस पवा बाक्त।
मिनु अब्सालोमम पिप आन कली गारचा
डा ठेयब भोज सेला बाक्त। २८ मेकोम आ
गेय पाइब आन कली “रिम्शा बाक्कीन।
अम्नोन अडगुर शांबुम दुक्त हना, गो
‘मेको कली सतीन’ देंनुड। मिनु गे मेको
कली सतीन। मारेइ हिंचा ममाल्नीनी।

एको आं हुकुम बाक्ब। महिंथु बाक्कीन”
दे माइक्मी बाक्त। लेवी २०:१७ २६मिनु
अब्सालोम आ गेय पाइबपुकीम आ देंशो
खोदेंशो पा अम्नोन कली पामे बाक्त।
मिनु पिप आ तौ नेल्ल आन आन खच्चर
डोइशशा डांडा रे खिं प्रोकमा बाक्त।

अब्सालोम प्रोकशो

३०मेकोपुकी लांम बाक्न बाक्ना पिप
कली “अब्सालोमम पिप आ तौ नेल्ल
आन कली साइक्तु। सुइ मब्रोडम” देंशो
लोव्र चाक्दीत्मे बाक्त। ३१मिनु पिप
बोक्शा आ वा खाक्गा बाक्त। मिनु
खपीम निस्से बाक्त। मेको आ एर ओंथ
बाक्ब आ गेय पाइब नेल्लेमी यो आन
वा खाक्गमे बाक्त। ३२मिनु दाऊद आ
लोक्ब शिमेआह आ तौ योनादाबम “आं
प्रभु, मेकोमी पिप आ तौ नेल्ल साइक्तु,
दे ममिम्तीन। अम्नोन कली ला साइशो
बाक्ब। अम्नोनम तामार कली बिथोलो
सेला नाक्त रे अब्सालोम आ कुल राव
किक्शो तांइसीशो बाक्ब। ३३आं प्रभु,
पिप आ तौ नेल्ल आन कली साइक्तु
देंशो जोल लोव्र मनेनीन। अम्नोन ला
साइक्चा पुंइसाक्व” देंमाक्त।

३४मिनु अब्सालोम प्रोकशा गाक्माक्त।
मेना कोव्रब मुरुमी इर गे कोव्रडानु,
होरोनाइम डांडा रे पा मुर आन हुल
यिशो तवा बाक्त। ३५मिनु योनादाबम
पिप कली “गो इन गेय पाइब, आं देंशो
खोदेंशो पा पिप आ तौपुकी यिना यिन
बाक्नीम” देंमाक्त। ३६मेकोम लोव्र पने
थुमानु, पिप आ तौपुकी खिंडगा ओव्रशा
ठेयब सेंदा पा डाक्मा बाक्त। पिप नु आ
गेय पाइब मुरपुकी यो हुइ हुइ पा डाक्मा
बाक्त।

३७तन्न अब्सालोम प्रोकशा गेशुर डा
पिप अम्मीहुद आ तौ तल्लै आ बाक्तीक
लशा बाक्माक्त। दाऊद आ तौ आ पबर्म
शुश नाक्त सम्म रोंका पवा बाक्त।
३८अब्सालोम गेशुरम प्रोकम रे बर्स सां
सम्म मेक उइ बाक्माक्त। ३९अम्नोन
बेक्शो शुश दुम नोले, पिपमी आ थुं
अब्सालोम गे हिरदा बाक्त। २सामुएल ३:३;

२सामुएल १४:२३; यहोसु १३:११

अब्सालोम कली लेशशा चाक्शो

१४ मिनु सेरूयाह आ तौ योआबम
पिप आ थुंम अब्सालोम
कली दाक्चा गोप्तु, दे तुइक्ता बाक्त।
२मिनु योआबम मुर का कली तेकोहा
सहरम सोइशशा जोक्ब तुइक्ब मीश मुर
का कली चाक्पाइक्मी बाक्त। योआबम
मेको मीश मुर कली “रोंका पशो मीश
मुर खोदेंशो पखु पावो। रोंका पतीक वा
फेक्सो। पियाम तेल मखेक्सो। शुश नाक्त
रे बेक्शो मुर आ पबर्म रोंका पशो मीश
मुर खोदेंशो पखु पावो। ३मिनु पिप आ
बाक्तीक लशा, आं शेंशो लोव्र देंनो”
दे मदा बाक्त। मिनु मार देंचा माल्बा,
योआबम मेको कली शेंदा बाक्त।

४मिनु तेकोहा सहर डा मीश मुर पिप
आ बाक्तीक जाक्शा, खप सम्म बाप्शा
सेउ पवा बाक्त। मिनु डाक्ना डाक्न
“पिप वारच पाइय्यीनी” देंमाक्त। ५मिनु
पिपमी मेको कली “इ कली मार श्येत
दुम्मे?” दे मदा बाक्त। मिनु मेकोमी “गो
वोंइश बेक्शो मीश मुर का नड। आं
वोंइश बेक्त। ६मेको इन वाइल आ तौ
निक्शी बाक्ताक्स। मेको निक्शी दिंमम
राम्शी पाम्से बाक्त। मेको आस कली
फ्राब सुइ मबाक्मा बाक्त। मिनु काम आ

लोकब कली तुप्शा सदा बाक्त। ७मुल आ थर डा मुर नेल्लेमी, इन वाइलीम कली 'आ लोकब साइकब कली आंड गुडम गेने। मिनु गो मेको कली साइकनीकी। मारदे हना आ लोकब कली साइकतु। गो इ अडस ताइब सुइ मबाक्त हना यो, गो मेको कली साइकनीक' दैतेकम। मेकोपुकीम मो पाम्तेकम हना, आं लीशो मी यो काप्नीम। मिनु आं वोंइश आ नें नु चच युइ यो रागी रे क्याम्सीनीम" दैमाक्त।
 व्यवस्था १६:११-१३ ८मिनु पिपमी मेको मीश मुर कली "इ खिं लावो। इ निसाफ गो कोव्रनुड" दैमाक्त। ९मिनु मेको तेकोहा सहर डा मीश मुरुमी पिप कली "आं प्रभु पिप, मेको दोस गो नु आं आफ आ खिं कली दुम्ल। पिप नु इन राज्य दोस मतवल" दैमाक्त। १०मिनु पिपमी "मुल यो सुइम इ कली मारेइ दैतेकम हना, मेको आन कली आं बाक्तीक चाक्को। मिनु मेकोपुकीम इ कली लेंशा श्येत मगेनीम" दे मदा बाक्त। ११मिनु मेको मीश मुरुमी "पिप, गे परमप्रभु यावे, इन परमप्रभु कली मिम्शा गेय पने। मिनु हुश खाक्श पोक्चा नांडसेकल। मिनु आं तौ साइकचा मपुंडसीब" दैमाक्त। मिनु पिपमी "परमप्रभु यावे ब्रोंइशो खोदेशो पा इ तौ के चां का यो महम्ब" दैमाक्त।
 गन्ती ३५:१६-२१

१२मिनु मेको मीश मुरुमी "आं प्रभु पिप, गो इन वाइलीममी मुल यो लोव्र का देंचा ताइक्नुडा कों?" दैमाक्त। मिनु पिपमी "देंनो" दैमाक्त। १३मिनु मेको मीश मुरुमी "गे परमप्रभु आ मुर आन कली मारदे ओदेशो पचा मिम्तीनी? गे मोदेशो पाइतीनी हना, गे दोसी खोदेशो दुम्नीनी। गे रागी रे गुंडशा सोइशो मुर

कली लेंशा जाक्चा गेने मबिस्सीनी। १४गो नेल्ल बेक्चा मालनय। गो खपीम क्युप्शा हुइक्ने मचाप्चा डा ब्वाक्कु खोदेशो बाक्नय। तन्न परमप्रभुमी मुर कली मखेरब। मेकोमी आ डोंइती चाक्चा कली मिम्ना मिम्न बाक्ब। इजीकीएल १८:२३
 १५गो, इन वाइलीम, एको लोव्र आं प्रभु पिप, इन कली देंथ जाक्ती। मारदे हना मुरपुकीम आं कली हिंच कोंइताक्यीमी। मिनु गो पिप नु लोव्र पाइनुड। मेकोमी आ वाइलीम कली आ पुंडशो गेबा कों? १६मिनु पिपमी आ गेय पाइब, आं लोव्र नेंशा, गो नु आं तौ आंस कली श्येत गेब मुर रे प्रोंइबा कों, देंती। मारदे हना मेको मुरपुकीमी आंस कली परमप्रभु आ गेशो रू रे क्याम्चा मालतेकम। १७मिनु इन वाइलीम, आं प्रभु, आं पिप, आ लोव्रम आं थुं नाइक्चा गेब। मारदे हना गे, आं प्रभु पिप, परमप्रभु आ स्वर्ग डा गेय पाइब खोदेशो बाक्नीनी। रिम्शो नु मरिम्शो तिल्व बाक्नीनी। परमप्रभु यावे, इन परमप्रभु गे नु बाक्ब" दैमाक्त। २सामुएल १६:२८; १सामुएल २६:६ १८मिनु पिपमी मेको मीश मुर कली "आं डोंइती मारेइ लोव्र मखुइक्तो, इ कली लोव्र का हिल्लो पाइक्नुड" दैमाक्त। मिनु मीश मुरुमी "आं प्रभु पिप, देंनीन" दैमाक्त। १९मिनु पिपमी "मार, एको नेल्ल योआब आ देशो बाक्मे?" दैमाक्त। मिनु मेको मीश मुरुमी "इन ब्रोंइशा बाक्शो खोदेशो पा, आं प्रभु पिप, गे मारेइ लोव्र हिल्लो पनीनु, लोव्र लेप्ब के ग्युरा पेरा लतीक मबाक्ब। मारदे हना इन गेय पाइब योआबम आं कली मोदेशो लोव्र पचा शेंशा सोइक्ताक्यी। २०योआबमी इन थुं डा मिम्शो गेय फाइक्चा कली मोदेशो पपाइक्ती। तन्न

गे, आं प्रभु, परमप्रभु आ स्वर्ग डा गेय पाइब खोदेशो पा रुप्तीक थुं पाइश्शो बाक्नीनी। रागीम मार दुश्शो बाक्बा, मेको नेल्ल तुइक्नीनी” देंमाक्त। २सामुएल १४:१७

२१मिनु पिपमी योआब कली “दुम्ब, गो एको लोव्र बिस्साकयी। लशा, मेको ठिटा अब्सालोम कली लेशशा चाक्कीन” देंमाक्त। २२मिनु योआबमी आ कुल खप सम्म बाप्शा, सेउ पवा बाक्त। मेकोमी पिप कली “परमप्रभु यावेमी इन कली आसीक गेवल। मुलाक्ती गो आं प्रभु, पिप इन डोंइती शिशी ताता, दे तुइक्ताक्ड। मारदे हना गे आं पुंइशो गेतीनी” देंमाक्त। २३मिनु योआब रीब पा गेशुर लशा, अब्सालोम कली यरूसलेमम चाक्गा बाक्त। २सामुएल १३:३७ २४तन्न पिपमी “मेको आ खिंमीन बाक्ल। आं डोंइती जाक्चा मदुम्ब” देंमाक्त। मोपतीके अब्सालोम आ खिंमीन बाक्शा, पिप आ डोंइती मजाक्माक्त।

२५इस्त्राएल नेल्लेमी अब्सालोम खोदेशो दारशो सुइ मबाक्मा बाक्त। आ पिया रे खोइल सम्म मेको के मारेइ मरिम्शो मदुम्शो मबाक्माक्त। २६मेकोम बर्स बर्सम आ चां खोइक्बाक्माक्त। मारदे हना हेल्बाक्माक्त। मिनु मेको आ चां पिप आ नाक्तीकेम नाक्शोनु, सहे निक्शी शेकेल डा दुम्बाक्त। २०० शेकेल २ किलो ३०० ग्राम खोदेशो बाक्ब। २७अब्सालोम के तौ सां नु तमी का बाक्मा बाक्त। आ तमी आ नें तामार बाक्माक्त। मेको थाम्पा दारशो मीश मुर बाक्माक्त।

२८मिनु अब्सालोम बर्स निक्शी सम्म यरूसलेमम बाक्माक्त। मेको पिप आ डोंइती मजाक्थु बाक्माक्त। २९मिनु अब्सालोममी पिप कली गुम्चा कली

योआब कली लोव्र सोइक्ता बाक्त। तन्न योआब जाक्ने मबिस्से बाक्त। लेंशा ब्रथ सोइक्तानु यो, जाक्ने मबिस्से बाक्त। ३०मिनु अब्सालोमम आ गेय पाइब आन कली “योआब आ रू का आं रू आ नेक्था बाक्ब। मेको के कयोव्रज वाशो बाक्ब, दे गे तुइक्नीनी। मेकेर मी सुइक्तीन” दे माइक्मी बाक्त। मोपतीके अब्सालोम आ गेय पाइबपुकीम मेकेर मी सुइक्तमे बाक्त। ३१मिनु योआब रीब पा अब्सालोम आ खिं लशा, मेको कली “मारदे इन गेय पाइबपुकीम आं रूम मी सुइक्तमे?” दे हिल्लो पवा बाक्त। ३२मिनु अब्सालोममी योआब कली “गो इन कली ब्रथ सोइक्ताक्ड। गे आं पर्बम पिप कली लोव्र लाइक्नीनी कों, दे मिम्ताक्ड। गे पिप कली ‘गो मारदे गेशुर रे जाक्चा माल्डा? गो मेक उइ बाक्शो नड हना, रिम्शो दुम वा’ देंचा कली ब्रेत्थ सोइक्ताक्ड। गो पिप आ डोंइती लचा तडल। गो मारेइ मरिम्शो पशो बाक्ती हना, दोस ताइब बाक्ती हना, साइय्यील” देंमाक्त। ३३मिनु नोले योआब पिप आ बाक्तीक लशा, अब्सालोम आ लोव्र नेंपदा बाक्त। मिनु पिपमी अब्सालोम कली ब्रेत्थ सोइक्ता बाक्त। मिनु मेको पिप आ डोंइती जाक्शा खप सम्म बाप्शा, सेउ पवा बाक्त। मिनु पिपमी अब्सालोम कली पुक्पु पदा बाक्त।

अब्सालोम पिप दुम्चा माल्शो

१५ मिनु नोले अब्सालोमम बग्गी का, शारा नु आ डोंइडोंइती दोरचा कली ५० जना मुर आंम कली वोदा बाक्त। १राजा १:५ २अब्सालोम सुनी कना बोक्शा, सहर ओव्रतीक ठेयब

लाच्योमी बाक्बाक्माक्त। मिनु मुरपुकी पिप कली निसाफ पुंइथ जाक्बाक्तेक्म। अब्सालोममी मेको आन कली का का पा “तेको सहर रे जाक्शो नवे” देंबाक्माक्त। मिनु मेकोमी “इन गेय पाइब इस्राएल डा एको थर रे जाक्शो नड” देंबाक्मा बाक्त। ३मिनु अब्सालोमम मेको कली “इ लोत्र ठीक बाक्ब। तन्न पिपमी इ कली ठीक निसाफ पा मनेंपाइक्ब” देंबाक्माक्त। ४मिनु नोले अब्सालोममी “गो एको रागी डा निसाफ पाइब दुश्शो नड हना, सु सु कली निसाफ माल्दा, गो मेको नेल्ल आन कली निसाफ गेड वा” देंबाक्माक्त। ५सुइ मुर मेको कली सेउ पथ जाक्मेनु, मेको कली आ गुइ हाम्शा मुप्शा, पुक्पु पाइक्बाक्माक्त। ६अब्सालोममी पिप आ निसाफ पतीकेम इस्राएली सु सु जाक्बाक्मा, मेको आन कली मोपा आन थुं खुइ पाइक्बाक्माक्त।

७मिनु ४ बर्स नोले अब्सालोमम पिप कली “गे आं कली हेब्रोन लचा गेयीनी। गो परमप्रभु यावे कली पशो कबल खाप्चा दाक्नुड। ८मारदे हना गो, इन गेय पाइबम अराम डा गेशुरम बाक्डानु, कबल का पाता। गो मार कबल पाता देशा हना, ‘परमप्रभु यावे, गे आं कली थमा पा यरूसलेमम लेशशा चाक्ती हना, गो हेब्रोनम परमप्रभु यावे, इन कली ठेयब सेल्लुड’ दे कबल पाता” देंमाक्त। उत्पत्ती २८:२०-२१; २सामुएल १३:३७-३८ ९मिनु पिपमी “गे इ थुं नाइश्शा लावो” देंमाक्त। मिनु मेको बोक्शा, हेब्रोन लमाक्त। १०मिनु अब्सालोमम इस्राएल डा थर नेल्ल आन कली सुइम मतुइक्चा डा पा, लोत्र कुरब सोइश्शा “तुराही ग्रीशो नैनी चोटी, गेपुकीम ‘अब्सालोम

हेब्रोनम पिप दुम्त’ देंनीन” देंपाइक्मी बाक्त। ११यरूसलेम डा सहे निक्शी जना मुर अब्सालोम आ नोले खोइक्ब दुम्मा बाक्त। मेको आन कली अब्सालोमम ब्रेश्शो बाक्माक्त। तन्न मेकोपुकी मारेइ मतुइक्थु, लशो बाक्मा बाक्त। १२अब्सालोमम आ क्योरशा चढ़ेतीकेम चढ़ेवानु, गिलोह सहर डा अहीथोफेल कली ब्रेत्थ सोइक्ता बाक्त। मेको अहीथोफेल चहिं गिलोह सहर डा दाऊद कली अर्ती गेब मुर बाक्माक्त। मोपा पिप कली मरिम्शो गेय पना पन लशा अब्सालोम आ मुर शुश दुम्ना दुम्न लमा बाक्त। २सामुएल २३:३४; यहोसु १५:५१

दाऊद प्रोक्शो

१३मिनु लोत्र कुरब मुर का दाऊद आ बाक्तीकेम जाक्शा “इस्राएल डा मुरपुकी अब्सालोम आ नोले खोइक्तेक्म” देंमाक्त। १४मिनु दाऊदम यरूसलेमम आं नु बाक्ब आ ठेयब गेय पाइब आन कली “बोक्कीन, गोपुकी रीब पा प्रोक्चा माल्नय। मो मपाइतय हना, गो सुइ अब्सालोम आ गुइ रे ब्रोंइचा मताइनय। रीब पा पने, मो मतुम्त हना, मेकोमी इं क्येडा लाक्शा, इं कली शुश श्येत गेशा, सहर कली लडाइ तोइब” देंमाक्त। १५मिनु पिप आ ठेयब गेय पाइबपुकीमी “गे आंइ प्रभु पिपमी, मार देंनी, गो इन गेय पाइबम मेको पाइनीकी” देंमा बाक्त। १६मिनु पिपमी आ खिं डा सुइ सुइ आन कली लाइश्शा गाक्माक्त। मेकोमी १० जना नोले चाक्शो मीश आन कली खिं कोत्रचा कली प्रोंइशा वोइक्मी बाक्त। १७मिनु पिप गाक्माक्त। मिनु मुर नेल्ल आ नोले खोदमे बाक्त। मिनु नोले डा

खिंम चहिं दिक्मा बाक्त। १८मिनु पिप आ ठेयब गेय पाइब, केरेथी नु पेलेथी नेल्ल, गाथ सहर रे जाक्शो ६ सहे गित्त आ खिं डा नु मुर नेल्ल पिप आ डोंइती लाक्गमे बाक्त। २सामुएल ८:१८; १सामुएल २७:२

१९मिनु पिपमी गित्त आ खिं डा इत्ताइ कली “मारदे गे यो गो नु पिवे? लेशशा लशा, पिप नु बाक्को। मारदे हना गे अर्को रागी डा मुर नवे। गे इ रागी रे गुंड्या पुंडसीशो मुर नवे। २०गे सिनाक्त साबेर नाक्त ला जाक्शो मुर नवे। गो मुलाक्त इ कली दोपा गो नु गाक्को देंनुडा? गो ते लाइक्नुडा आंमान मतुइक्नुडा। गे खिं लावो। मिनु इ मुर आन कली यो लाइक्मी। परमप्रभु यावेमी इ कली आ गेना हना यो दाक्शा मप्रोंइतीके कोंइदल” देंमाक्त। २१तन्न इत्ताइमी पिप कली “परमप्रभु यावे ब्रोंइशा बाक्शो खोदेशो पा नु आं प्रभु पिप इन ब्रोंइशा बाक्शो खोदेशो पा, गे ते लाइतीनी हना यो, गो मेक लाइक्नुडा। ब्रोंइतीनी हना यो, बेक्तीनी हना यो, गो इन गेय पाइब, इन नु बाक्नुडा” दे मदा बाक्त। २२मिनु दाऊदमी इत्ताइ कली “लो, दुम्ब गाक्को” दे मदा बाक्त। मोपा गित्त आ खिं डा इत्ताइ, आ मुर नेल्ल नु आ आल नेल्ल नु गाक्मा बाक्त। २३पिप मोपा गाक्मेनु लांम बाक्ब मुर नेल्ल डाक्मा बाक्त। पिप किद्रोन खोला शोक्शा गोरशो रागी गे लमा बाक्त।

२४मिनु अबीयाथार, सादोक नु लेवी नेल्ल परमप्रभु आ कबल पशो सन्दोस कुरशा, जाक्मा बाक्त। मेकोपुकी चहिं सहर डा मुर नेल्ल गूशा मगाक्मा सम्म सन्दोस नाइश्शा रिम्शा बाक्मा बाक्त। २५मिनु पिपमी सादोक कली “परमप्रभु आ सन्दोस सहर लेशशा लतीन। परमप्रभु

यावेमी आं कली शिशी पाइक्ती हना, आं कली लेशशा जाक्चा गेब। मिनु सन्दोस नु मेको वोइक्तीके लेंशा कोव्रचा गेब। २६तन्न परमप्रभु यावेमी ‘गो इ कली शिशी मपाइनुड’ देंत हना, गो एक उइ बाक्नुडा। मेकोम आं कली आ दाक्शो पवल। २७कोव्रडीन, गे नु इ तौ अहीमाज नु अबीयाथार नु आ तौ योनाथन एको ठिटा निक्शी आस कली लाइश्शा, सहर लेतीन। १राजा १:४२ २८गो गोरशो रागी आ सुरमी इन लोव्र मनेनु सम्म रिम्शा बाक्नुडा। एको लोव्र मप्रेंदीन” देंमाक्त। २९मिनु सादोक नु अबीयाथारम परमप्रभु आ सन्दोस यरूसलेम लेशशा लदसे बाक्त। मिनु मेको मेक उइ बाक्सा बाक्त।

३०तन्न दाऊद जैतून डांडा डा ग्येत्थ लांमी डाक्ना डाक्न लमाक्त। मेकोम आ पिया सुम्शो बाक्माक्त। श्येत्थ खोइल गाक्शो बाक्माक्त। मेको नु गाक्ब नेल्ल यो आन पिया सुम्शा डाक्ना डाक्न गाक्मा बाक्त। ३१मिनु दाऊद कली अहीथोफेल मरिम्शो पाइब आन दातेम अब्सालोम नु बाक्त देंशो लोव्र नेपदमे बाक्त। मिनु दाऊदम “परमप्रभु यावे अहीथोफेल आ अर्ती शोर गाक्शो सेलीन” दे पुंना बाक्त। २सामुएल १७:१४ ३२मिनु दाऊद परमप्रभु कली ठेयब सेल्लिक डांडा तार जाक्माक्त। मेना अरकी आ खिं डा हुशाइ आ वा खाक्शा, आ पियाम खप फुंडसीशा दाऊद कली गुम्थ जाक्माक्त। १राजा ३:२; यहोसु १६:२ ३३दाऊदम मेको कली “गे गो नु गाक्ते हना, आं कली श्येत ला दुम्ब। ३४तन्न गे सहर लेशशा लशा अब्सालोम कली ‘गो इन आफ आ गेय पशो खोदेशो पा इन गेय पाइब दुम्नुड’ देंते हना, मिनु

मेक बाक्ते हना, अहीथोफेल आ अर्ती खतम सेल्चा कली आं कली वारच पाइनेवे। २सामुएल १७:७ ३५ चढेब सादोक नु अबीयाथार गे नु मेक बाक्नीस। पिप आ खिम मार मार लोव्र नेंनी, मेको नेल्ल मेको आस कली शेंदीम्सी। ३६ मेको निक्शी नु आस तौ मेको नु बाक्नीस। सादोक आ तौ अहीमाज नु अबीयाथार आ तौ योनाथन रे इन नेंशो लोव्र नेल्ल आं कली नेंपाइक्ने चाप्नीनी” देमाक्त। २सामुएल १७:१५-२१ ३७ मिनु दाऊद आ वारच हुशाइ, अब्सालोम यरूसलेमम ओव्रन ओव्रना, सहर जाक्दीम्माक्त। १इतिहास २७:३३

सीबामी दाऊद कली गुम्शो

१६ दाऊद डांडा तार रे इच्का आइक्ची जाक्दीम्मेनु, मेफी-बोशेथ आ गेय पाइब सीबामी दाऊद कली गुमा बाक्त। मेकोम लगम पाइश्शो गधा निक्शीम सहे निक्शी शोब्ले, सहे का मुठा सोव्रशो अडगुर, सहे का फल फुल नु मसक का अडगुर शांबु कुरपाइश्शा, चाक्गा बाक्त। २सामुएल ७:२ २पिपमी सीबा कली “गे एको नेल्ल मारदे चाक्गी?” दे हिल्लो पवा बाक्त। मिनु सीबाम “एको गधा पिप आ खिं डा मुर डोइक्चा कली बाक्नीस। शोब्ले नु फल फुल चहिं ठिटा आन कली जचा कली बाक्ब। अडगुर शांबु गोरशो रागीम दशा थशो आन कली तूचा कली बाक्ब” देमाक्त। ३मिनु पिपमी “इ होव्रप आ तौ ते बाक्म” दे हिल्लो पवा बाक्त। मिनु सीबाम “मेको यरूसलेममीन बाक्शो बाक्ब। मेकोमी ‘मुलाक्ती इस्राएलीपुकीम आ बाजे आ राज्य लेशशा गेनीम’ दे रिम्शा बाक्शो

बाक्ब” देमाक्त। २सामुएल १६:२५-३१ ४मिनु पिपमी सीबा कली “मुल मेफी-बोशेथ आ मारेइ मारेइ इ के दुम्ब” दे मदा बाक्त। मिनु सीबामी “आं प्रभु पिप, गो इन वाइल का नड। इन डोंइती शिशी तडल” देमाक्त। १राजा २:८-९; प्रस्थान २२:२७

शिमैडम दाऊद कली सराप पशो

५मिनु पिप दाऊद बाहुरीम सहरम जाक्माक्त। मिनु मेकेर सावल आ खिं डा मुर का, गेरा आ तौ शिमैड गूशा दाऊद कली सराप चीले पना पन पिमाक्त। ६मेकोम पिप दाऊद नु आ गेय पाइब नेल्ल, लडाइ पाइब नेल्ल नु अरु मुर नेल्ल आन कली एर ओंथ नेल्ल फुल्लु क्रोम्दीमी बाक्त। दाऊद आ ग्युरा नु पेरा आ लडाइ पाइब नु आ मुर बाक्मा बाक्त। ७शिमैडमी “लावो, लावो, ए मुर साइक्ब नु मरिम्शो पाइब” दे ग्रीशा, सराप पवा बाक्त। ८मिनु “परमप्रभु यावेम सावल आ खिं डा मुर आन हुश आ क्येक्क लेत्ताक्वे। गे मेको आ पा डा सासन पाप्तीवी। मिनु परमप्रभु यावेमी एको राज्य इ तौ अब्सालोम कली गेप्टु। मुल गे खतम दुम्ते श्येत जाइनेवे। मारदे हना गे हुश ख्राक्श पोक्ब बाक्नेवे” देमाक्त। ९मिनु सेरूयाह आ तौ अबीशैमी पिप कली “मारदे मेरे बेक्शो कुचुममी आं प्रभु, पिप इन कली सराप पवा? गो आइक्ची हांबु लशा मेरे आ पिया खोइक्नुड” देमाक्त। १सामुएल २६:८ १०तन्न पिपमी “ए सेरूयाह आ तौ, गे गो नु मगारचा डा बाक्नीसी। परमप्रभु यावेमी मेको कली ‘दाऊद कली सराप पावो’ दे सोइश्शो बाक्त हना, सुम तेक्ने चाप्बा डा?” देमाक्त। २सामुएल १६:१७-२४ ११मिनु

दाऊदम अबीशै नु आ गेय पाइब नेल्ल आन कली “आं तौमी आं कली साइक्चा माल्ब हना, मेरे बेन्यामीन आ थर डा मुर के मार लोत्र पचा डा? मेरे कली प्रोनीन। मेरेमी सराप पवल। मारदे हना परमप्रभु यावेमीन मेरे कली सराप पचा गेशो बाक्म माइ। १२ परमप्रभु यावेम मेरे मुलाक्त डा सराप आ पा डा आं श्येत तशा आं कली रिम्शो पाइबा कों” देंमाक्त। १३ मिनु दाऊद नु आ मुर आन लां खोदमे बाक्त। शिमेइ चहिं दाऊद आ लां गे आइक्ची हांबुइ आइक्ची हांबु लमाक्त। लमेनु दाऊद कली सराप पना पन फुल्लु आप्ना आप्न, खप ब्वारना ब्वारन लमाक्त। १४ मिनु पिप नु मेको नु गाक्ब मुर नेल्ल यर्दन खोला आ नेक्था जाक्दीम्मा बाक्त। मिनु मेको थाम्पा दशा नांइसमा बाक्त।

अब्सालोम यरूसलेम जाक्शो

१५ अब्सालोम नु मेको नु बाक्ब इस्राएली नेल्ल यरूसलेम जाक्मा बाक्त। अहीथोफेल यो मेको नु बाक्माक्त। १६ मिनु अरकी आ खिं डा हुशाइ दाऊद आ वारचमी अब्सालोम कली ग्रुमा बाक्त। मिनु मेकोमी अब्सालोम कली “पिप गेना हना यो ब्रोंइशा बाक्ल। पिप गेना हना यो ब्रोंइशा बाक्ल” देंमाक्त। २सामुएल १५:३७ १७ तन्न अब्सालोममी हुशाइ कली “इ वारच कली मप्रोंइतीके, मोदेशो बाक्बा डा? मारदे गे इ वारच नु मलवे” दे मदा बाक्त। १८ मिनु हुशाइमी अब्सालोम कली “ममाइ, परमप्रभु यावे मेकेर बाक्ब मुर नु इस्राएली नेल्लेमी योत्रशो मुर आ गेय पचा मिम्ताक्ड। गो एक बाक्नुड। १९ मुल गो सुका आ गेय पाइनुड डा? पिप आ तौ कली गेय पचा

मदुम्बा डा? गो दोपा इन आफ आ गेय पडा, मोपा इन गेय यो पाइनुड” देंमाक्त।

अहीथोफेलमी अर्ती गेशो

२० मिनु अब्सालोममी अहीथोफेल कली “आंइ कली इन अर्ती गेने। गो दोपा गेय पचा माल्नीकी?” दे हिल्लो पवा बाक्त। २१ मिनु अहीथोफेलमी अब्सालोम कली “इन आफोमी आ खिं कोत्रचा कली प्रोंइशा वोइश्शो आ नोले चाक्शो मीशपुकी नु इपो। मोपा इन आफ कली मरिम्शो पशो इस्राएल नेल्लेम नेंनीम। मिनु इन नोले खोइक्ब आन थुं बारब” देंमाक्त। २सामुएल १५:१६ २२ मोपतीके मेकोपुकीम अब्सालोम कली खिं तार ताम्बु का कीडमे बाक्त। मिनु अब्सालोममी इस्राएली नेल्लेम तचा डा पा, आ आफ आ नोले चाक्शो मीशपुकी नु इम्माक्त। २३ मेना मुरपुकीम अहीथोफेल आ अर्ती परमप्रभु आ लोत्र खोदेशो मिम्बाक्मा बाक्त। मोपतीके दाऊद नु अब्सालोमम अहीथोफेल आ अर्ती ठेयब मिम्बाक्सा बाक्त।

अहीथोफेल आ अर्ती क्याम्शो

१७ अहीथोफेलम अब्सालोम कली “आं कली १२ हजार योत्रशो मुर गेयीनी। मिनु गो मुलाक्दो दाऊद कली खेदा पाइनुड। २मेको दशा, आ थुं लुक्च लशा बाक्मेनु, मेको कली थित्नुड। मिनु मेको नु बाक्ब मुर नेल्ल ब्रशा प्रोक्नीम। मिनु गो पिप कली ला साइक्नुड, अरु सुइ मसाइक्नुड। ३मिनु गो इस्राएली नेल्ल आन कली ग्युम्ली आ ग्युम्ले बाक्तीक जाक्शो खोदेशो पा इन बाक्तीक चाक्नुडमी। गे मुर का आ

सोक्त माल्ना माल्न बाक्नीनी। लीशो मुर मारेइ मदुम्नीम” देंमाक्त। ४मिनु अब्सालोम नु इस्राएल डा खाल्पा नेल्लेम अहीथोफेल आ अर्ती दाक्तमे बाक्त।

५तन्न अब्सालोमम “अरकी आ हुशाइ कली ब्रेत्तीन। मेकोमी मार देंबा, मेको नेंय” देंमाक्त। २सामुएल १६:१६ ६मिनु हुशाइ अब्सालोम आ डोंइती जाक्मेनु, अब्सालोममी “अहीथोफेल आ देंशो नेल्ल शेंदा बाक्त। मेको आ देंशो पचा, दे मपचा? मपचा हना, गो मार मिम्नेवे देंनो” देंमाक्त।

७मिनु हुशाइमी अब्सालोम कली “एको मुल डा अहीथोफेल आ देंशो ठीक मदुम्ब” देंमाक्त। ८मिनु हुशाइमी लेंशा “गो इन आफ नु मेको नु बाक्ब मुरपुकी थम जोक्ब लडाइ पाइबपुकी बाक्नीम, दे तुइक्नीनी। मेकोपुकी चाइक्ब रोइक्चा पुंइसीशो वां खोदेंशो दुम्शो बाक्नीम। इन आफ लडाइ पतीकेम जोक्ब तुइक्ब बाक्ब। मेको नाक्दो आ लडाइ पाइब नु काथा मबाक्ब। ९मुल यो मेको तेकोइ ढोडोडगा नु अरु बाक्तीकेमी खुइश्शा बाक्म माइ? मिनु इ लडाइ पाइबपुकी डोंइती साइक्चा पुंइसाक्म हना, मेको नेंबपुकीमी ‘अब्सालोम आ नोले खोइक्बपुकी बेक्ना बेक्न बाक्नीम’ देंशो नेंनीम। १०मोदेंशो दुम्मेनु, महिंब गुप्स खोदेंशो थुं पाइश्शा लडाइ पाइब मुर यो हिनीम। मारदे हना इस्राएली नेल्लेमी इन आफ बोल्यो लडाइ पाइब मुर बाक्ब, दे तुइक्नीम। मेको नु बाक्ब थम बोल्यो बाक्नीम, दे तुइक्नीम। ११आं अर्ती चहिं मार बाक्ब देंशा हना, दान रे बेयर-शेबा सम्म डा इस्राएली नेल्ल आन कली खुप्चा माल्नीम। मेको समुन्द्र डा बाल्वा खोदेंशो

पा शुश बाक्नीम। मिनु गे मोदेंशो पा लडाइ पथ लने। १२मिनु मेको ते बाक्त हना यो, गो मेको कली थिश्शा लडाइ तोइनय। गो सीत यिशो खोदेंशो पा मेको तार जुक्नय। मिनु मेको नु मेको कली खोइक्ब का यो ब्रोंइचा मताइनीम। १३मेको प्रोक्शा सहर लशा, बाक्तीक पुंइशा बाक्त हना यो गो इस्राएली नेल्ल मेकेर लशा मेको सहर कली डोरीम कीशा फुल्लु का यो खोप्शा मलीपाइक्थु, दिंमम चाक्नय” दे हुशाइमी देंमाक्त। १४मिनु अब्सालोम नु इस्राएली नेल्लेमी “अहीथोफेल आ अर्ती क्येडा अरकी आ हुशाइमी गेशो अर्ती रिम्शो बाक्ब” देंमा बाक्त। मारदे हना परमप्रभु यावेमी अहीथोफेल आ अर्ती क्याम्शा, अब्सालोम कली खतम पोक्चा कली मो पवा बाक्त। २सामुएल १५:३१-३४ १५मिनु नोले हुशाइमी चढेब सादोक नु अबीयाथार आस कली अहीथोफेलम अब्सालोम नु इस्राएल डा खाल्पा आन कली गेशो अर्ती नु आ गेशो अर्ती नेल्ल शेंदीम्सी बाक्त। १६मिनु गे दाऊद कली “गोरशो रागी आ सुरम बास मबाक्थु, गोरशा रागी लाक्शा गाक्कीन। मो मपाइतीनी हना, पिप नु आ नु बाक्ब नेल्ल साइक्चा पुंइसीनीम” देंमाक्त।

१७मेना योनाथन नु अहीमाज एन-रोगेलमी रिम्शा बाक्शो बाक्सा बाक्त। मिनु वाइलीम का लशा, मेको आस कली शेंबाक्माक्त। मिनु मेको निक्शीमी पिप दाऊद कली शेंबाक्सा बाक्त। मारदे हना सहर डा मुरुम मतामेक्ल, दे मो पाइक्बाक्मा बाक्त। २सामुएल १५:३६; यहोसु १५:७-८ १८तन्न मेना वोंइश आल काम मेको आस कली तशा, अब्सालोम कली शेंदा बाक्त। मोपतीके मेको

निकशी रीब पा बाहुरीम डा मुर का आ खिं जाकदीस्सा बाक्त। मेको आ लाडगाम इनार का बाक्माक्त। मिनु मेको निकशी मेको आगा ओव्रसा बाक्त। १६मेको खिं डा मुर आ मीशेमी सुम्तीक का चाक्शा, मेको तार बिस्कन हामा बाक्त। सुइम मारेइ मतुइक्तमे बाक्त। २०मिनु अब्सालोम आ गेय पाइब मुरपुकी जाक्शा, मेको मीश मुर कली “अहीमाज नु योनाथन ते बाक्सा” दे हिल्लो पामे बाक्त। मिनु मेकोमी “मेको निकशी आइक्ची हांबु लाक्ताक्स” देंमाक्त। मेको मुरपुकीम एर ओंथ माल्मे बाक्त, तन्न मथिदमे बाक्त। मोपतीके मेकोपुकी यरूसलेम लेम्मा बाक्त। २१मिनु मेकोपुकी लमा नोले मेको निकशी इनार रे गूसा बाक्त। मिनु मेको लशा पिप दाऊद कली नेल्ल शोव्रडसे बाक्त। मेको निकशीमी दाऊद कली “बोक्कीन, रीब पा खोला शोक्सीन” देंसा बाक्त। अहीथोफेल आ देंशो अर्ती डा लोव्र यो शेंदसे बाक्त। २२मोपतीके दाऊद नु आ मुरपुकी रीब पा यर्दन खोला शोक्सीमा बाक्त। बुरु रु पा हाम्सो दुम्मेनु, आइक्ची हांबु मजाक्दीप्ब, सुइ मलीमा बाक्त।

२३मिनु अहीथोफेलमी आ अर्ती डा लोव्र मबिश्शो तुइश्शा, आ गधा ठीक पा आ सहर डा खिं लमाक्त। मिनु आ खिं डा मुर आन कली देंचा माल्शो लोव्र देंशा, आं चहिं ग्युकशा बेक्माक्त। मेको मोपा बेक्शा आ आफ आ तुरसुम थिम्चा पुंइसे बाक्त। १सामुएल ३१:४; १राजा १६:१८; मत्ती २७:५

२४मिनु दाऊद महा-नाइमम जाक्दीम्माक्त। मेना अब्सालोम नु मेको नु बाक्शो इस्राएली यर्दन खोला शोक्सीने

थुम्मे बाक्त। २सामुएल २:८ २५अब्सालोमम योआब आ पा डा इश्माएली इथ्रा आ तौ आमासा कली कप्तान सेला बाक्त। इथ्रामी अबीगेल कली ग्युंभे पवा बाक्त। अबीगेल, नाहाश नु सेरूयाह आस समी आ तमी बाक्माक्त। सेरूयाह योआब आ ममा बाक्माक्त। २६इस्राएलीपुकी नु अब्सालोमम गिलादमी आन बाक्तीक सेल्मे बाक्त। २७मिनु दाऊद महा-नाइमम जाक्मेनु, रब्बाहम बाक्ब अम्मोनी नाहाश आ तौ शोबी, लो-देबारम बाक्ब अम्मीएल आ तौ माकीर नु रोगेलीम बाक्ब गिलाद आ मुर बारजील्लाइम, १इतिहास १६:१; २सामुएल ६:४; १राजा २:७ २८ब्रतीक फेक्तीक, ग्योबपुकी, खप के ग्योबपुकी, क्योव्रज नु चेरब, फस, सिबी, दाल, २६खुदो, दहि, भेडा नु दूध के सेल्शो जचा थोव्रक दाऊद नु मेको नु बाक्ब मुर आन कली चाक्शा, गेमे बाक्त। मारदे हना मेकोपुकीम दाऊद नु आ मुरपुकी गोरशो रागीम शोव्रलु बेक्शो, तूतू दाक्शो नु थाम्पा दशो बाक्नीम, दे तुइक्तमे बाक्त।

अब्सालोम साइक्चा पुंइसीशो

१८ दाऊदमी आं नु बाक्शो मुर आन कली लडाइ पचा कली पुक्मी बाक्त। मिनु हजार का नु सहे का डा मुर आन कप्तान योव्रमी बाक्त। २मिनु नोले दाऊदमी आ लडाइ पाइब आन कली भाग सां सेल्मी बाक्त। भाग का योआब आ हुकुममी, भाग का सेरूयाह आ तौ अबीशे योआब आ लोक्ब आ हुकुममी नु भाग का गित्त आ खिं डा मुर इत्ताइ आ हुकुममी गेमी बाक्त। मिनु पिपमी “गो यो गेपुकी नु लडाइम लाइनुड” देंमाक्त। २सामुएल १५:१६

३तन्न मेकोपुकीमी “ममाइ, गे चहिं मलने। बुशा प्रोक्चा माल्ताक्क हना, आंइ कली सुइम मतुइक्नीम। गो उइक्थ बेक्तक हना यो, मेकोपुकीम आंइ कली मकोवनीम। तन्न गे आंइ १० हजार खोदेशो बाक्नीनी। मोपतीके गे सहरम बाक्शा, आंइ कली वारच पाइतीनी हना, रिम्शो दुम्ब” देंमा बाक्त। ४मिनु पिपमी “मो हना गो, गे मार देंनी, मेको पाइनुड” देंमाक्त। मिनु मेको ठेयब लाप्चोम राप्शा बाक्माक्त। मिनु लडाइ पाइबपुकी हजार का, सहे का डा हुल पा आ डोंइती रे लमा बाक्त। ५पिपमी योआब, अबीशै नु इत्ताइ आन कली “गो आं पबर्म मेको ठिटा अब्सालोम नु मरिम्शो मपने” दे अब्सालोम आ पबर्म लडाइ पाइब आन कली अरेशो मुर नेल्लेम नेन्मे बाक्त।

२सामुएल १८:१२

६मिनु लडाइ पाइबपुकी इस्राएली नु लडाइ पथ जाक्दीम्मा बाक्त। मेको लडाइ एफ्राइम डा ब्वाकीम दुम्माक्त। ७मेकेरे दाऊद आ मुरपुकीम इस्राएली आन कली फूमे बाक्त। मेको नाक्ती थम ठेयब लडाइ दुम्शा २० हजार मुर बेक्मा बाक्त। ८लडाइ राज्य आ एर ओंथ नेल्ल ब्रमाक्त। तरवारम साइशो क्येडा ब्वाकीम साइशो मुर शुश दुम्मा बाक्त।

९अब्सालोममी दाऊद आ मुर कली तवा बाक्त। अब्सालोम आ खच्चर डोइशो बाक्माक्त। मेको खच्चर शुश राशी पाइशो ठेयब बोल्यो रवा का आगा रे ग्रीशा लमाक्त। मिनु अब्सालोम आ चां मेको बोल्यो रवा आ राशीम ब्वेक्ता बाक्त। मिनु मेको ग्युक्शा लीमाक्त। आ खच्चर चहिं ग्रीशा लाक्गा बाक्त। १०मुर कामी मेको तशा योआब

कली “गो अब्सालोम कली बोल्यो ठेयब रवा काम ग्युक्शा लीशो ताता” मदा बाक्त। ११योआबमी मेको मुर कली “गे मेको कली मोपा तशा, मारदे मसदी? गो इ कली १० टुक्रा चांदी नु काम्बरी का गेन वा” देंमाक्त। १२मेको मुरुम योआब कली “गे आं कली हजार का टुक्रा चांदी गेतीनी हना यो, गो पिप आ तौ आ पबर्म आं गुइ मक्युकनुड। मारदे हना पिपमी ‘मेको ठिटा अब्सालोम कली सुम थिप्बा, मेकोमी रिम्शो पने’ दे अबीशै, इत्ताइ नु इन कली देशो गो नेल्लेम नेंतक।

२सामुएल १८:५ १३मिनु गो मेको कली मरिम्शो पा साइक्ता हना, मेको लोव्र पिपमी रीब पा नेंब। मिनु गे दोस मताइब दुम्नीनी” देंमाक्त। १४मिनु योआबमी “गो गे नु लोव्र पा मग्योल्लुड” देंमाक्त। मिनु मेकोमी तूतीक सां शेशा, अब्सालोम मो पा रवाम ग्युक्शा बाक्मेनु, आ कुचुमी थोक्गा बाक्त। मेना सम्म अब्सालोम सेस बाक्शो बाक्माक्त। १५मिनु योआब आ या कुरब १० जना मुरुम अब्सालोम कली आ एर ओंथ बाक्शा, मेको कली आप्शा सदमे बाक्त।

१६मिनु योआबम तुराही तबा बाक्त। मिनु लडाइ पाइबपुकी इस्राएली आन कली खेदा पचा प्रोंइशा, लेम्मा बाक्त। मारदे हना योआबम लडाइ पाइब आन कली तेक्मी बाक्त। १७मेकोपुकीम अब्सालोम आ बेक्शो रां लाइशशा, ब्वाकी डा ठेयब ढोडोडगा काम ताइक्तमे बाक्त। मिनु मेको तार शुश फुल्लु पुक्गमे बाक्त। मिनु इस्राएली नेल्ल आन आन खिं प्रोक्मा बाक्त। यहोसु ८:२६

१८डोंइती अब्सालोममी पिप आ बेंसीम थाम का खुक्शो बाक्माक्त। मारदे हना

मेकोमी “आं नें वोइक्चा कली आं तौ मबाक्ब” देशो बाक्माक्त। मेकोमी मेको थाम कली आ नें वोइश्शो बाक्माक्त। मुल सम्म मेको थाम कली अब्सालोम आ थाम देंसीब। २सामुएल १४:२७

१६मिनु सादोक आ तौ अहीमाजम “परमप्रभु यावेम क्येक्क लेत्ताक्व। मिनु पिप कली आ जोरी सत्रु आन गुइ रे प्रोंइतु, देंचा कली आं कली दोरपा सोइक्तीनी” देंमाक्त। २सामुएल १५:३६; २सामुएल १७:१७
२०तन्न योआबमी मेको कली “मुलाक्ती इ लोव्र लाइक्तीक नाक्त ममाइ। अर्को नाक्ती गे लोव्र लाइक्चा माल्नेवे। मारदे हना मुलाक्ती पिप आ तौ बेक्शो बाक्ब” देंमाक्त। २१मिनु योआबमी कूश आ खिं डा मुर का कली “लशा, इ तशो नेल्ल पिप कली नेंपतो” दे मदा बाक्त। मिनु मेको कूश आ मुर योआब कली बाप्शा सेउ पा दोरशा लमाक्त। २२मिनु सादोक आ तौ अहीमाजम लेंशा, योआब कली “मार दुम्त हना यो आं कली कूश डा मुर आ नोनोले दोरशा लचा गेयीनी” देंमाक्त। मिनु योआबमी “आं तौ गे मारदे लाइनेवे? इ लोव्र आ पर्बम गे मारेइ इनाम मताइनेवे” दे मदा बाक्त। २३मिनु मेकोमी “मार दुम्त हना यो, गो दोरशा लाइनुड” देंमाक्त। मिनु योआबमी “मो हना लावो” देंमाक्त। मिनु अहीमाज यर्दन डा बेंसी रे पा दोरमाक्त। मिनु मेकोम कूश आ खिं डा मुर कली ग्रामाक्त।

२४मेना दाऊद लाप्चो निक्शी आस दातेमी बाक्शो बाक्माक्त। खाल पाइबमी गारो आ तार लशा कोव्रडा बाक्त। मिनु मुर का दोरशा पिशो तवा बाक्त। २५मिनु मेको खाल पाइबम पिप कली ठेयब सेंदा पा देंमाक्त। मिनु पिपमी “मेको

आ का ला बाक्त हना, मारेइ लोव्र चाक्तु” देंमाक्त। मेको मुर आस नेक्था जाक्माक्त। २६मिनु मेको खाल पाइबमी अर्को मुर का यो दोरशा पिशो तवा बाक्त। मिनु लाप्चो खाल पाइब कली “कोव्रडीन, दे अर्को मुर का यो आ कान दोरशा पिन पिन बाक्ब” देंमाक्त। मिनु पिपमी “मेकोम यो लोव्र चाक्गा माइ” देंमाक्त। २७मिनु मेको खाल पाइबमी “मेरे डोंइती दोरब सादोक आ तौ अहीमाज खोदेशो पा दोरत” देंमाक्त। मिनु पिपमी “मेको रिम्शो मुर बाक्ब, मेकोम रिम्शो लोव्र चाक्गा माइ” देंमाक्त।

२८मिनु अहीमाजम पिप कली ठेयब सेंदा पा “नेल्ल रिम्शो बाक्ब” देंमाक्त। मिनु पिप आ डोंइती खुम्की पा बाप्शा, पिप कली “परमप्रभु यावे, इन परमप्रभु ठेयब बाक्ब। मेकोम आं प्रभु, पिप इन कली मरिम्शो पाइब आन कली इन गुइमी गेशो बाक्ब” देंमाक्त। २९मिनु पिपमी “मार मेको ठिटा अब्सालोम रिम्शोन बाक्मे?” देंमाक्त। मिनु अहीमाजम “इन गेय पाइब योआबम आं कली सोइक्तानु, गो ठेयब गांग्ये माग्ये दुम्शो ताता। तन्न मार दुम्शो बाक्मे मतुइक्नुड” देंमाक्त। ३०मिनु पिपमी मेको कली “गे मेकेर राप्शा बाक्को” दे मदा बाक्त। मिनु मेको मेकेर राप्शा बाक्माक्त।

३१मिनु मेको कूश आ मुर जाक्शा मेकोमी “आं प्रभु, आ पिप, इन कली नेल्ल रिम्शो बाक्ब। मारदे हना मुलाक्ती परमप्रभु यावेमी इन कली मरिम्शो पाइब आन गुइ रे प्रोंइशो बाक्ब” देंमाक्त। ३२मिनु पिपमी मेको कूश आ मुर कली “मेको ठिटा अब्सालोम रिम्शोन बाक्मे” दे हिल्लो पवा बाक्त। मिनु मेको कूश

आ मुरुमी “आं प्रभु, पिप आ जोरी सत्रु नु मरिम्शो पाइब नेल्ल मेको ठिटा खोदेशो दुम्मल” देंमाक्त। ३३मिनु पिप आ थुं ग्येत्य लुकच दुम्शा, मेको ठेयब लाच्यो आ तार डा कोठाम लशा डाक्माक्त। मिनु गाकना गाकन लमेनु “आं तौ अब्सालोम, आं तौ अब्सालोम, इ पा डा गो बेक्शो नड हना, दुम वा। अब्सालोम! आं तौ, आं तौ” दे डाक्माक्त।

अब्सालोम आ पर्वम रोंका पशो

१९ मिनु योआबम “पिप दाऊद अब्सालोम आ पर्वम डाकना डाकन रोंका पा बाक्शो बाक्ब” देंशो लोत्र नेना बाक्त। २मेको नाक्त डा ग्राशो नेल्ल लडाइ पाइब आन कली रोंका पतीक दुम्माक्त। मारदे हना लडाइ पाइबपुकीमी पिप आ तौ आ पर्वम रोंका पशो बाक्ब, दे नेंमे बाक्त। ३मेको नाक्ती लडाइ पाइबपुकी लडाइम बुशा आन कुल कोंइने मचाप्यु, मुने दोक्शा प्रोक्शो मुर खोदेशो पा सिक्सी पा सहर ओव्रमा बाक्त। ४पिप आ कुल सुम्शा ठेयब सेंदा पा डाकना डाकना “आं तौ अब्सालोम, अब्सालोम, आं तौ, आं तौ” देंमाक्त। ५मिनु योआब पिप आ खिंम ओव्रशा मेको कली “गे मुलाक्ती इन कप्तान नेल्ल आन कली मुने तोक्तीनी। मारदे हना मुलाक्ती मेकोपुकीमी इन कली प्रॉइतेक्म। इन तमी तौ, इन मीशपुकी नु इन नोले चाक्शो मीश आन कली यो प्रॉइतेक्म। ६इन कली काइ मदाक्ब कली गे दाक्नीनी। इन कली दाक्ब आन कली गे काइ मदाक्नीनी। मुलाक्ती गो लडाइ पाइब आन कप्तान नु ठेयब मुर इन डोंइती मारेइ मनकी, दे रुप्पाइक्तीनी।

मुलाक्ती अब्सालोम ब्रोंइशा, गो नेल्ल बेक्शो नकी हना, गे ग्येरसीनी वा। ७मुल रीब पा लशा, इन गेय पाइब आन थुं बारपतीन। गे मो मपाइतीनी हना, गो परमप्रभु यावे आ नेंमी कसम जशा ‘मुलाक्दो गे नु सुइ मबाक्नीम’ देंनुड। मिनु डोंइती इन तशो श्येत क्येडा मुलाक्त डा श्येत ठेयब दुम्ब” देंमाक्त। ८मिनु पिप बोक्शा, ठेयब लाच्योम बाक्माक्त। मिनु पिप ठेयब लाच्योम बाक्शो बाक्ब, दे लडाइ पाइब आन कली नेंपदमे बाक्त। मिनु लडाइ पाइब नेल्ल पिप आ डोंइती जाक्मा बाक्त। मेना सम्म इस्राएली नेल्ल आन आन खिं प्रोक्ने थुम्शो बाक्मा बाक्त।

दाऊद यरूसलेम लेशशो

९इस्राएल डा थर नेल्ल डा मुरुम आंम आंम लोत्र पा “पिपमी आंइ कली आंइ जोरी सत्रु रे प्रॉइतु। पलिस्ती आन गुइ रे यो प्रॉइतु। मुल अब्सालोमम पतीके आंम रागी रे प्रोक्शा गाक्शो बाक्ब। १०मुल गो इं पिप सेल्शो अब्सालोम लडाइम बेक्त। मोपतीके गो मुल मारदे पिप कली लेशशा मचाक्नया?” देंमुमा बाक्त।

११मिनु पिप दाऊदमी सादोक नु अबीयाथार कली “यहूदा डा खाल्पा आन कली ‘मारदे गे पिप कली आ खिंमी लेशशा चाक्चा कली नेल्ल क्येडा नोले दुम्चा दाक्नीनी? इस्राएली नेल्लेम देंशो लोत्र पिपमी नेंने थुम्शो बाक्ब। १२गेपुकी आं मुर ननी। आं हुश ननी। पिप कली लाइक्चा कली गे मारदे नोले दुम्नी’ मतीस। २सामुएल ५:१ १३मिनु आमासा कली ‘गे आं मुर नु आं हुश मनवे? गे योआब आ पा डा गो बाक्डा

सम्म कप्तान दुम्नेवे। मो मपाता हना, परमप्रभुमी सजाइ गेवल' देंत मतीस" देंमाक्त। २सामुएल १:२५ १४मिनु आमासामी यहूदा डा मुर नेल्लेमी "दाऊद कली ब्रेत्चा माल्ब" दे थुं का सेला बाक्त। मिनु मेकोपुकीम पिप कली "गे नु इन गेय पाइब नेल्ल नु लेशशा जाक्कीन" दे लोत्र सोइक्तमे बाक्त। १५मोपतीके पिप लेशशा यर्दन जाक्माक्त। डोंइती यहूदा डा मुरपुकी गिल्गालम पिप गुम्चा कली जाक्मा बाक्त। मेकोपुकीमी पिप कली यर्दन खोला शोकपाइक्थ जाक्मा बाक्त।

१६बेन्यामीन आ थर डा मुर बाहुरीम डा गेरा आ तौ शिमेइ यो यहूदा डा मुर नु रीब पा पिप दाऊद कली गुम्थ जाक्माक्त। १७मेको नु हजार का जना बेन्यामीन आ थर डा मुर यो बाक्मा बाक्त। सावल आ गेय पाइब सीबा यो आ १५ जना तौ नु आ २० जना गेय पाइब नु मेकेर बाक्शो बाक्माक्त। मेकोपुकी पिप आ डोंइती यर्दन खोलाम जाक्दीम्मा बाक्त। २सामुएल ६:२,१०; २सामुएल १६:१-४ १८मिनु मेको आइक्ची हांबुम लचा कली पिप आ खिं डा मुर आन कली शोकचा कली नु पिप आ माल्शो पचा कली मेकेर जाक्मा बाक्त। मिनु गेरा आ तौ शिमेइ पिप खोला शोकची ना पिप आ डोंइती बाम्माक्त। १९मिनु शिमेइमी पिप कली "आं प्रभु, पिप, गे यरूसलेम प्रोंइची ना आं मरिम्शो पशो आ पर्बम दोस मगेथु ममिम्तीन। २०मारदे हना गो, इन गेय पाइबम पाप पाता, दे तुइक्नुड। मोपतीके गो योसेफ आ खिं डा मुर नेल्ल आन क्येडा डोंइती आं प्रभु पिप इन कली गुम्थ जाक्ती" देंमाक्त। २१मिनु सेरूयाह आ तौ अबीशैमी "परमप्रभु यावे आ

तेल लुक्शो कली सराप पतीके शिमेइ साइक्चा मपुंडसीबा डा?" देंमाक्त। २२तन्न दाऊदमी "सेरूयाह आ तौ, गे आं कली काइ मगारब मुर बाक्नीसी। गे मुलाक्ती आं जोरी सत्रु दुम्तीसी? मुलाक्ती इस्राएलमी तेकोइ मुर साइक्चा मदुम्ब। मुलाक्ती गो इस्राएल डा पिप दुम्ती, दे गो मतुइक्नुडा डा?" देंमाक्त। २सामुएल १६:१० २३मिनु पिपमी शिमेइ कली "गे साइक्चा मपुंडसीनेवे" देंमाक्त। मिनु पिपमी मेको लोत्र थमा सेल्चा कली कसम जवा बाक्त। १राजा २:८-९

२४सावल आ चच मेफी-बोशेथ यो दाऊद पिप कली गुम्थ उइ यिमाक्त। मेकोम पिप गाक्म रे ग्राशा मलेम्म सम्म आ खोइल डा गेय यो मखोदा बाक्त। आ गल शोक्रे यो मप्रेक्गा बाक्त। आ वा यो ममुरशो बाक्माक्त। २सामुएल ६:६ २५मेको पिप कली गुम्थ यरूसलेम रे जाक्मेनु, पिपमी मेको कली "मेफी-बोशेथ गे मारदे गो नु मगाक्डे?" दे मदा बाक्त। २६मिनु मेकोमी "आं प्रभु पिप, आं गेय पाइबम आं कली मरिम्शो पाप्तु। गो आं गधाम लगम पाइशशा पिप नु गाक्चा ठीक दुम्शो नड। मारदे हना गो इन गेय पाइब खोइल थेक्ने मचाप्ब मुर नड। २७मेको आ लोत्रमी आं प्रभु पिप इन कली आं पर्बम मरिम्शो दुम्पाइक्तु। गे आं प्रभु पिप परमप्रभु आ स्वर्ग डा गेय पाइब खोदेशो बाक्नीनी। गे मार पचा दाक्नीनी मेको पने। २सामुएल १६:३; २सामुएल १४:१७ २८आं आफ आ खिं डा मुर नेल्ल इन गुइमी बेक्चा डा नकी। तन्न गो इन गेय पाइब आं कली इन नु जचा बाक्चा गेतीनी। मेको क्येडा लाक्शा, गो मार शिशी ताइक्नुडा डा?" देंमाक्त। २सामुएल ६:७

२६मिनु पिपमी “मुल दुम्त। सीबा नु गे रू योक्सीस, देंती” देंमाक्त। २सामुएल ६:६-१०; २सामुएल १६:३-४ ३०मिनु मेफी-बोशेथमी पिप कली “नेल्ल मेकोम पांडसेकल। मारदे हना गे आं प्रभु पिप मारेइ मदुम्थु खिं लेशशा जाक्तीनी” देंमाक्त।

३१मिनु गिलाद आ मुर बारजील्लाइ यो रोगेलीम रे उइ यिमाक्त। मिनु पिप कली यर्दन शोकचा कली पिप आ नेक्था जाक्माक्त। २सामुएल १७:२७; १राजा २:७ ३२बारजील्लाइ ८० बर्स दुम्शो थम खूशो बाक्माक्त। मेकोमी पिप महानाइमम बाक्मेनु, पिप कली जचा थोव्रक गेशो बाक्माक्त। मारदे हना मेको थम शोंप पाइशो मुर बाक्माक्त। ३३पिपमी बारजील्लाइ कली “गो नुन खोला शोकशा लय। गो इन कली यरूसलेममी कोव्रशा थुल्शा वोइक्नुड” देंमाक्त। ३४मिनु बारजील्लाइमी पिप कली “गो शुश बर्स मब्रोंडनुड। दोपा गो पिप नु यरूसलेम लाइनुड। ३५मुल गो ८० बर्स दुम्ती। मुल गो रिम्शो नु मरिम्शो दोपा तुइक्नुडा? आं जशो तूशो ब्रोव्रशो नु मब्रोव्रशो मारेइ मतुइक्नुड। वोंइश मुर मीश मरुम कुम्सो पशो, गो नेने मचाप्नुड। मोपतीके गो आं प्रभु पिप इन कली मारदे श्येत तेम्नुडा? ३६गो इन गेय पाइब यर्दन आइक्ची हांबु इच्का सम्म पिप इन नु लाइनुड। पिपमी आं कली मारदे ओदेंशो रिम्शो इनाम गेयीनी? ३७आं कली लचा गेयीनी। मिनु आं आंम सहरम आं आम आफ आस तुरस आ नेक्था आं लीशो नाक्त थुम्चा गेयीनी। तन्न इन वाइल किम्हाम एक बाक्ब। मेको कली आं प्रभु पिप इन नु आइक्ची हांबु लतीन। गे मार रिम्शो लाक्नीनी, मेकोन पने”

देंमाक्त। येरमीया ४१:१७ ३८मिनु पिपमी “मो हना किम्हाम गो नु आइक्ची हांबु गाक्ल। मिनु गे मार पचा दाक्नीनी, मेको इन देंशो खोदेंशो पाइनुड। गे मार दाक्नीनी गो मेको पाइनुड” देंमाक्त। ३९मिनु मुर नेल्ल यर्दन आइक्ची हांबु शोक्समा बाक्त। पिप यो शोक्से बाक्त। मिनु पिपमी बारजील्लाइ कली पुक्पु पा आसीक गेवा बाक्त। मिनु बारजील्लाइ आंम आ खिं लेम्माक्त। ४०पिप खोला शोकशा गिलगाल जाक्माक्त। किम्हाम मेको नु गाक्शो बाक्माक्त। यहूदा डा मुर नेल्ल नु इस्राएल डा उइक्थ मुरुम पिप कली इच्का आइक्ची सम्म चाक्दीत्मे बाक्त।

४१मिनु इस्राएल डा मुर नेल्ल काथ दुम्शा, पिप आ बाक्तीक जाक्मा बाक्त। मिनु मेकोपुकीमी “मारदे आंइ लोकब यहूदा डा मुरपुकीम इन कली खुइ पा लदमे? पिप, आ खिं डा मुर नु इन मुर नेल्ल लाइशशा यर्दन आइक्ची हांबु चाक्दीत्मे?” देंमा बाक्त। ४२मिनु यहूदा डा मुर नेल्लेमी इस्राएल डा मुर आन कली “पिप आंइ नेक्था डा मुर बाक्ब। गे मारदे आंइ पर्वम गाइक्नीनी? मार, गो पिप आ शोंप जका? मार पिपमी गो आंइ कली मारेइ गेवा?” देंमा बाक्त। ४३मिनु इस्राएल डा मुरपुकीम यहूदा डा मुर आन कली “पिप इन क्येडा १० खेयप शुश आंइ पिप बाक्ब। गे मारदे आइक्च सेल्नीनी? पिप दाऊद कली लेशशा चाक्ता, दे गोपुकीम डोंइती देंशो बाक्नीकी, मेको मप्रेदीन” देंमा बाक्त। तन्न इस्राएल डा मुर क्येडा यहूदा डा मुरपुकीमी ठेयब लोत्र पामे बाक्त। २सामुएल १६:१०-११

शेबा आ मरिम्शो पशो

२० शेबा नें पाइश्शो मरिम्शो पाइब मुर का बाक्माक्त। मेको बेन्यामीन आ थर डा बिक्री आ तौ बाक्माक्त। मेकोम तुराही ताप्शा ग्रीशा “दाऊद नु आंइ के मार बाक्बा डा? येस्से आ तौ नु आंइ के मारेइ मबाक्ब। ए इस्राएली, गे इन ताम्बु ताम्बुम लने” देमाक्त। *१राजा १२:१६* **२**मोपतीके इस्राएली नेल्लेमी दाऊद कली प्रोंइशा, बिक्री आ तौ शेबा आ नोले खोदमे बाक्त। तन्न यहूदा डा मुरपुकी चहिं दाऊद कली मप्रोंइथु, यर्दन रे यरूसलेम सम्म आ नोले खोइक्स डा खोइक्स पामे बाक्त।

३मिनु दाऊद आ खिं यरूसलेमम जाक्माक्त। मिनु मेकोम आ खिं कोव्रचा कली वोइश्शो मेको १० जना नोले चाक्शो मीश आन कली खिं कामी कोव्रब मुर का वोइश्शा वोइक्मी बाक्त। मेकोमी आन माल्शो नेल्ल गेमी बाक्त। तन्न मेको नु गेनायो मइम्माक्त। मोपा मेको आन बेक्ची नाक्त सम्म यो मप्रोंइथु वोइक्मी बाक्त। मोपा मेकोपुकी वोंइश बेक्शो मीश मुर खोदेशो पा बाक्मा बाक्त। *२सामुएल १६:२१* **४**पिपमी आमासा कली “यहूदा डा वोंइश मुर आन कली खुप्तीमी। मिनु नाक्त सांमी आं बाक्तीकेमी जाक्पाइक्मी। मिनु गे यो जाक्को” दे मदा बाक्त। **५**मोपतीके आमासा यहूदा डा मुर आन कली खुप्चा कली गाक्माक्त। तन्न पिपमी देशो क्येडा मेको कली शुश नाक्त माल्दा बाक्त। **६**मिनु दाऊदमी अबीशै कली “अब्सालोम क्येडा बिक्री आ तौ शेबामी इं कली शुश श्येत गेब। पिप आ गेय पाइब आन कली

लाइश्शा, मेको कली खेदा पावो। मेको गारो हिरशो सहरम ओव्रत हना, इं गुइ रे ब्रोंइब” दे मदा बाक्त। **७**मिनु योआबम केरेथी, पेलेथी नु लडाइ पाइब नेल्ल यरूसलेम रे लाइश्शा, बिक्री आ तौ शेबा कली खेदा पवा बाक्त। *२सामुएल ८:१८* **८**मिनु मेकोपुकी गिबोन डा ठेयब फुल्लु बाक्तीक जाक्मानु, आमासा, मेको आन कली गुम्थ जाक्माक्त। मिनु योआबम लडाइ पतीक वा फेक्शो बाक्माक्त। मेको तार किप्शुर किप्शो बाक्माक्त। मिनु खोतम शुइश्शा तरवार किप्शुरम पिप्शो बाक्माक्त। मिनु मेको डोंइती गे लमेनु, मेको तरवार खोत रे दोक्माक्त। *मती २६:४८-५०* **९**योआबम आमासा कली “आं लोकब आमासा गे रिम्शोन बाक्डे?” दे हिल्लो पवा बाक्त। मिनु मेकोमी आमासा कली पुक्पु पाइक्चा कली आ ग्युरा गुइमी मेको आ गल शोक्रे ग्याइक्ता बाक्त। **१०**आमासामी योआब आ गुइमी तरवार बाक्शो मतुइक्ता बाक्त। मिनु योआबमी मेको आ कोव्रजम तूदा बाक्त। मिनु मेको आ गा क्यी खपीम दोक्शा बेक्माक्त। मेकोमी खेयप निकशी तूचा ममाल्दा बाक्त। मिनु योआब नु आ लोकब अबीशै बिक्री आ तौ शेबा कली खेदा पना पन लसा बाक्त। *१राजा २:५* **११**मिनु योआब आ ठिटा मुर काम आमासा आ बेक्शो रां आ नेक्था राप्शा “योआब नु दाऊद आस नोले खोइक्बपुकीम योआब आ नोले खोदमेक्ल” देमाक्त। **१२**आमासा आ बेक्शो रां हुशेम गिल्शा ठेयब लांमी गोल्ला बाक्माक्त। मिनु मुर नेल्ल लांमी दिक्शा बाक्शो बाक्मा बाक्त। मिनु मेकोम आमासा आ बेक्शो रां कली लां रे लाइश्शा आइक्ची खेतम

ताइक्ता बाक्त। मिनु मेको कली वा काम सुमा बाक्त। १३मेको कली ठेयब लां रे लदमे नोले, मुर नेल्लेम बिक्री आ तौ शेबा कली खेदा पचा कली योआब आ नोले खोदमे बाक्त।

१४शेबा इस्राएल डा थर नेल्ल लाक्शा, आबेल डा बेथ-माकाहम जाक्मा सम्म बिक्री आ खिं डा मुर नेल्ल तेइ तेइ रे गुम्मा बाक्त। मिनु मेको आ नोले सहर ओव्रमा बाक्त। १५योआब आ लडाइ पाइब मुर नेल्ल जाक्शा, आबेल डा बेथ-माकाह कली पुन्दमे बाक्त। मिनु सहर डा गारो गे मार मार तेल्ला, गारो डोइक्तीक ठीक पामे बाक्त। मिनु योआब आ लडाइ पाइबपुकीमी गारो प्रेत्या गोव्रमे बाक्त।

१६मिनु जोक्ब तुइक्ब मीश मुर काम सहर रे ब्रेशशा “नेनीन, नेनीन, योआब कली ब्रेशशा सोइक्तीन। मिनु गो मेको नु लोव्र पाइनुड” देंमाक्त। १७मिनु योआब आ डोंइती जाक्माक्त। मिनु मेको मीश मुरुमी “मार, गे योआब ननी?” देंमाक्त। मिनु योआबम “ओं, गो नड” देंमाक्त। मिनु मेको मीश मुरुमी “इन गेय पाइब आं लोव्र रिम्शो पा नेनीन” देंमाक्त। मिनु मेकोमी “नेता” देंमाक्त। १८मिनु मेकोमी “साइ रे मुरपुकीमी लोव्र नेंचा कली ‘आबेल सहर लचा माल्नीम’ देशो बाक्ब। मिनु मोपा निसाफ दुम्बाक्त। १९आं सहर इस्राएल डा सहरपुकीम लडाइ मपाइब, पिप कली दाक्शा मान पाइब सहरम हिक्सीब। मिनु गे एको सहर, इस्राएली आन कली कोव्रब ममा खोदेशो सहर कली खतम सेल्चा माल्नीनी? मारदे गे परमप्रभु यावे आ शोंप कली खतम पोक्चा माल्नीनी?” देंमाक्त।

व्यवस्था ३२:६ २०मिनु योआबमी “गो खतम मपोक्नुड, मक्याम्नुड। २१गो मो पचा

माल्शो मनकी। तन्न एफ्राइम पहाड डा बिक्री आ तौ शेबामी पिप दाऊद कली मरिम्शो पचा माल्शो बाक्ब। मेको मुर कली आंइ कली गेने। मिनु गो सहर प्रोंइशा गाक्नीक” देंमाक्त। मिनु मेको मीश मुरुम योआब कली “मेको आ पिया सहर रे लाडगा ब्वारनीकी” देंमाक्त। २२मिनु मेको मीश मुरुम आ लोव्र मुर नेल्ल आन कली नेंपाइक्मी बाक्त। मिनु मेकोपुकीम बिक्री आ तौ शेबा आ पिया खोइशशा, योआब कली ब्वारदमे बाक्त। मिनु योआबम तुराही तबा बाक्त। मिनु लडाइ पाइब नेल्ल सहर प्रोंइशा आन खिं खिं लेम्मा बाक्त। योआब चहिं पिप आ बाक्तीके यरूसलेम लेशशा लमाक्त।

ठेयब मुर आन नें

२३योआब इस्राएल डा लडाइ पाइब आन नेल्ल क्येडा ठेयब मुर बाक्माक्त। येहो-यादा आ तौ बेनायाह केरेथी नु पेलेथी पिप कली खाल पाइब आन ठेयब मुर बाक्माक्त। २सांमुएल ८:१६-१८; १राजा ४:४-६ २४अदोराम वाइलीम वाइल आन ठेयब मुर बाक्माक्त। अहीलुद आ तौ येहो-शाफात ब्रेक्ब बाक्माक्त। २५शेवा चहिं लडाइ पाइब आन ब्रेक्ब बाक्माक्त। सादोक नु अबीयाथार चहिं चढ़ेब बाक्सा बाक्त। २६याइर आ मुर इरा चहिं दाऊद आ चढ़ेब बाक्माक्त।

अन्काल नु रिस्पाह आ कथा

२१ पिप दाऊद आ पालाम बर्स सां सम्म अन्काल दुम्स डा दुम्स पवा बाक्त। मिनु दाऊदमी परमप्रभु यावे कली हिल्लो पवा बाक्त। मिनु परमप्रभु यावेमी “सावल नु आ खिं डा मुर आन

तार हुश आ दोस बाक्शो बाक्ब। मारदे हना मेकोम गिबोनी आन कली साइक्तु” देमाक्त। २मिनु पिपमी गिबोनी आन कली ब्रेशा, मेकोपुकी नु लोत्र पवा बाक्त। गिबोनी इस्राएली आन थर डा मुर मबाक्मा बाक्त। मेकोपुकी एमोरी रे ब्रोंइशा लीशो बाक्मा बाक्त। इस्राएलीपुकीम मेको आन कली प्रोंइतीक कसम जशो बाक्मा बाक्त। मो हना यो सावलमी इस्राएल नु यहूदा आ पर्बम मेको आन कली क्याम्चा माल्शो बाक्माक्त। *यहोसु ६:३, १५, १६*

३दाऊदमी गिबोनी आन कली “गो इन कली मार पड? परमप्रभु यावे आ मुर आन कली आसीक गेचा कली गो दोपा गारपाइक्नुडा?” दे हिल्लो पवा बाक्त। *ब्यवस्था ३२:६*

४मिनु गिबोनीपुकीमी “सावल आ खिं नु आंइ खिं डा मुर आन दातेम सुन नु चांदीम गार पाइक्ने मचाम्सीब। इस्राएली का यो साइक्चा मगारनीकी” देमा बाक्त। मिनु दाऊदम “मिनु मुल गोम इन कली मार पवल, दे मिम्नीनी?” देमाक्त। ५मिनु मेकोपुकीम पिप कली “सुम आंइ कली खतम पोक्गा, आंइ कली रागी रे क्याम्दा, मेको कली खतम पोक्चा कली आंइ गुइम गेने। ६मेको आ ७ जना तौ चच आंइ कली गेने। मिनु गो मेको आन कली परमप्रभु यावे आ डोंइती आ डांडा गिबोन सहरमी साइक्नीकी” देमा बाक्त। मिनु पिपमी “गो मेको इन कली गेनुड” देमाक्त। *ब्यवस्था २१:२२-२३*

७तन्न पिपमी परमप्रभु यावे आ नैम नु सावल आ तौ योनाथन नु कसम जतीके सावल आ चच योनाथन आ तौ मेफी-बोशेथ कली प्रोंइशा वोदा बाक्त। *१सामुएल २०:१५-१७*; ८पिपमी आइयाह आ तमी रिस्पाहम सावल रे जरमेशो तौ

निक्शी आरमोनी नु मेफी-बोशेथ चाक्गा बाक्त। मिनु सावल आ तमी मेराबम मेहोला आ मुर बारजील्लाइ आ तौ अद्रीएल रे जरमेशो ५ जना तौ यो चाक्गा बाक्त। *२सामुएल ३:७; १सामुएल १८:१६*

६मिनु मेको आन कली गिबोनी आन गुइमी गेमी बाक्त। मेकोपुकीम मेको आन कली परमप्रभु यावे आ डोंइती सदमे बाक्त। मिनु मेको ७ जना कालेम बेक्मा बाक्त। मेकोपुकी क्योव्रज रिक्तीक आ डोंइती डा नाक्ती साइक्चा पुंइसीमा बाक्त।

१०आइयाह आ तमी रिस्पाहम रोगु तारी आंम कली बाक्तीक सेल्चा कली भाडग्रा ब्रवा बाक्त। मिनु क्योव्रज ओंइतीक आ डोंइती डा नाक्त रे रेड यिचा सम्म मेकोमी आ तौ आन बेक्शो रां आन कली खाल पवा बाक्त। नाक्ती आन तार चिक्ब जुक्चा मगेथु, नाक्दो ब्वाकी डा जन्तुम ब्वचा मगेमी बाक्त। ११मिनु दाऊदमी सावल आ नोले चाक्शो मीश आइयाह आ तमी रिस्पाह आ पशो नेंशा, १२मेकोमी सावल नु आ तौ योनाथन आस रुश याबेश-गिलाद डा मुर आन गुइ रे चाक्गा बाक्त। मेकोपुकीम सावल नु योनाथन आस बेक्शो रां बेथ-शान सहर डा चोक रे लदमे बाक्त। पलिस्तीपुकीमी मेको आस कली गिल्लोआम साइशशा, नोले मेकेर क्युक्शो बाक्मा बाक्त। *१सामुएल ३१:१२*

१३मेकोम मेकेर रे सावल नु योनाथन आस रुश चाक्गा बाक्त। मिनु मेको रिस्पाह आ तौ आन रुश यो खुप्तमे बाक्त। १४मेकोपुकीम सावल नु आ तौ योनाथन आस रुश बेन्यामीन आ थर आन रागी डा जेला सहर सावल आ आफ कीश आ तुरसुम थिम्मे बाक्त। पिपमी मेको आन कली मार मार देमे,

मेको पामे बाक्त। मेको नोले परमप्रभुम रागी आ पर्वम पुंइशो लोव्र नेना बाक्त।

२सामुएल २४:२५

दाऊदम लडाइ ग्राशो

१इतिहास २०:४-८

१५ पलिस्ती नु इस्राएली लडाइ पामे बाक्त। दाऊद आ मुर नु लडाइ पथ यिमाक्त। मिनु पलिस्ती नु लडाइ पामे बाक्त। मिनु दाऊद थाम्पा दमाक्त।

१६ इशबी-बेनोब रेफाइम आ बोल्यो लाइशो मुर का बाक्माक्त। मेको आ तूतीके सहे सां शेकेल कांसा के बाक्माक्त। मिनु नक या का यो पिम्सीशो बाक्माक्त। मेकोमी “दाऊद कली साइक्नुड” देंमाक्त। शेकेल का ११.५ ग्राम

बाक्ब। ३०० शेकेल ३ किलो आथा बाक्ब। १७ मेना सेरूयाह आ तौ अबीशै दाऊद कली वारच पाइक्थ जाक्शा, मेको पलिस्ती कली सदा बाक्त। मेना दाऊद आ लडाइ पाइबपुकीमी “मुल रे गे गो नु लडाइमी मगाक्कीन। मारदे हना गे इस्राएल डा छेडछेडन ननी। मेको मकाप्ल” दे कसम जामे बाक्त। २सामुएल २३:१८; २सामुएल २२:२६

१८ मिनु नोले लेंशा, गोब सहरम पलिस्तीपुकी नु लडाइ दुम्माक्त। मेना हुशा डा मुर सिब्बेकैम रेफाइम आ खिं डा मुर साफ माइशो कली सदा बाक्त। रेफा थम लाइशो रेफाइ माइशो मुर आन किकी पिपी बाक्शो बाक्त। १९ मिनु लेंशा गोब सहरम पलिस्तीपुकी नु अर्को लडाइ का दुम्माक्त। बेथलेहेम डा यारे-ओरेगीम आ तौ एल्हानानम गाथ सहर डा गित्त आ खिं डा मुर गोल्याथ कली सदा बाक्त। मेको आ तूतीक आ बिड तोव्र प्रोव्रब आन प्रोव्रतीक शी खोमो बाक्माक्त।

१सामुएल १७:७ २० मिनु नोले लेंशा गाथ सहरम लडाइ दुम्माक्त। मेकेर यो ठेयब लाइशो मुर का बाक्माक्त। मेको आ गुइ नु खोइलीम ६, ६ ओटा अम्ला, नेल्ल पा २४ ओटा अम्ला पाइशो रेफाइ आन मुर बाक्माक्त। २१ मिनु मेकोम इस्राएली आन कली हिंच कोंइदा बाक्त। मिनु दाऊद आ लोकब शिमेइ आ तौ योनाथनमी मेको कली सदा बाक्त।

१सामुएल १७:१० २२ मेको ४ जना मुर गाथम बाक्ब रेफाइ आन दाते डा बाक्मा बाक्त। मेको नेल्ल दाऊद नु आ मुर आन गुइ रे बेक्मा बाक्त।

दाऊदम परमप्रभु कली ठेयब सेल्लो

भजन संग्रह १८:-

२२ परमप्रभु यावेमी दाऊद कली आ जोरी सत्रु नेल्ल नु सावल रे प्रोना नोले दाऊदमी परमप्रभु यावे कली कुम्सो पवा बाक्त। २ मेकोमी “परमप्रभु यावे आं सेरथे फुल्लु, आं बोल्यो दरवार नु आं कली श्येत रे प्रोंइब बाक्ब। ३ आं परमप्रभु आं सेरथे फुल्लु आं खुइक्तीके बाक्ब। मेको आं तेक्तीक नु आं ब्रोंइतीक बाक्ब। मेको आं बोल्यो दरवार नु आं फाम्सीतीक बाक्ब। मेको आं कली हुश ख्वाक्श पोक्तीके रे प्रोंइब बाक्ब। ४ गो परमप्रभु यावे कली थोइनुड। मेको ठेयब सेल्ला पुंइसीब बाक्ब। मिनु मेकोम आं कली आं जोरी सत्रु रे प्रोंइब।

५ बेक्पाइक्बम आं कली ब्वाक्कु आ छालम खोदेंशो पा गिलती। खतम पोक्ब बारशो ब्वाक्कुम आं कली सुम्ती। ६ बेक्शो मुर आन बाक्तीकेम आं एर ओंथ नेल्ल रे गिलती। बेक्पाइक्ब आ ब्वारद आं डोंइती बाक्ब।

७मिनु गो आं श्येत आ पब्रम परमप्रभु यावे कली थोव्रता। गो आं परमप्रभु कली 'वारच पने' दे पुंडता। मिनु मेकोमी आ बाक्तीके रे आं सेंदा नेंतु। आं पुंडशो नेंतु।

८मिनु रागीमी खिनु कुत। सरीड डा जग हिम्साकम। मारदे हना, परमप्रभु यावे गाइशो बाक्त। ९मेको आ नें रे कुन गूत। मेको आ शोव्र रे ग्राव गु दाकब मी गूत। मेकेर रे ब्रशो कोइला गूतेकम। १०मेको सरीड रे तोंइसाकव। मेको आ खोइली आगा क्येर गोस्स बाक्त। ११मेको करूब डोइशशा बेरत। फश के फ्राम बेरशो तांडसाकव। १२मेको छिडछिडम सुम्साकव। शुश ब्वाकुकु बाकशो क्येर गोस्स आ एर ओंथ बाक्तेकम। १३मेको आ डोंइती डा छेडछेड रे ब्रशो कोइला गूतेकम। १४परमप्रभु यावेमी सरीड रे बुंबु पाप्तु। नेल्ल क्येडा ठेयबम आ सेंदा नेंपाइकतु। १५मेकोम ब्रा आप्शा, एर ओंथ ब्रपाइकतु। चिला आप्शा, सोइक्ताकव। १६समुन्द्र आ पुं तांडसाकव। रागी आ जग हुक्साकव। मेको परमप्रभु यावे आ हुइशशो नु आ सास रे मोदेशो दुम्त। १७मेकोमी इर रे आ गुइ दिशा ग्याइक्ताकयी। आं कली ठेयब समुन्द्र रे कीशा गुंडताकयी। १८मेकोमी आं कली आं बोल्यो जोरी सत्रु नु आं कली काइ मदाकब, रे प्रोंइती। मेको आं क्येडा शुश बोल्यो बाक्तेकम। १९मेकोपुकीमी गो हिंचा डा श्येत जडा ना आं कली लडाइ तोम्तेकम। तन्न परमप्रभु यावेमी आं कली तिकती। २०मेकोमी आं कली लाडगा डा ठेयब बाक्तीकेम गुंडशा, श्येत रे प्रोंइती। मारदे हना मेको आं कली तशा ग्येरशो बाक्त।

२१परमप्रभु यावेमी आं कली आं ठीक पशो डा इनाम गेती। आं गुइम

हुश मशाइकपाइक्तीके आं रिम्शो पशो डा गेती। २२मारदे हना गो परमप्रभु यावे आ लांम गाकशो बाक्ती। गो आ अरेशो लोव्र मटीब खोदेशो पा आं परमप्रभु रे डोन मलड। २३मारदे हना आ ठीक पतीक लोव्र आं डोंइती बाक्तेकम। गो मेको आ फुल्लुम मुशा ब्रेकशो लोव्र नेल्ल टिशा पाता। २४मेको आ डोंइती गो दोस मताइब बाक्ती। गो मरिम्शो पतीक रे डोन बाक्ती। २५मोपतीके परमप्रभु यावेमी आं कली आं ठीक नु रिम्शो पशो आ पा डा गेती।

२६गे मप्रोंइब आन कली मप्रोंइब बाक्नीनी। दोस मताइब आन कली दोस मताइब बाक्नीनी। २७गे रिम्शो पाइब आन कली रिम्शो पाइब बाक्नीनी। दूली पाइब आन कली दूली पाइब बाक्नीनी। २८गे ब्रेम्शो मुर आन कली प्रोंइनीनी। तन्न ठेयब लेशो आन कली आइकच सेल्नीनी। २९परमप्रभु यावे गे थमा पा आं बत्ती खोदेशो बाक्नीनी। परमप्रभु यावेमी आं कली छिडछिडमी छेडछेड दुम्पाइकब। ३०इन पतीकेमी गो लडाइ पाइब आन कली ग्रानुड। आं परमप्रभु गो गारो खाकशा लाक्ने चाप्नुड। ३१परमप्रभु आ लां ठीक बाकब। परमप्रभु यावे आ थोशा पशो लोव्र थमा बाकब। मेको आ बाक्तीकेम खूंइसीब आन कली तेक्तीक बाकब।

३२परमप्रभु यावे क्येडा अर्को तेकोइ परमप्रभु मबाकब। आंइ परमप्रभु क्येडा लाकशा अर्को तेकोइ सेरथे फुल्लु मबाकब। ३३परमप्रभुमी आं कली सक्ति गेती। आं गाक्तीक लां ब्रेम्शो सेल्लु। ३४मेकोम आं कली किश्श खोदेशो पा दोरब सेल्लु। मेकोमी आं कली इर

वोइशा कोवब। ३५ मेकोम आं गुड कली लडाइ पचा शेंब। मोपा आं गुडमी कांसा के लिब्रा खुवने चाण्व। ३६ गे आं कली इन तेक्शा ब्रोंइतीक गेतीनी। इन वारच पतीकेम आं कली ठेयब सेल्टी। ३७ गे आं कली ठीक पा गाक्चा गेतीनी। मोपतीके आं खोइल गेनायो मग्रेक्ब। ३८ गो आं जोरी सत्रु आन कली खेदा पा खतम पोक्तामी। गो मेको नेल्ल आन कली खतम मपोक्गुमी सम्म मलेडड। ३९ गो मेको आन कली खतम पोक्शा साइक्नुडमी। मिनु मेकोपुकी गेनायो बोक्ने मचाप्नीम। मेकोपुकी आं खोइली आगाम गोल्तेक्म। ४० गे आं कली लडाइ पचा कली सक्ति गेनीनी। आं जोरी सत्रु आन कली आं डोंइती आइक्च सेल्टीनी। ४१ गे आं जोरी सत्रु आन कली आं डोंइती रे प्रोक्पाइक्नीनी। गो आं कली काइ मदाक्ब आन कली खतम पोक्तामी। ४२ मेकोपुकीम कोव्रना कोव्रन बाक्तेक्म। तन्न मेको आन कली प्रोंइब सुइ मबाक्ब। मेकोपुकीम परमप्रभु यावे कली पुंइतेक्म। तन्न मेकोमी मेको आन कली लोव्र मलेत्त। ४३ गो मेको नेल्ल आन कली रागी डा फुरक खोदेशो पा फस पोक्तामी। गो मेको आन कली लां डा हिलो खोदेशो पा दिम्ताक्डमी।

४४ गे आं कली मुर आन जिचा पोक्तीक रे प्रोंइतीनी। गे आं कली रागी रागी डा मुर आन ठेयब मुर सेल्शा वोइक्तीनी। आं मतुइश्शो मुरपुकीम आं कली गेय पाम्तेक्म। ४५ अर्को रागी डा मुर जाक्शा आं कली मान पाम्तेक्म। आं लोव्र नेंशा, मेकोपुकी आं देशो टिम्तेक्म। ४६ अर्को रागी डा मुर हिंशा ख्रिंख्रि पा आन बोल्यो दरवार रे जाक्तेक्म।

४७ परमप्रभु यावे ब्रोंइशा बाक्ब। आं सेरथे फुल्लु ठेयब बाक्ब। आं परमप्रभु मान ताइब बाक्ब। मेको आं कली प्रोंइब, सेरथे फुल्लु बाक्ब। ४८ परमप्रभुम आं पर्वम क्येक्क लेत्ताक्व। मिनु मुर आन कली आं सासनम वोइक्तीमी। ४९ मेकोम आं कली आं जोरी सत्रु रे प्रोंइती। गे आं कली आं जोरी सत्रु आन क्येडा ठेयब सेल्टीनी। गे आं कली हुश ख्वाक्श पोक्ब रे प्रोंइतीनी। ५० मोपतीके परमप्रभु यावे, गो रागी रागी डा मुर आन दातेमी इन कली ठेयब सेल्नुड। मिनु इन कली ठेयब सेल्टीक कुम्सो पाइनुड। ५१ परमप्रभु यावे पिप, आं ब्रोंइशा बाक्तीक बाक्ब। मेकोम आ तेल लुक्शो दाऊद कली नु आ चच युइ आन कली गेना हना यो दाक्तीक कोंइब” दे दाऊदमी परमप्रभु यावे कली ठेयब सेला बाक्त।

दाऊद आ नोले डा लोव्र

२३ एको दाऊद आ नोले डा लोव्र बाक्ब। येस्से आ तौ दाऊद आ नोले देशो लोव्र एको बाक्ब। परमप्रभुमी ठेयब सेल्शो मुर आ पशो लोव्र एको बाक्ब। याकूब आ परमप्रभुमी मेको कली तेल लुक्शा, पिप सेल्शो बाक्त। इस्राएली आन सक्ति पाइश्शो आन दातेमी दाऊद कली नेल्ल क्येडा दाक्ब बाक्ब। १ सामुएल १६:१३ २ “परमप्रभु यावे आ सोक्त आं रे पा ब्वाक्शो बाक्ब। मेको आ देशो लोव्र आं शोव्रम बाक्ब। ३ इस्राएली आन परमप्रभुम लोव्र पाप्तु। इस्राएली आन सेरथे फुल्लुमी आं कली ‘सुमी मुर आन कली ठीक निसाफ पाइबा, सुम परमप्रभु कली मान पा हिंशा हुकुम पाइबा, ४ मेको सुनी डा नां खोदेशो बाक्ब। मेको गोस्स

मबाक्शो सुनी दाप्शो नां खोदेशो बाक्ब। मिनु मेको रेउ यिम नोले वाशो घांस खोदेशो बाक्ब' देंत। *न्यायाधीस ५:३१* ५मोपा आं खिं परमप्रभु नु बाक्ब। मारदे हना मेकोमी गो नु गेना हना यो लीब कबल का पशो बाक्ब। मेको नेल्ल रिम्शो नु लीब। मिनु मेकोमी आं रिम्शो दुम्शो नु आं दाक्शो बारना बारना लपाइक्ब। ६तन्न परमप्रभु यावे आ अरेशो मटीब फशेम बेरशो चू खोदेशो बाक्नीम। सुइम मेको कली गुइम थिने मचाप्नीम। ७सुम मेको कली ताइक्चा दाक्बा, मेकोमी फलाम नु कोक्के लाइश्शा गुप्नीम। मेको मीम हुम्शा, रीब पा दाक्चा पुंडसीनीम" देंत।

दाऊद आ बोल्यो लडाइ पाइब

१इतिहास ११:१०-४७

८दाऊद आ बोल्यो लडाइ पाइब मुर आन नें मार बाक्तेक्म देंशा हना, डोंइती ताह-केमोन आ खिं डा मुर योशेब-बाशेबेथ बाक्माक्त। मेको बोल्यो सां आन दाते डा कप्तान बाक्माक्त। मेकोमी ८ सहे मुर आन कली आ तूतीकेम कालेमी साइक्मी बाक्त। ९मेको आ नोले डा बोल्यो सां लडाइ पाइब आन दाते डा अहोही आ चच दोदो आ तौ एलाजर बाक्माक्त। मेको दाऊद नु बाक्शो बाक्माक्त। मेकेर पलिस्तीपुकी लडाइ पचा कली बुक्शो बाक्मा बाक्त। मिनु इस्राएलीपुकी प्रोक्मानु, मेको कामीन लडाइ पतीकेम राप्शा, १०मदम सम्म पलिस्ती आन कली तरवारम क्योरस डा क्योरस पामी बाक्त। मेको आ गुइमी तरवार खोक्शो बाक्माक्त। मोपा परमप्रभु यावेम मेको नाक्ती थाम्पा ग्रापदा बाक्त। मेको नोले मुरपुकी बेक्शो मुर आन मार

मार रोइक्थ ला जाक्मा बाक्त। ११मेको आ नोले डा हरारी आगी आ तौ शम्माह बाक्माक्त। पलिस्तीपुकी लेहीम बुक्शो बाक्मा बाक्त। मेकेर मस शोक्शो थम रिम्शो रू का बाक्माक्त। मिनु अरामीपुकी पलिस्ती आन डोंइती रे ब्रुशा प्रोक्मा बाक्त। १२मिनु पलिस्तीपुकीमी मुर आन कली खेदा पा लदमेनु, मेको शम्मा मस शोक्शो रू आ दातेमी राप्शा, खाल पा बाक्शो बाक्माक्त। मिनु मेकोमी पलिस्ती आन कली साइक्मी बाक्त। मोपा परमप्रभु यावेमी मेको आन कली थाम्पा ग्रापदा बाक्त।

१३अन्न रिक्तीक डोंइती डा नाक्ती, मेको ३० जना कप्तान आन दाते डा मेको सां अदुल्लाम डा पुक्खी दाऊद आ बाक्तीकेम जाक्शो बाक्मा बाक्त। पलिस्ती आन हुल का चहिं रेफाइम डा बेंसीम बाक्तीक सेल्शा बाक्शो बाक्मा बाक्त। *१सामुएल २२:१* १४मेना दाऊद डांडा डा गारो हिरशो बोल्यो बाक्तीकेम बाक्शो बाक्माक्त। पलिस्ती आन लडाइ पाइब हुल बेथलेहेमम बाक्मा बाक्त। १५मिनु काबु नाक्त दाऊद थाम्पा ब्वाक्कु तूतू दाक्शो बाक्माक्त। मिनु मेकोमी तूतू दाक्शा "सुइमी आं कली बेथलेहेम डा ठेयब लाप्चो आ नेक्था बाक्शो इनार डा ब्वाक्कु तूचा गेयीमी हना, रिम्शो दुम वा" देंमाक्त। १६मिनु मेको बोल्यो लडाइ पाइब सां पलिस्ती आन दाते रे ग्रीशा लशा बेथलेहेम डा ठेयब लाप्चो आ नेक्था बाक्शो इनार डा ब्वाक्कु चाक्शा दाऊद कली गेमे बाक्त। तन्न दाऊदम मेको तूने मबिस्से बाक्त। मेकोमी मेको ब्वाक्कु परमप्रभु यावे आ डोंइती मोदा बाक्त। १७मेकोमी "परमप्रभु यावे आ

नेमी गो एको ब्वाक्कु मतूनुड। मार, गो एको मुर आन हुश तूनुडा? एकोपुकीम एको ब्वाक्कु हेररा आन गिंग सोइक्चा डा पा लशा चाक्तेक्म” देंमाक्त। मोपतीके दाऊदमी मेको ब्वाक्कु मतूनुडा बाक्त। मेको बोल्यो लडाइ पाइब सां आन ठेयब गेय मेकोन बाक्त।

अरु बोल्यो लडाइ पाइब

१८मिनु सेरूयाह आ तौ योआब आ लोकब अबीशै मेको ३० जना आन दाते डा ठेयब बाक्माक्त। मेकोमी सहे सां जना मुर आन कली आ तूतीकेम लडाइ पा साइक्मी बाक्त। मेको सांमी “मेको बोल्यो मुर बाक्ब” देंमा बाक्त।
२सामुएल २१:१७ १९मेको, मेको ३० जना आन दाते डा नेल्ल क्येडा हिक्सीशो मुर बाक्शो बाक्त। मिनु मेको आन कप्तान दुम्माक्त। तन्न मेको बोल्यो मुर सां खोदेशो दुम्ने मचबा बाक्त।

२०कब्सेल सहर डा येहो-यादा आ तौ बेनायाह यो बोल्यो लडाइ पाइब का बाक्माक्त। मेकोमी ठेयब गेय पशो बाक्माक्त। मेकोम मोआब डा अरीएल आ तौ निक्शी साइशो बाक्माक्त। फुं यिम ना मेकोमी खाल्टाम लशा मेकेर गुप्स का साइशो बाक्माक्त। २सामुएल ८:१८; यहोसु १५:२१ २१मेकोमी दारशो बोल्यो इजीप्त डा मुर का कली साइशो बाक्माक्त। मेको इजीप्त डा मुर तूतीक का शेशो बाक्माक्त। तन्न बेनायाह कोक्के का शेशा लशा, मेको इजीप्त डा मुर आ तूतीक आ गुड रे रोइशा, मेको कली सदा बाक्त। २२येहो-यादा आ तौ बेनायाह आ पशो मेकोन बाक्ब। मेको सांमी “मेको बोल्यो लडाइ पाइब का

बाक्ब” देंमा बाक्त। २३मेको, मेको ३० जना मुर आन दाते डा हिक्सीशो मुर का बाक्शो बाक्त। तन्न मेको बोल्यो सां खोदेशो दुम्ने मचबा बाक्त। मिनु दाऊदमी मेको कली आं कली खाल पाइब आन ठेयब मुर सेला बाक्त।

२४मिनु मेको ३० जना आन दातेमी सु सु बाक्मा बाक्त देंशा हना, योआब आ लोकब आसाहेल, बेथलेहेम डा दोदो आ तौ एल्हानान, २सामुएल २:१८ २५हारोद सहर डा शम्माह, हारोद सहर डा एलीका, २६पालती आ खिं डा हेलेस, तेकोहा सहर डा इक्केश आ तौ इरा, २७अनाथोथ सहर डा अबीएजेर, हुशा डा मुर मेबुन्नाइ, २८अहोही आ खिं डा मुर सल्मोन, नेतोफाह आ खिं डा माहाराइ, २९नेतोफाह आ खिं डा बानाह आ तौ हेलेब, गिबा सहर डा बेन्यामीन आ थर डा रिबाइ आ तौ इत्ताइ, ३०पिराथोन सहर डा बेनायाह, गाश खोला डा हिददाइ, ३१अरबा आ खिं डा मुर अबी-अल्बोन, बाहुरीम सहर डा अज्मावेथ, ३२शा-आल्बोन सहर डा एली-अहबा, याशेन आ तौ योनाथन, ३३हरारी सहर डा शम्माह, हरारी सहर डा शरार आ तौ अहीयाम, २सामुएल १५:१२ ३४माकाह सहर डा अहास्बाइ आ तौ एली-फेलेत, गिलो डा अहीथोफेल आ तौ एलीआम, ३५कारमेल पहड डा हेस्रो, यहूदा डा अरब सहर डा पाराइ, ३६सोबाह सहर डा नाथान आ तौ इगाल, गाद आ थर डा बानी, ३७अम्मोनी जेलेक, बेयरोथ सहर डा नहाराइ, मेको सेरूयाह आ तौ योआब आ या कुरब बाक्माक्त। ३८इथ्री आ खिं डा इरा, इथ्री आ खिं डा गारेब नु २सामुएल ११:३ ३९हिती आ मुर उरीयाह, मेको नेल्ल पा ३७ जना बाक्मा बाक्त।

मुर आन कली हिक्शो

१इतिहास २१:-

२४ मिनु परमप्रभु यावे इस्राएली आन पर्बम लेशा गाइक्ता बाक्त। मिनु मेकोमी दाऊद कली मेको आन पर्बम मरिम्शो पपाइक्चा कली क्युकगा बाक्त। मिनु दाऊदमी “इस्राएल नु यहूदा डा मुर आन कली हिक्कीन” देंमाक्त। २मिनु पिपमी योआब नु मेको नु बाक्ब लडाइ पाइब आन ठेयब मुर नेल्ल आन कली “दान रे बेयर-शेबा सम्म डा इस्राएल आ खिं खिं डा मुर आन बाक्तीक तेइ तेइ लशा, नेल्ल आन कली हिक्शा, मेको दोशो बाक्मा, आं बाक्तीकेम ब्रेक्शा चाक्कीन” देंमाक्त। प्रस्थान ३०:१२ ३तन्न योआबम पिप कली “परमप्रभु यावे, इन परमप्रभुम मुर आन कली सहे का खेयप हिक्शो क्येडा यो शुश सेलल। मेको तचा डा पा इन ब्रॉइची ना दुम्ल। तन्न मारदे आं प्रभु पिप मोदेशो पचा माल्नी?” दे हिल्लो पवा बाक्त। ४तन्न पिप आ अरेशो योआब नु लडाइ पाइब आन ठेयब मुरपुकीम पचा माल्मा बाक्त। मोपतीके योआब नु लडाइ पाइब आन ठेयब मुर पिप आ डोंइती रे इस्राएल डा मुर आन कली हिक्चा कली लमा बाक्त। ५मिनु मेकोपुकी यर्दन खोला शोक्शा, आरोएर सहर नु दिंम आ दाते डा सहर रे गाद नु याजेर गे लमा बाक्त। व्यवस्था २:३६ ६मिनु मेकोपुकी हिक्ती आन रागी गिलाद नु कादेश जाक्मा बाक्त। नोले दान लशा, सीदोन जाक्दीम्मा बाक्त। ७मिनु नोले गारो हिरशो सहर टायर, हिक्वी नु कनानी आन सहर नेल्ल लमा बाक्त। नोले यहूदा डा नेगेब डा बेयर-शेबा सहर सम्म लमा

बाक्त। ८मिनु ६ महिना नु २० नाक्त नोले मेकोपुकी रागी नेल्ल हिरशा, लेशशा यरूसलेम जाक्मा बाक्त। ९मिनु योआबम पिप कली “या चलेने चाप्ब लडाइ पाइब इस्राएलम ८ लाख नु यहूदाम ५ लाख बाक्तेक्म” दे शेंदा बाक्त।

१०मिनु नोले दाऊद मुर आन कली हिक्शो आ पर्बम आ थुं मनुमाक्त। मिनु दाऊदमी परमप्रभु यावे कली “गो मुर आन कली हिक्शा ठेयब पाप पाता। मुल परमप्रभु यावे, इन वाइल आ मरिम्शो पशो क्याम्दीन। मारदे हना गो थम मुर्ख गेय पाता” देंमाक्त। २सामुएल १२:१३ ११मिनु दाऊद सुनी कना बोक्माक्त। मिनु परमप्रभु यावेमी आ लोव्र पाइब गाद कली लोव्र पवा बाक्त। १२मार लोव्र पवा बाक्त देंशा हना “गे दाऊद कली परमप्रभु यावेम इ कली मार देंब देंशा हना ‘गो इ कली लोव्र सां गेनन। मेको आन दाते डा का योव्रचा माल्नेवे। मिनु गो मेको इ कली पाइनुड’ देंत” देंमाक्त। १३मिनु गाद दाऊद आ बाक्तीक जाक्शा “इन कली नु रागी कली बर्स सां सम्म अन्काल दुम्तीके, महिना सां सम्म इन जोरी सत्रुम खेदा पचा पुंइसीतीके नु इन रागीम नाक्त सां सम्म मुर बेक्तीक रोइ जाक्तीके, तेको योव्रनीनी मिम्शा देंनीन। मिनु आं कली सोइक्ब कली मार देंचा माल्नुडा देंनीन” देंमाक्त। येरमीया २४:१०; इजीकीएल ६:११-१२ १४मिनु दाऊदम गाद कली “गो शुश श्येत जशो बाक्नुड। आंइ कली परमप्रभु यावे आ गुइम दुम्चान रिम्शो बाक्ब। मारदे हना आ शिशी ठेयब बाक्ब। गो मुर आन गुइम मदुम्डल” देंमाक्त।

१५मोपतीके परमप्रभु यावेमी आ देंशो नाक्त रे इस्राएल नेल्लेम मुर बेक्तीक

रोइ जाकपदा बाक्त। मिनु दान रे बेयर-शेबा सम्म ७० हजार मुर बेक्मा बाक्त। १६मिनु परमप्रभु यावे आ स्वर्ग डा गेय पाइबमी यरूसलेम खतम पोक्चा कली आ गुइ मेक गे दिंदा बाक्त। मिनु परमप्रभु यावेमी मुर आन कली खतम सेल्ब आ स्वर्ग डा गेय पाइब कली तेक्शा “मोक्ल, मुल दुम्त” देंमाक्त। मेना मेको परमप्रभु यावे आ स्वर्ग डा गेय पाइब यबुसी अरौनाह आ खलाम राप्शो बाक्माक्त। उत्पत्ती १६:१३; प्रस्थान १२:२३; यसेया ५४:१६ १७मिनु दाऊदमी मेको मुर आन कली साइक्ब परमप्रभु आ आ स्वर्ग डा गेय पाइब कली तवा बाक्त। मिनु मेकोमी परमप्रभु यावे कली “पाप पाइब, गो आं का ला नड। इन अरेशो लोव्र मटीब यो गो नड। तन्न एको मुर मार पामे डा? गे आं कली नु आं खिं डा मुर आन कली श्येत गेने” देंमाक्त। गन्ती १६:२२ १८मेको नाक्ती गाद दाऊद आ बाक्तीकेम जाक्शा, मेको कली “गे लशा, यबुसी अरौनाह आ खलाम परमप्रभु यावे कली चढ़ेतीक का सेलो” देंमाक्त। १९मिनु परमप्रभु यावेमी अरेशो गादमी देंशो खोदेंशो पा दाऊद इर डोइशशा लमाक्त। २०मिनु अरौनाहम पिप नु आ मुर आन कली आ बाक्तीक गे पिशो तशा, पिप आ डोंइती खुम्की

पा बाप्शा सेउ पवा बाक्त। २१मिनु अरौनाहमी “मारदे आं प्रभु पिप इन वाइल कली गुम्थ जाक्नी” दे हिल्लो पवा बाक्त। मिनु दाऊदमी “गो परमप्रभु यावे कली चढ़ेतीक का सेल्चा, दे इ खला ग्याप्थ जाक्ती। मो पाता हना, एको मुर बेक्तीक रोइ दिक्बा कों?” देंमाक्त। २२मिनु अरौनाहमी दाऊद कली “आं प्रभु पिप मेको इन के दुम्त। मिनु दोदेंशो दाक्नीनी मोदेंशो पा चढ़ेन। चोशा चढ़ेचा कली गो नु ब्यफ बाक्नीम। शी कली जुवा नु दांइ पतीक शी बाक्नीम। २३पिप, गो इन कली मेको नेल्ल गेनुड। परमप्रभु यावे, इन परमप्रभुम इन चढ़ेशो ब्रवल” देंमाक्त। २४तन्न पिपमी अरौनाह कली “ममाइ, गो मेको ग्याप्नुड। गो क्येट मथाप्शो थोव्रक परमप्रभु यावे, आं परमप्रभु कली मचढ़ेनुड” देंमाक्त। मोपतीके दाऊदम मेको खला नु ब्यफ डा ५० शेकेल चांदी थाप्शा ग्यबा बाक्त। शेकेल का ११.५ ग्राम बाक्ब। २५मिनु दाऊदम मेकेर परमप्रभु यावे कली चढ़ेतीक का सेला बाक्त। मिनु चोशा चढ़ेतीक नु दुशा बाक्चा आ पर्बम चढ़ेतीके चढ़ेवा बाक्त। मिनु परमप्रभु यावेमी रागी आ पर्बम पुंइशो लोव्र नेना बाक्त। मिनु इस्राएलम मुर बेक्तीक रोइ दिक्माक्त। २सामुएल २१:१४